

أم العروسة





عبد الحميد جوده السحار



مطبعة خان مكتبة مصر

أم العروسة

تأليف
عبد الحميد جودة السحار



الناشر
مكتبة مصر
٣ شارع كامل صدقي - الجيزة



الفصل الأول

تردد رنين الجرس الخارجى فى أرجاء الشقة ، ففتح حسين عينيه فوقعنا على زوجته زينب ، الراقدة إلى جواره تغط فى نومها ، وتتابع الرنين فأزاح الغطاء بعيدا عنه وهو ينهض ، فرأى ابنته هالة تتمطى فى سريرها الصغير ، الملتصق بسريرهما من جانب زينب ، فخشى أن يوقظها ذلك الرنين المتواصل ، فهب مسرعا وانطلق حافى القدمين إلى المطبخ والتقط وعاء اللبن واتجه إلى باب الشقة وهو يهرول .

انفرج الباب عن فتحة تكاد تسمح بمرور الوعاء ، ومد يده به ، وهو يخفى وجهه عن بائع اللبن ، فقد أحس أن شعره منفوش ، وعينه ما زالتا منتفتحتين من أثر النوم ، وأن البيجاما التى يرتديها كانت من قطعتين مختلفتين !

وشعر بثقل اللبن فى الوعاء ، فسحب ذراعه ، وأغلق الباب فى حذر ، حتى لا يرتفع صريه ويوقظ النائمين ، وسار على أطراف أصابعه إلى المطبخ ، ثم عاد إلى غرفة نومه ، واندس فى السرير ، وسحب الغطاء وأغمض عينيه ليستأنف النوم اللذيذ .

وتقلبت هالة فى سريرها ، وبكت بصوت بدأ منخفضا ثم أخذ فى الارتفاع ، فمد ذراعه من فوق زوجته ، وراح يتحسس الحلمة المطاط المشبوكة فى صدر هالة ، حتى عثر عليها ووضعها فى فمها ، ولكن هالة

لم تكف عن البكاء ، بل انقلب صياحا ، فنحى الغطاء عنه في غيظ ،
فانكشف ذراع زينب ، وقام ليغادر الغرفة حافى القدمين إلى المطبخ ،
وهو ينظر إلى زوجته وابنته التي عكر عويلها صفو السكون ، فألقى
زوجته تمد يدها وتسحب الغطاء عليها دون أن تفتح عينيها ، وتروح في
سبات وقد ارتسم على وجهها هدوء عجيب .

ووصل إلى المطبخ ، وبكاء ابنته يصك أذنيه ، فتناول علبة
الكبريت ، وأخرج منها عودا في عجلة ، وحاول أن يشعله ، ولكن العود
انكسر ، فأخرج آخر وأشعله في لهفة ، ثم أوقد « وابور السبرتو »
ووضع فوقه وعاء اللبن .

ولم يشأ أن يضيع وقتا ، فأخرج من الثمالة زجاجة ركبت فوق فوهتها
حلمة من المطاط ، وذهب إلى الحوض ، وأخذ يغسلها في عناية ، ثم
وضع فيها قمعا ، وعاد إلى وعاء اللبن الموضوع فوق « وابور
السبرتو » .

واستمرت هالة في بكائها ، فجعل يتململ في وقفته ، وينظر إلى النار
في توصل يتعجلها .. وأخيرا رفع الوعاء وصب اللبن في الزجاجة ثم ألقى
القمع في الحوض ، وراح يركب الحلمة المطاط .

وفتح صنوبر الماء ، ومد يده بالزجاجة ليبرد اللبن ، واستمر الماء يجرى
فوق الزجاجة ، حتى إذا حسب أن حرارة اللبن أصبحت مناسبة ، رفع
الزجاجة إلى فمه ، ومص من الحلمة مصة فإذا باللبن يلسعه ، فعاد
وضع الزجاجة تحت الماء في ضيق ، فبكاء هالة كان يدوى في المطبخ .
وأغلق صنوبر الماء ، وعاد مص الحلمة مرة أخرى ، وهو في انطلاقه

إلى هالة ، ليطمئن إلى مناسبة درجة حرارة اللبن ، ورفع بصره إلى الساعة المتواضعة المعلقة في الردهة ، فإذا بها تشير إلى السادسة ، وأخرج الحلمة من فمه ، ومسحها بيده ، ثم هرول إلى غرفة النوم .

وألقم هالة الحلمة ، فكفت عن البكاء ، وأخذت الزجاجاة بين يديها فوقف ينظر إليها برهة ، وقد تفجرت ينابيع الحنان في جوفه ، وانبسطن أساريه ، ثم دار حول السرير ليأخذ مكانه إلى جوار زينب ، ولكنه ما إن هم بالرقاد ، حتى عاود القيام ، فقد تذكر شيئاً هاماً .

خرج من الغرفة ، وسار في ردهة طويلة ، حتى بلغ غرفة مغلقة ، ففتح بابها في حرص ونظر . كان في الغرفة ثلاثة أسرة ، رقدت فيها بناته الثلاث ، أحلام ونبيلة وسوسن .

كانت أحلام في الثامنة عشرة ، مكتملة النمو ، بيضاء البشرة ، تبعثر شعرها الأسود الفاحم على الوسادة ، وارتسمت على شفتيها بسمه ، ودارت في فراشها نصف دورة ، فارتفع صدرها الناهد ، وامتدت إحدى ساقها العاريتين وتقلصت الأخرى ، كانت في حلم لذيذ من أحلام الشباب .

وكانت نبيلة في السابعة عشرة ، منفوشة الشعر ، مزججة الحاجبين ، رقيقة الشفتين ، وكانتا تتمتان ، فهي لا تكف عن الكلام حتى في نومها ، كانت ترتدى بيجاما ضيقة ، تكشف تفاصيل جسمها الرياضي .

وكانت سوسن في الثامنة ، دقيقة الملامح ، وردية اللون ، سبطة الشعر ، تبدو في نومها كملاك ، قد رفع ثوبها أثناء تقلبها ، فبدا بطنها

عاريا .

وتقدم يسترق الخطا ، وتناول أطراف الغطاء المكور تحت أقدام
أحلام وسحبه في رفق فوقها ، ثم اتجه إلى نبيلة والتقط الغطاء من على
الأرض ، وغطاها وهو ينظر إلى شفتيها الدائتي الحركة ، فأشرق وجهه
وبدا على فمه مولد ابتسامة .

وذهب إلى سوسن ، ورفعها في رفق بين يديه ليعيد رأسها على
الوسادة ثم أحكم غطاءها ، وراح يمر يده على شعرها الكستنائى في حب
وحنان .

وانسحب من الغرفة ، وجذب الباب خلفه ، وقبل أن يغلقه ، وقف
برهة وقد لمعت عيناه .

واتجه إلى الغرفة المجاورة ، وفتح بابها ونظر ، فإذا بثلاثة أسرة رقد فيها
أبنائوه الثلاثة ، سامى ومراد وعاطف .

كان سامى في الرابعة عشرة ، معتزاً بشبابه ، ينام عاريا ، لا يرتدى
إلا بنطلونا قصيرا من قماش أبيض ، وكان وجهه أشبه بوجه نبيلة ،
كانت ملامحه توحى بطفولة ، ولكنه كان راضيا عن شكله كل الرضا ،
وما كان يضايقه إلا تأخر نمو شاربه !

كان مراد في الثانية عشرة ، تبدو في رقدته شقاوة ، فآثار الخبر في
أصابعه وفي خده ، وقد أدخل زرار البيجاما الأول في العروة الثانية ، ونام
في عرض السرير ، رأسه مدلى ورجلاه مرفوعتان على الحائط .

كان عاطف في الثالثة ، نام وقد وضع يده تحت خده ، وكور جسمه
فدنت ركبته من ذقنه ، كان يرتدى قميصه وبنطلونه المخمل الأحمر ،

وفردة حذاء وجوربا أبيض في رجل ، ورجله الثانية عارية !
واتجه حسين إلى عاطف ، وخلع له الحذاء والجورب ، ثم أبعد خصلة
الشعر الأصفر المتهدلة على وجهه عن عينيه ، وجذب يده من تحت خده
في رفق ، فإذا به يتقلب في فراشه ، فخشى أبوه أن يستيقظ ، فوضع
الغطاء فوقه ، وانسل من جواره في حذر وهو يتلفت .

وذهب إلى مراد ، وحمله بين يديه ، ووضع رأسه على الوسادة ، ثم
غطاه ، وقبل أن يتحرك رفس مراد الغطاء ، ودار نصف دورة ، فإذا
يرأسه يتدلى في الهواء ، وإذا برجليه ترتفعان وتستندان إلى الحائط ، عائدا
إلى وضعه الأول . فتناول الأب الغطاء وغطى به ابنه ، وهو في وضعه
ذاك ، دون أن يحاول إعادة رأسه إلى الوسادة .

ويم صوب سامى ، وسحب عليه الغطاء ، فإذا بسامى يهب من
نومه مفزوعا ، وينكمش في الزاوية البعيدة من السرير ، وقد فتح عينيه
المحمرتين من أثر النوم ، وعلا رأسه شعره الذى كان أشبه بعرف الديك ،
فبدا كأنما قد وقف من الخوف ، وراح يغمغم :

— هو .. هو .. هو . فى إيه ؟ فى إيه ؟

فقال أبوه وهو يجذبه فى رفق :

— نام .. ما فيش حاجة ..

نام سامى ، وسرعان ما أغلق عينيه ، فأسدل أبوه عليه الغطاء ،
وتحرك عاطف فى سريريه وتمطى ، فغادر الأب الغرفة هاربا .
ودخل غرفة نومه ، وفى طريقه إلى السرير مر بمرآة ، فتفرس فى وجهه
لحظة ، ومرر يده على شعره ، ثم هبط بها يتحسس التجمعات التى بدت

في صفحة وجهه ، ولاح في عينيه الأسى ، فقد مشت إليه الشيخوخة ولما يتجاوز الخامسة والأربعين !
وألقى بجسمه في السرير ، وأغمض عينيه ، ولكنه أحس حركة في الغرفة ، ففتح عينا واحدة ونظر فلمح عاطف قد أقبل ، فأغمض عينيه وتظاهر بالنوم .

وراح عاطف يتسلق السرير ، ثم أراد أن يتخطى أباه النائم ، فداس فوقه وغاصت رجله في بطنه وحسين صامت لا يتكلم ، وإن تحرك قليلا ليفسح له مكانا بينه وبين زوجته ، واندس عاطف بين والديه ، ووضع رأسه على الوسادة ، ثم وضع ساقا على أخرى وهو راقد .
وظل ساكنا لحظة ، وسرعان ما ضاق بذلك الصمت المسيطر على الغرفة ، فالتفت إلى أمه فألفاها مغمضة العينين ، فمد يده يفتح لها عينها ، فتلملت الأم في نومها وأزاحت يده بعيدا ، فلم يرتدع ، بل استمرأ فعلته ، فاعتدل في جلسته ليكون أمر فتح عيني أمه بيديه ميسورا .

وضاقت أمه بإلحاحه ، فأولته ظهرها لتبعد عينها من يديه ، فإذا به ينهض ويمطئها ، فدفعته بمرفقها فسقط على أبيه الذي تلقاه بين يديه ، وحمله ووضعه على الأرض ، وقال له :

— روح صحى نبيلة .

— ادينى قرش قبله .

— دلوقت لما اصحى .

— ما انت صاحى أهو . ادينى قرش بقى .

ونفض حسين واتجه إلى حيث علق ثيابه ليعطيه قرشا ، ويريح رأسه ،
كان واثقا من أن عاطف لن يكف عن طلبه حتى يأخذ ما يريد .

ومدت زينب يدها إلى هالة لتحسسها ، وهى مغمضة العينين حتى
لا يفر النوم منهما ، وراحت يدها تتجول على جسمها ، حتى إذا بلغت
نهاية ظهرها ، تقلص وجهها تقززا ، وفتحت عينيها وأزاحت الغطاء
عنها ، ونهضت لتحمل ابنتها وتغادر الغرفة .

وأخذ عاطف القرش ونظر إليه مليا ، ثم أعاده إلى أبيه وهو يقول :
— لأ ما اخدش ده ، عايز قرش مخروق .

وكانت الأم قد دنت منهما وهى تحمل هالة بين يديها .
فقال لزوجها :

— إيه الدلع ده ؟ ما حد ح يتلف أمله غيرك .

فقال حسين لابنه فى زجر :

— ما فيش غير ده .

فراح عاطف يصيح فى بكاء :

— أنا مالى عايز قرش مخروق .. عايز قرش مخروق .

وكانت زينب قد غادرت الغرفة ، فإذا بها تصيح من الحمام :

— عندك قرش مخروق تحت المخلدة .

فابتسم حسين وقال :

— حنينا !

وأخذ عاطف القرش وذهب إلى حيث يرقد إخوته ، واقترب من

مراد وقال له وهو يمد يده بالقرش :

— خد .. ادينى حاجه ..

فتح مراد عينيه فرأى القرش ، فرفع رأسه المتدلى وأنزل رجله من على الحائط ، ونهض مسرعا ، وقبل أن يغادر فراشه كان قد التقط القرش بين أصابعه . وغادر الغرفة وعاطف في أثره ، واتجه إلى صوان صغير في الردهة ، وفتحه وأخرج منه صندوقا من الورق .

بدأت الحركة تدب في الشقة ، فقد استيقظت نبيلة ووقفت على باب غرفتها ، واستيقظ سامى وظهر عند باب غرفته وقد وضع فوطه فوق كتفيه ، ولحته نبيلة فانطلقت مسرعة على أطراف أصابعها كراقصة الباليه لتبلغ دورة المياه قبله ، فقال لها سامى في غيظ :
— آدى الى انت فالحه فيه .

فقال له .

— أحسن منك ، مش فالخ فى حاجه أبدا .

وارتفع صوت الأم من الحمام :

— اصطبحننا !

فقال سامى فى عناد :

— تعالى شوفى صابحه ترقص ازاي !

وارتفع صوت نبيلة من بعيد :

— باقول لك ما لكش دعوه بيه .

وإذا بصوت الأم يدوى :

— وبعدين معاكرو .

وصمت سامى ونبيلة ، وصاح عاطف وهو يعيد قطعة السمسمية

إلى مراد :

— مش عايز دى .. أنا أنقى ..

وقدم مراد الصندوق إلى عاطف ، وهو يقول :

— خد اللى انت عايزه .

ومد عاطف يده ينتقى ما يريد ، وقال سامى وهو يضم الفوطة إلى

صدره :

— مش ح تبطل التجارة دى يا مراد ؟

فقال له مراد بصوته الخارج من كل حنجرتة ، وقد نفرت عروق

رقبته :

— وانت مالك .

وخرجت سوسن من غرفة أبيها وفي يدها قرش ، واتجهت إلى مراد

تشتري منه قطعة حلوى ، فقال سامى :

— الهف فلوس العيال .

فصاح مراد :

— يا ماما حوشى سامى ..

فصاح سامى :

— يا ماما ح يعنى الأولاد بيعيب حلاوة زى الزفت .

— مش أحسن م الحلاوة اللى بتحبها ؟

فقال سامى وهو يحاول أن يأخذ الحلاوة من يد سوسن :

— دى وساخه ..

فقالت له سوسن وهو تبعد يدها عنه :

— وانت مالك ؟

والتفت سامى إلى مراد وقال :

— فيه خمسة صاغ تكسب خمسة وعشرين قرش ؟. دا نصب .

وارتفع صوت الأم :

— ما بس بقى يا سامى .. لازم تسمعوا حسنا للجيران ع الصبح ؟

واستمر سامى فى هجومه :

— ح يعمل إيه بالفلوس دى كلها ؟ أهو بكره يركب بيها عجل

ويقطع هدومه .

وهتفت الأم فى ضيق :

— ما تقوم لولادك ذول .. دى حاجه تقصر العمر .

وخرج الأب من غرفته ، وقال فى هدوء :

— ما بس بقى . يالآ البس انت وهو مافيش وقت .

وسار سامى إلى دورة المياه ، وسرعان ما ترددت أصوات طرقاته على

الباب ، وذهب عاطف إلى الصوان يعبث فى محتوياته ، وخلع مراد

جاكتة البجاما وألقاها على الأريكة الموضوعة فى الردهة ، وراح يخلع

بنطلونها وهو فى سيره ، ثم ألقاه على كرسى وغاب فى غرفته قليلا ، ثم عاد

يصيح :

— مش لاقى فردة الجزمة .

وراح مراد يزحف على الأرض وينظر تحت المقاعد منقبا عن حذائه ،

ودخلت سوسن غرفة أمها وقالت :

— مش لاقيه المشط .

وصاح مراد :

— المشط أهه تحت الكنبه ، أمال الجزمة فين ؟

فقالت سوسن :

— شفتها ع الترايبزه فى الأوضه المفروشه .

وأقبلت نبيلة على أطراف أصابعها ، ومرت فى حركة راقصة بعاطف دون أن تلتفت إليه ، ثم انسلت إلى غرفتها كالطيف وقد بدأت فى شلح جاكته البيجاما .

وخرجت سوسن إلى حيث كان مراد ، وأنخذت المشط الذى أخرجه من تحت الأريكة ووضعتة فوقها ، وراحت تمشط شعرها وهى فى طريقها إلى المرأة ، ومرت بعاطف ، ورأت ما يفعله ، فانطلقت إلى أمها مسرعة ، وهى تصيح :

— ماما .. ماما .. الحقى عاطف .

— ماله ؟!

— بدر عليه الخيط .

فأسرعت الأم إليه فإذا بخيوط حمراء وصفراء وسوداء قد التفت على يده ، وامتدت منها إلى البكر المبعثر على الأرض ، فضربتة على ظهره ، وهى تقول :

— هو انتو قرود !

وراحت تلتقط البكر وتلف كل خيط على بكرته .

وقامت أحلام من نومها تتمطى ، ولحتها نبيلة فى المرأة وهى ترتدى ثياب المدرسة وتصفف شعرها ، فوجدت الفرصة سانحة لتتحدث ،

فاندفعت تحدثها عن المدرسة والمدرسات والمدرسين ، وكانت تتكلم بحاجبيها وعينيها ويديها ، وتطول وتقصّر وتمثل ، وتلفتت أحلام في الغرفة فألفت ثياب نبيلة المنزلية مبعثرة هنا وهناك ، فقالت وهى تنهض :
— ما تعلقى هدومك .

فتلفتت نبيلة في الغرفة ، ثم قالت وهى تسرع بالهرب :
— اتأخرت قوى ..

فقالت أحلام وهى تلتقط بنطلون بيجامة نبيلة من الأرض .
— طول عمرك زواغه .

وذهبت نبيلة إلى حيث كان أبوها ، وقالت له :
— عايزه خمسة وعشرين قرش .

— ليه كمان ؟

— ح نروح رحله لسقاره .

وبلغ ذلك الحديث مسامع سامى ، فخرج من غرفته مسرعا ، وهو يرتدى القميص ويدس رجله فى البنطلون ، وصاح :
— ما تديهاش يا بابا .

فالتفتت إليه نبيلة فى غضب ، وقالت له مزجرة :
— وانت إيش حشرك ؟

ولم يأبه لا اعتراضها ، بل استمر فى وسوسته :
— عايزه تجرى على حل شعرها مع البنات المايعة .
وقالت نبيلة فى صوت نختته العبرات :

— عاجبك يا بابا قلة الأدب دى ؟

واستمر سامى فى هجومه :

— لو سمعت كل واحد فىهم وهى بتطق الضحكه ..

وصاحت الأم فى حدة :

— وبعدين معاكو ؟! دا ما بقاش بيت .. دى سراية مجانين .

ولم يزدجر سامى ، بل ازداد عنادا ، ورأى أبوه أن يهاجمه حتى يسكت ، فمد يده إلى الكرافة التى فى عنقه وقال وهو يعثر فيها :

— هونت مش ح تحلى لى حاجه ألبسها أبدا ؟! الشرابات وقطعتهم ،

والمناديل وضيعتهم ، ح تندار ع الكرافات ؟

فقال سامى فى هدوء :

— ما عنديش كرفات .. هات خمسين قرش اشترى كرفاته .

فصاح أبوه فى وجهه ليبعده ، حتى لا يلح فى طلب النقود :

— طب غور من وشى .

وانسحب سامى فى هدوء ، وهو يسوى الكرافات ، ودنت سوسن

من أبيها ترقبه ، فلما رأته يمد يده فى جيبه ويعطى نبيلة خمسة وعشرين

قرشا تشجعت وقالت :

— وأنا عايزه عشرة صاغ .

— علشان إيه ؟

— أشتري مسطره وكراسه وعلبة ألوان .

فصاحت الأم وهى تضع الحلمة المطاط فى فم هالة :

— هو كل يوم علبة ألوان ! فىن العلبة اللى جبتها أول امبارح ؟

— كسر ها عاطف .

(أم العروسة)

فقال الأب في هدوء :

— العصر أجيب لك الكراسية والمسطرة وعلبة الألوان .

فقالت في بكاء تمثيلي :

— وأنا مالى .. عندنا رسم أول حصه . الأبله تضربنى .

وناوها الأب عشرة قروش ، ورأى مراد سهولة دفع النقود فأقبل

وهو يصيح من حنجرتة :

— وأنا عايز فلوس المجموعة ، الأستاذ طلبها امبارح قلت له بكره .

فقال الأب :

— والنهارده قل له بكره .

فقال مراد وهو يلوح بيده في ضيق :

— إيه ده ؟

ونظرت أمه إلى حذائه الأصفر الذى ذهب لونه ، وقالت له :

— دى جزمه تخرج بيها ؟

— ما قلت لكم عايز جزمه ما رضيتوش .

فقالت له الأم في ضيق :

— حرام عليك دى ما بقلهاش شهر ، روح امسحها .

— ما فيش ورنيش .

— والعلبه اللي اشتريتها امبارح ؟

— خلصت .

ولم ينتظر في الغرفة ، بل انسحب يائسا ، ونظرت الأم خلال الباب ، فلمحت أحلام تلتقط ملابس إختوتها المبعثرة في الردهة ، وتعيد

تنسيق الأثاث فنادت :

— أحلام ، املى القليل واعملى الشاى .

وأقبلت نبيلة من غرفتها ، وقد وضعت حافظة كتبها على عجزها ،
وأسندتها بذراعها ، ودنت من أحلام وقالت لها :

— اشتغلى ما دام قعدتى فى البيت .

فالتفتت إليها أحلام وقالت :

— بكره تقعدى فى البيت انت رخره .

فقالت نبيلة فى تمثيل ، وهى تسير فى خطوات راقصة :

— لا .. دا مستحيل .. أنا ح ادخل الجامعه .

وخرج سامى من غرفته وقد أتم ارتداء ملابسه ، فقال وقد اتخذ هيئة
رجل :

— دا بعدك .

فصاحت نبيلة :

— يا ماما . خلى الشيخ أبو العيون ده يسكت .

فقالت الأم :

— هو لولا العربيه اللى بتيجى تاخذك من باب البيت وتجييك لباب

البيت كنت وديتك المدرسه ؟

وقال الأب لينهى هذه المناقشة قبل أن تستخدم :

— آمال عاطف فين ؟

فقالت سوسن :

— نزل الشارع .

فقلت لها الأم :

— انزلى هاتيه .

— أنا اتأخرت ، راحة المدرسه .

— ماتنزليش قبل ماتفطرى .. عندك جنبه رومى فى التلميه ، اعملى

يانيبيله لأختك سندويتش .

وتحركت نبيلة إلى المطبخ تتبعها سوسن ، وسرعان ما لحق بهما سامى
ومراد، وامتدت الأيدى إلى وعاء الخبز، ثم امتدت فى تسابق إلى الصحيفة التى
وضع فيها الجبن، فكأنما جراد نزل بحقل ولم يغادره إلا بعد أن أصبح يبابا قفرا!
وارتفع صوت بوق سيارة ، فصاحت نبيلة وهى تجرى :

— عرييتى .

وراح سامى ومراد وسوسن ينسلون من المطبخ فى طريقهم إلى الباب
الخارجى ، وصاحت سوسن قبل أن تخرج :

— ماما .. الحقى ، خلصوا الجبنه .

فأسرعت الأم إلى المطبخ وهى تقول :

— ييقى جنان .. وانا لسه مشتريها امبارح .

ونظرت فوق بصرها على آثار المعركة ، فتات من الخبز تناثرت على
المنضدة القريبة من التلمية ، وصحفة خالية وورقة كانت الدليل الوحيد
عن أنه كان ملفوفا بها شئ دسم ، وضربت كفا بكف وعادت إلى حيث
كان زوجها وقالت :

— خلصوا الجبنه .

فقال فى هدوء :

— خليمهم ياكلوا .

فقالت فى استنكار .

— ياكلوا ! مش ناقص إلا ياكلونا .

وكان الزوج قد أتم ارتداء ملابسه ، فنظر فى ساعته وتحرك خارجا من
الغرفة ، فصاحت الأم :

— أحلام ! هاتى الشاى لبابا واقللى له بيضتين يفطر .

فقال الأب وهو سائر وزوجته خلفه :

— وانتو مش ح تفطروا ؟

— لسه بدرى . لما نخلص مرار الشقه .

وجلس على الأريكة الموضوعة فى الردهة ، وأسرعت الزوجة
ووضعت أمامه منضدة صغيرة .

وجاءت أحلام تحمل كوبا من الشاى ، وجلست الزوجة بالقرب

من زوجها ، وقالت :

— ح تنغدوا إيه النهارده ؟

— أى حاجه .

وبدأ يرتشف الشاى ، فقالت :

— ما تدوخوناش .. شوفوا تاكلوا إيه ؟

وارتفع صوت أحلام من المطبخ :

— فاصوليا بيضه .

فقالت الأم فى استنكار :

— ما احنا لسه طبخينا أول امبارح .

فقال الأب :

— اعملوا صينية بطاطس .

فقالت الزوجة معترضة :

— هو ما فيش إلا الفاصوليا والبطاطس ؟

فقال الزوج :

— اطبخى الى على نفسك .

— لا ماتحIRONيش .. قولوا تاكلوا إيه ؟

وأقبلت أحلام تحمل صينية صغيرة ، عليها رغيف وصحفة من
الألمونيوم قلى فيها بيضتان ، وغطاء علبة بلاستيك وضع فيه الملح ، وطبق
فنجان شأى فيه قطعة صغيرة من الجبن الأبيض ، ووضعت الصينية أمام
أبيها .

ومد الأب يده إلى الرغيف ، وإذا بصوت ارتطام حذاء صغير بالبواب
الخارجى يتتابع ، فقالت الأم لأحلام :
— إفتحى .. عاطف طلع .

وأسزعت أحلام إلى الباب وفتحته ، فدخل عاطف ، وجرى إلى
حيث كان أبوه ، ونظر فى الصينية وقال :
— بتاكل إيه ؟

— بيض .. تعالى كل .

فقال عاطف وهو يهز أكتافه :

— لأ .. أنا عايز بيضه صحيحه لوحدى .

فقالت الأم لابنتها :

— عندك بيض ؟

— أبدا .

فالتفتت إلى عاطف وقالت له :

— اطلع شوف بيضه عند الفراخ .

وتحرك عاطف ، وقالت له أحلام :

— وإذا ما لقيتش بيضه ، استنى فوق لما الفرخه تبيض .

فقالت الأم في حنان :

— ليه كده يا بنتى .. دى الشمس تقوره .

— لسه الشمس ما جتش فى السطح ، خلىنا نستريح شويه .

وبكت هالة ، فأسرعت الأم إلى حيث ترقد وهى تقول :

— والله ما ح نستريح أبدا .

ودخل عاطف المطبخ ، وأخذ كرسى مطبخ صغير ، وحمله على

كتفه ، ثم سار منطلقا نحو السطح .

كانت عشة الدجاج مصنوعة من سلك وخشب قابعة فى ركن

من السطح ، فذهب مهرولا إليها ، ونظر من خلال السلك ، وأدار

عينيه فى العشة ، فلم يجد بيضا ، فوضع كرسى المطبخ بالقرب من

العشة ، وجلس وقد أسند خده بكفه ، ينتظر أن تجود عليه دجاجة

بيضة !

وانتهى الأب من تناول الإفطار ، وتأهب للخروج ، وإذا

بزوجته تقترب منه ، وقد حملت هالة على ذراعها ، وتقول

له :

— ما قلتش ح تتغدوا إيه النهارده .

وأسرع هاربا وهو يقول :

— أى حاجه .

وأغلق الباب الخارجى خلفه ، فقالت الزوجة فى ضيق :

— والله بطننا دى محيرانا .

الفصل الثانى

أخذت الشمس فى الارتفاع ، وأرسلت أشعتها الحامية ، وعاطف جالس على كرسى المطبخ بالقرب من عشة الدجاج ، يتململ فى جلسته ، ويجفف عرقه بيده ، دون أن يتطرق اليأس إلى قلبه .

وارتفع صياح دجاجة ، فإذا بعاطف يقوم مسرورا ، ويذهب إلى العشة ينظر من خلال السلك ، فيرى الدجاجة تبيض ، وراح يغدو ويروح أمام العشة فى قلق الوالد الذى ينتظر وليده الأول !

وراح صوت الدجاجة يخفت ، فتيقن من أن البيضة تم وضعها ، اكتسب خبرة من ممارسته الانتظار الطويل بالقرب من العشة ..

وفتح باب العشة ، ودخل فإذا بالدجاج يفر منه مذعورا ، وإذا بصيحات الفزع ترتفع متتابعة ، فلم يلتفت إلى ما يجرى حوله ، بل سار إلى هدفه والتقط البيضة وخرج .

وهبط فى الدرج مسرعا ، حتى إذا وصل إلى باب الشقة ، أخذ يركله بقدمه ، فأسرعت أمه تفتح له الباب وفى يدها مغرفة بها أثر اللبن .

ونظرت إليه فألفت الدم يكاد يفر من وجهه . فمالت تضمه إلى

صدرها بيدها الخالية وتقول فى حنان:

— يا حبيبى ! كنت فى السطح فى النغره دى ؟

فقال فى فرح وهو يرفع يده بالبيضة :

— جيت بيضه .

— طب روح لأحلام تسلقها لك .

وأسرع إلى المطبخ ، وعادت إلى حيث كانت ، راحت تغرف من حلة نحاس لبنا تضعه في أوعية بلورية ، وعاد عاطف إليها ورفع رأسه وسأل :

— بتعملي إيه يا ماما ؟

— مهلبية .

ولم ينتظر طويلا ، بل سحب كرسيها ، ووضعها بالقرب من « البوفيه » الذى صفت فوقه أوعية البلور ، وراح يتسلقه ، فقالت له أمه فى زجر :

— ابعد .. الحلة تقع عليك .

— أشوف .

ووقف فوق الكرسي ينظر ، ولم يطق صبرا ، فمد يده يحاول أن يأخذ المغرفة من أمه ، فقالت :

— عايز إيه بس ؟

— هاتى اغرف انا .

فصاحت الأم :

— أحلام . تعالى خدى أخوكى ادى له البيضة بتاعته .

وأقبلت أحلام ، ترتدى ثوبا بسيطا ، فوقه « فوطة » من البلاستيك ، ويقطر الماء من يديها ، وأرادت أن تجفف يديها فى « الفوطة » ، ولكنها أخفقت فما كان البلاستيك ليمتص الماء ، فجففتها

في طرف ثوبها ، ثم لفت ذراعها حول وسطه ، وحملته بين ذراعيها وعجزها ، وسارت به وهو يهز رجله سرورا .
انطلقت به إلى المطبخ ، ووضعت على كرسي أمام المنضدة ، وأحضرت له البيضة ، وهمت بتقشيرها ، وإذا به يمد يده ويأخذها منها ويقول :

— أنا اللي أقشرها .

وراح يقشرها ويرمي بالقشر على الأرض ، وأحلام غافلة عنه ، فقد تحركت تحضر له كسرة خبز ، وعادت بالكسرة ، ورأت القشر على الأرض ، فقالت في زجر :

— وبعدين معاك .. هو احنا مش ح ننصف أبدا !

ووضعت كسرة الخبز أمامه ، وانخت تلتقط القشرة من الأرض .
ولاحظت تساقط فتات صفار البيضة ، فرفعت رأسها تنظر إليه ، فألفت عاطفا قد وضع البيضة كلها في فمه ، وأخفق حلقومه في ابتلاعها !

وأسرعت تملأ كوب ماء ، ثم عادت إليه مهرولة وهي تقول :

— اشرب .. ح تموت نفسك .

وشرب ، واختلط الماء بصفار البيضة في الكوب ، فقالت أحلام في

تقرز :

— أنا عارفه إيه القرف ده ؟!

فقالت أمها وهي عائدة إلى المطبخ تحمل الحلة الفارغة والمغرفة :

— آهو كلكم اتريبتوا بالمرار ده ..

و غادر عاطف المطبخ ، وذهب إلى الكرسي الذى وضعه بالقرب من « البوفيه » وتسلقه ، وراح ينظر فوجد أن أمه قد وضعت زيبيا وفتقا على سطح المهلبية ، فأخذ يلتقط الزبيب والفتق ويلقى بهما فى فمه ، ولم يكتف بذلك بل راح يعبث بأصبعه فى المهلبية .

وجاءت أمه ، ورأت فعلته فحملته بين ذراعيها فى غضب ، ووضعتة على الأرض فى شدة ، وهى تصيح فيه :

— غور من وشى قبل ما اقطم رقبتك .

وراحت تصلح- ما أفسد ، وسرعان ما تجاوب رنين الجرس ، فهرعت إلى الباب وفتحته ، فإذا بسوسن قد عادت من مدرستها ، فقالت لها أمها زاجرة :

— مش ح تبطلى تحطى صباeck ع الجرس على طول ، والله لو صحيت هالة ما حد ح يشيلها غيرك .

فحركت كتفها فى عدم اكتراث ، واتجهت إلى غرفتها لتبدل ثيابها . وفيما هى فى سيرها لحت عاطفا يعبث فى « التواليت » فعادت إلى أمها مهرولة وهى تصيح :

— ماما .. ماما .. الحقى عاطف دلئ البودرة ، وحط الفيزلين فى رأسه .

— أبعديه .

— مش عايز .

وأسرعت الأم إلى عاطف ، تبعده عن التواليت ، وتجمع البودرة المندلقة ، فإذا بهالة تستيقظ ، وتبدأ فى البكاء ، فقالت الأم :

— سوسن .. سكتى أختك .

فذهبت سوسن إلى هالة وحملتها ، ورفعت الأم عاطف بين يديها ،
وذهبت به إلى الحمام ، ولحت سوسن فيلا من الجلد على ظهر الصوان ،
فخطر لها أن تحضره لتلاعب أختها به ، فوضعت هالة على حافة السرير ،
وجاءت بكرسى ووضعت به بجوار الصوان ، ووقفت فوقه ولكنها لم تصل
إلى الفيل ، فجاءت بصفيحة بها « قراقيش » وبسكوت ووضعتها فوق
الكرسى وتسلفت حافة الكرسي في حذر ، وهمت بالوقوف فوق
الصفحة ، فإذا بها تسقط على الأرض ، وقد أحدثت دويا ، وتناثر
البسكوت والقراقيش ، ففزعت سوسن ، وهولت فرارا من أمها إلى
السطح . وتركت الأم عاطفا ، وأسرعت ترى ماذا جرى ، وهى
تصيح :

— يا شياطين .. يا ملاعين .. يا قروود .

وصاح عاطف من الحمام فى بكاء :

— الصابون بيحرقنى فى عينيه .

فنادت الأم وهى فى عودتها إليه :

— أحلام .. تعالى لى القراقيش والبسكوت .

وقالت أحلام فى صوت عال :

— ولما الحلـه إلى ع النار تشيط !

وذهبت إلى الحمام ، وراحت تغسل لعاطف وجهه ويديه وإذا بهالة

تضج بالبكاء فارفع صوت الأم :

— بس .. بس .. أنا جايه أهو .. أنا عارفة يا رب ليه دوختنى ..

وذهبت إلى هالة وحملتها ، ثم راحت تجمع ما انتثر من البسكويت والقرacيش ، وجاء عاطف خلفها ، فقالت له :
— لم معايا .

فانحنى عاطف ، والتقط بسكويتة ووضعها في فمه ، فقالت له في حنان :

— باقول لك حط البسكويت في الصحيفة مش في بطنك .
وتهللت أسارير عاطف ، وعكف على التقاط ما انتثر ووضعها في الصحيفة .

وأطمأنت سوسن إلى أن ثورة أمها قد سحمت ، فعادت إلى المطبخ ، وراحت تعبت بالقرب من النار ، فقالت لها أحلام :
— ابعدي قبل النار ما تمسك في شعرك .

فتأخرت خطوات ، وما لبثت أن تقدمت إلى النار ، وفي يدها عود من قش المقشة تدنيه منها ، فصاحت أحلام بها :
— اخرجى من هنا .

وخرجت سوسن مطأطئة الرأس ، وجلست على الأريكة ، ولم تطق الصمت طويلا ، فتلفتت فوق بصرها على المقص ، فتناولته وأحضرت صحيفة ، وراحت تقصها « عرائس » وما انقضى طويل وقت حتى كان المكان قد غطى كله بقصاصات الورق .

وخرجت الأم من غرفتها تحمل هالة ، ويسير خلفها عاطف وقد أمسك بملابسها ، فرأت قصاصات الورق تغطي الأرض ، فصاحت :
— يا مقصوفة الرقبه ، والله لانا عدماكى .

فتركت سوسن المقص، وأطلقت ساقها للريح، وراحت تعدو نحو السطح، وأخذت الأم تجمع القصاصات، ولمح عاطف المقص فتناوله، وحاول قص غطاء الأريكة، ولحته أمه، فأسرعت تنتزع منه المقص وهى تصيح :

— هو انتو عفاريت، اخلصى يا أحلام، وخدى هاله شويه .

— ح انزل الحلله وجايه .

وجاءت أحلام وحملت هالة، وذهبت الأم تلقى قصاصات الورق ثم عادت وقالت لأحلام :

— خدى اخواتك فى أودتكم لما أريج شويه .

وأخذت أحلام هالة وعاطف، وذهبت إلى حجرتها بينما تمددت الأم على الأريكة، ولفت ذراعها فوق وجهها، وما كادت تنعم بالاسترخاء حتى أقبلت سوسن صائحة :

— ماما .. ماما .. الحقى مراد بيتخانق مع ثلاث اولاد .. ح يموت

فى إيديهم .

وهبت الأم من رقتها، وخفت إلى الشرفة فإذا بها ترى ابنها بين ثلاثة أولاد، قد ضربوا حوله نطاقا، إذا دفع أحدهم ليشق طريقه بينهم، دفعوه الثلاثة مرة واحدة، فيختل توازنه ويترنح، فلم تطق صبرا بل صاحت فى الأولاد :

— ما تسبيه يا واد انت وهو .

فقال أحدهم وهو يرفع رأسه إليها :

— خليه يدينا البرايه بتاعتنا .

- ما تديهم البرايه يا مراد .
فقال مراد متشجعا لما سمع صوت أمه :
— مش ح اديها لهم إلا لما يدوني المسطره والقلم الرصاص .
ولحت سامى مقبلا ، فهتفت :
— سامى . هات اخوك واطلع .
ودنا سامى منهم ، فقال له مراد :
— واخدين منى المسطره والقلم .
فقال الثلاثة معا :
— وهو واخذ مننا البرايه .
فقال سامى :
— هات البرايه .. هاتوا القلم والمسطره .
وناولهم المبراة ، وأخذ منهم المسطرة والقلم ، ودفع أخاه أمامه وهو
يقول له :
— ياللا يا خايب .
فصاح فيه مراد :
— إيه .. ما لكش دعوه بيه .
وقالت الأم لهما من الشرفة :
— اطلع انت وهو ، واللا عايزين تفرجوا الناس علينا !
وعادت إلى الأريكة ، وتمددت فيها ، وداعب الوسن عينيها ،
واستشعرت طعم الراحة ، وإذا بأصوات مراد وسامى وسوسن تمتزج
وتصلك أذنيها صكا فتصيح دون أن تفتح عينيها :

— ما بس بقى .. هو ما فيش فى البيت ده راحه ؟
واستأنفت نومها ، ولكن سرعان ما أقبلت سوسن ، تقول :
— ماما .. ماما .. آكل .

ودفعتها بيدها لتبعدها عنها ، وإذا بعاطف يقبل هاتفا :
— ماما .. جعنا .

فنادت الأم :

— أحلام ، تعالى أكلى اخواتك .

وأقبلت أحلام ، ودفعت بهالة إلى مراد ، وانسلت الأم إلى غرفة
نومها ، وارتمت فى سريرها .

ووضعت أحلام لعاطف قليلا من الأرز فى صحيفة صغيرة ، ورشت
فوقه ملوخية ، وأرادت أن تطعمه ، ولكنه أصر على أن يأكل وحده ،
فتناول الملعقة وجعل يعبث فى الأرز ، وطلبت سوسن أن يغرف لها
الأرز وحده ، والملوخية وحدها ، ثم قالت :

— وحطى لى حنة لحمه سمينه .

فقال أحلام فى زجر :

— وطى صوتك بلاش قلة أدب .

ونظرت سوسن إليها فى دهش ، فما كانت تدري ما الخطأ الذى
ارتكبته . وتناثر الأرز على صدر عاطف ، وعلى المنضدة ، وعلى
الأرض ، ولما امتلأ راح يقرع الصحيفة بالملعقة .
ونادت أحلام :

— مراد .. سامى .. أغرف لكم ؟

(أم العروسة)

فقلا معا :

— لأ .. لما ييجى بابا .

والتفت سامى إلى مراد وقال له :

— ح تاكل معانا بإيديك الزفت دى ؟. روح اغسلهم .

— طب خد هاله .

— وانا مالى .

فوضع مراد هالة على الأريكة ، وذهب يغسل يديه ويحاول أن يزيل
الحبر منهما دون جدوى ! وارتفع بكاء هالة ، فتململت الأم فى رقتها ،
وخرجت أحلام من المطبخ تحمل عاطفا وقد تلوث وجهه وثيابه
بالملوخية ، وقالت لسامى ، الذى خلع ثيابه ووقف بفانلة سبور
وينظلون البيجاما :

— سكت هاله .

— وانا مالى .

— طب خد عاطف شطفه .

— آمال انتم بتعملوا إيه فى البيت ؟

— طب اسكت بلاش غلبه .

وارتفع صوت مراد وهو يغسل يديه مشتركا فى الحديث :

— كفايه عليه يعمل ريس فى البيت .

وصاحت الأم من غرفتها :

— والله يا سامى إن ما شلت أختك لقايمة ومخلية نهارك زى وشك .

وخرجت سوسن من المطبخ ، وحملت هالة ، فصاحت أحلام فيها :

— بتشيليلها بإيديكى الوسخه !
فوضعها سوسن على الأريكة ثانية وهى تقول :
— أنا مالى . الحق على .

كان مراد قد يئس من تنظيف يديه ، فمسحهما تحت إبطيه وأسرع
يحمل هالة .

وسارت أحلام إلى الحوض ، وهى تبعد وجهها عن يدي عاطف ،
فقد كان يحاول أن يعبث بشعرها بيديه الملوئين بالموخية .
ورن جرس الباب الخارجى ، فذهب سامى إليه فى تودة وفتحه
فاندفعت نبيلة داخلة ، وهى تطوح حافظة كتبها فى يدها ، وراحت
تتحدث :

— يا سلام لو شفتهم اللى عملناه النهارده فى أبو الأسود الدؤلى ، دخل
الفصل وقال لنا : « العواف » قلنا له : « الله يعافيك يا افندى » قال :
« درس النهارده فى المفعول لأجله » قلنا له : « ما تحكى لنا الروايه اللى
شفتها فى السينما امبارح أحسن يا افندى » قال : « إيش عرفكم انى كنت
فى السينما ؟ » قلنا له : « أمانى شافتك يا افندى ، وبالأماره كنت قاعد
قدام خالص يا افندى » قام قال : « أنا باقعد قدام علشان نظرى
ضعيف » قلنا له : « بقى مش علشان آخر الشهر يا افندى » ؟
وكانت نبيلة قد وصلت إلى باب غرفتها ، فقال لها سامى :

— ما كفايه بقى ، اقفلى الراديو ده .

فالتفت إليه نبيلة وقالت فى حركة تمثيلية :

— وانت مالك يا بايخ ! هو انا باحكى لك ؟

— آمال بتحكى لين ؟

— باحكى لأحلام .

ورن جرس الباب الخارجى ، فصاحت سوسن وهى تهوّل نحو الباب :

— بابا جه .

وتخلص عاطف من يدى أحلام وراح يجرى خلف سوسن ، وهو يصيح :

— أنا الى افتح له .

واستبقا إلى الباب ، وفتحته سوسن قبله ، فراح عاطف يسبها :

— يا قليلة الأدب .. يا سافله .

وقبل أن يستمر فى سبابه ، لمح أباه يحمل كيسا ، فأسرع إليه وقال له :

— إيه إلى معاك ده ؟

— حاجه حلوه .

— طب ورينى .

— لما ادخل .

— طب هات اشيلها .

فقالت سوسن :

— لأ أنا الى اشيلها .

وأسرع سامى ومراد وهو يحمل هالة ليريا ما الذى أحضره أبوهما .
ودخل الأب إلى غرفته ، وأبناؤه خلفه حتى أحلام ونبيلة لحقتا به ،

واعتدلت الأم في السرير ، وقالت :

— إيه ده ؟

فقال الأب في نشوة :

— تفاح .

فقالت الأم وهي تغادر الفراش ، وتمد يدها إلى الكيس لتستولى

عليه :

— ما لوش لازمه النهارده . عندنا مهليه .

فصاح عاطف وسوسن ومراد وسامى :

— احنا مالنا عايزين تفاح .. تفاح .

وقالت الأم في استسلام :

— أحلام هاتى السكينة .

وذهبت أحلام وعادت بالسكينة ، وأخذت الأم تشق كل تفاحة

نصفين ، وتدفع إلى كل من أبنائها نصف تفاحة ، فغضب عاطف

وقال :

— ما اخدش نص ، أنا عايز تفاحة بحالها .

فصاحت الأم في غضب :

— ما فيش الا كده .

وغضب عاطف وخرج من الغرفة يبكى وأبوه يتبعه بعينه في أسى ،

كان يريد أن يدخل البهجة على قلوب أبنائه ، فإذا به لا يجلب معه إلا

النكد .

وأخذ كل منهم نصف تفاحته وهو صامت ، وإن كانت وجوههم

تنطق بعدم الرضا ، وقالت الأم :

— خلوه لبعد ما تاكلوا حلوا بيه .

ولكن مراد وضع نصف التفاحة في فمه ، وراح يلوكلها ، وقالت
الأم :

— أحلام .. نبيلة وضبو السفرة .

وخرجت أحلام ونبيلة يتبعهما سامي ومراد ، وجاء عاطف يتمسح
ثم قال وهو يمد يده :

— طب هاتي .

ودفعت إليه نصف تفاحته ، وهي تربت على كتفه ، فقال لها :

— مش أنا حلو بقى ؟

فقالت في حنان :

— قمر .

وراح الأب يخلع ثيابه ، ودنت منه وقالت له :

— يا راجل اعقل . بلاش تبذير .

فقال في هدوء :

— دى الحكاياه كلها وقه .

— اوعى لنفسك . طالع لك بنات ، ح يعوزوا تقلهم .

— ربنا هو اللي بيرزق .

— والله ما أنا عارفه لو واحد فيهم اتخطبت ح تعمل فيها إيه ؟

— يبقى وقتها يعين الله .

— أنا عارفه ما بيعجبكش كلامي . كل واحد ما بيعجبوش الا

عقله ، قال على رأى المثل .

وصممت الأم وتحركت لتغادر الغرفة ، فقال الأب وهو يرتدى
جاكته بيجامته التى تختلف فى لونها عن البنطلون :

— ما تكلمى المثل : لو جابوا للمجنون ألف عقل على عقله ما
يعجبوش الا عقله .

فقالت وهى تخرج :

— أنا ما قلتش انت اللى قلت .

وارتفع صوت أحلام :

— اتفضلوا الأكل جهز .

ونادى مراد :

— سوسن تعالى خدى هاله خلىنى آكل .

وأقبلت سوسن وحملت هالة ، وإذا بعاطف يقبل ويجذب سوسن من
ثوبها :

— هاتيها أنا اللى ح أشيلها .

وصاحت سوسن :

— ماما .. ماما .. الحقى .. عاطف ح يوقع هاله .

وقالت الأم :

— ادخلوا أودتكم ولعبوها سوا .

وجلس الأب والأم وأحلام ونبيلة وسامى ومراد حول المائدة ،
وامتدت الأيدى فى تؤدة ، ثم أخذت سرعتها فى الازدياد ، فبدأ أنها كانت
فى سباق ، وإن هى إلا لحظات حتى كانت الصحاف نظيفة كأنما قد

غسلت .

ونهبوا يتسابقون إلى الحوض، غسلت نبيلة يديها ومراد وسامى خلفها
يترقبان ، ودلفت إلى غرفتها ، فصاح سامى :
— أيوه زوجى .

— وانت مالك ؟

وبلغ ذلك الحوار مسامع الأم ، فنادت :
— نبيلة ، تعالى اغسل الأطباق دول ، أختك اتهد حيلها م الصبح .
فقالت نبيلة وهى تختفى فى حجرتها :
— يا ماما ورايا مذاكره كثير .

وراحت أحلام تحمل الصحف الفارغة إلى المطبخ ، والأم تهذر :
— إيه الكلام الفارغ ده ، خشى نامى وسيبى الخدامين يخدموكى ،
طب والله العظيم ما ح تغسل أحلام الأطباق دى ، ولو دودوا ، دا ظلم
دا كفر .

ونهب الزوج ، ودخل إلى المطبخ ، وشم عن أكمامه ، وراح يغسل
الصحف ليحسم الموقف ويريح رأسه !

ودخل كل إلى غرفته ليستريح بعد الغداء ، ودخل الزوجان
حجرتهما ، وأغلقا بابها وتمددا فى الفراش ، وأسلمت الأم جنبها للرقاد .
وما أن بدأت الراحة تمسح بيدها الحنون تعبها حتى أقبل عاطف يدق باب
الحجرة بيديه فى قوة ، فنهضت وفتحت الباب ، وحملته ثم عادت به
وأنامته إلى جوارها ، فسكن قليلا ، وما لبث أن تقلب فى الفراش ،
وأخذ ينظر فى وجهها ، فضايقه أنها مغمضة العينين ، فمد يده



ونفض الزوج ، ودخل إلى المطبخ

يفتحهما ، فدفعت يده تبعدها عن عينيها ولكنه كان كالذباب اللحوح ،
كلما أبعدت يده عن وجهها ، عادت تعبت بعينيها أو شعرها أو أنفها .
ومد أصبعه وأدخله في أذنها ، فنقد صبرها ، فحملته وانطلقت به إلى
حيث كان مراد وسامى وسوسن ، وقالت لهم :
— فين كرته ؟ العبوا معاه .

وقالت سوسن :
— ماما .. خدى هاله .
وقالت الأم وهي تسرع إلى غرفتها :
— اديها لنبيله .

وأغلقت الباب خلفها وارتمت في الفراش ، وانقضت دقائق من
الهدوء وإذا باب الغرفة يفتح ، وصوت سوسن يرن فيها :
— ماما .. ماما .. الحقى .. مراد شاط الكوره طارت ع الشارع .
وكان النوم أغلى من الكرة فلم تنبس الأم بكلمة ، وتقلب الأب
متبرما ، ثم سحب الغطاء وأخفى وجهه وأذنيه ، حتى لا يسمع .
وانسحبت سوسن ، وكأنما عز عليها أن تعود مهزومة ، فقالت
لمراد :
— ماما جايه لك .

ومرت لحظات هنيئة كلها هدوء وصفاء ، تبعها صوت باب يصفق
في قوة ، ثم انهيار زجاج ، فقفزت الأم من نومها مفزوعة ، وانطلقت
مرعوبة ، فإذا بها تجد عاطفا واقفا وهو مذهول وقد تناثر حوله زجاج
الباب ، وارتفع صوت الأب مستفسرا :

— جرى إليه ؟

— عاطف كسر قزاز الباب .

فقال الأب في ضيق :

— هو كل يوم لوح قزاز ؟

وقالت الأم في راحة :

— الحمد لله ربنا ستر ، لو وقع عليه كان قتله .

وبكت هالة ، فذهبت سوسن إليها وأخذتها من جوار نبيلة ، ثم

انطلقت إلى أمها وقالت :

— ماما .. ماما .. خذى هاله .

فقالت الأم في زجر :

— ابعدى دلوقت .. انتى عميتى ؟

— بتعيط .

— اديها لابوكى .

وعكفت الأم على التقاط الزجاج المتناثر ، وهى تبعد عاطفا عنه ،

وانسلت سوسن إلى غرفة أبيها ، وقالت :

— بابا .. خد هاله .

واستيقظ الأب ، وحمل ابنته ، ثم خرج بها إلى المطبخ ، يعد لها

زجاجة لبن .

وعاد الأب مسرعاً ووضع هالة في سريرها ، وألقى عليها الحلمة المطاط ،

وطفق ينظر إليها وهى تمتص اللبن فى حنان .

ودلفت الأم إلى الحجرة ، وأغلقت الباب خلفها ، ووقفت ترمق

زوجها وابنتها برهة ، ثم تقدمت منهما وقالت :
— قول لى : بتحب البنت دى قوى كده ليه ؟ .
فقال وهو يبتسم :
— بنت الشيبه .

جلست على طرف السرير وقالت :
— إلا الواحد بيعحب آخر ولاده ليه ؟
فاعتدل وقال وهو يفكر :
— يمكن عشان يبقى حاسس إنه ح يتحرم من عطفه بدرى .
ومرر يده بخنان على جسم هالة وقال :
— يا ترى مين اللى ح يريكى ؟
فقالت الأم فى سرعة :
— ما ح يريها ويجوزها غيرك .
فقال الأب وقد شرد ببصره :
— مش باين .

فقالت الأم وهى تجذبه من طرف بيجامته :
— طيب نام بقى والنبي ما تمغصش بطننا .
وتمددا فى السرير ، ولزم الزوج الصمت ، وظهر القلق فى وجه
الزوجة ، وأرادت أن تنزل الطمأنينة بصدرها ، فقالت :
— هو انت مش زى ابويا ، أبويا عاش لما جوزنا كلنا .. عندك ٤٥
سنة وكان ستاشر سنة لما تتجوز هاله يبقى عندك ٦١ سنة ، مش ح تعيش

— الأعمار بيد الله .

لما يبقى عندها له ستاشر سنه ح اجوزها على طول ، مش ح استنى
ولا يوم .

— ما تقولش الخطاب واقفين على الباب !

فمدت يدها ومررتها على شعره ، ثم رفعت صدرها وانحنت فوقه ،
وقبلته قبله على خده أودعتها كل حبها .
وأغمضا عيونهما ، وراحا فى سبات .

ونفضت أحلام ووقفت أمام المرأة تصفف شعرها ، ثم فتحت درجا
وأخرجت حلقتها ، ثم صاحت :

— إيه القرف ده ! مين اللى كسر الحلق ؟

فقال سوسن :

— عاطف كان يلعب بيه .

وراحت تعبت فى الدرج ثم قالت :

— فىن السيكتين ؟

فقال نبيلة ، وهى ترتدى ثيابها ، وتقرب وجهها من المرأة وتتحرك

فى خطوات راقصة :

— كان مع سامى .

وأقبل سامى متحديا :

— كنتى شوفتيني خدته ؟

— مش كان فى إيدك الصبح !

— ما تبطل الكذب بأه .

— ما حد كذاب غيرك .

ونظر إليها مليا وقال :

— ويتزوق وراحه على فين ؟

— مش شغلك .

واستيقظ الأب والأم على صياحهما ، ولكنهما ظلا في الفراش

ينصتان ، وقالت أحلام :

— نبيله جايه معايا ، رايحين نزور فايژه صاحبتى .

فاتخذ سامى هيئة رجل وقال :

— ما عندناش بنات يخرجوا لوحدهم .

فقالت نبيلة فى ضيق :

— وانت مالك يا بايخ ؟

فقال سامى فى إصرار :

— إذا كانت أحلام ح تروح لفايژه أنا ح اروح معاها .

وهز الأب رأسه معجبا ، ورفق على فمه بسمه رضا ، وتحركت الأم

فى فراشها وجلست متحفزة ، وارتفع صوت نبيلة متحديا :

— ح اروح غصب عنك ..

— مش راحه .

وصاحت نبيلة :

— هو انت ابويا ؟!

وقال الأب لزوجته :

— ما تخرجى لاولادك دول .

— زقنى وخليك بعيد ، لما العيال كرهتنى .

وصاحت نبيلة :

— يا ماما ، ما تحوشى الشيخ ابو العيون ده !

وقالت الأم وهى تفتح الباب :

— دانتو بنتين ، ترجعوا فى الضلمه لوحدكو ازاي ؟

فقالت نبيلة فى ثورة :

— وفيها ايه يعنى ما دام أنا واثقه من نفسى !؟

وقال سامى ساخرا :

— واثقه من نفسى !.

ودارت نبيلة على عقبها ، والتفتت اليه متحدية وقالت :

— آه واثقه من نفسى ، آمال زيك .. ح تسكت والا اتكلم

انسفك ؟

فقال سامى فى تخاذل :

— ح تقولى ايه يعنى ؟

ونهض الأب ووقف بالقرب من الباب يصغى .

— ح اقول ع السجاير الى بتشربها .

وخرج الأب من غرفته ليشارك فى المعركة ، وقال :

— سجاير ؟ والله عال مش فاضل الا السجاير !

وصاحت الأم :

— إياك نكفيكو عيش ، قال سجاير قال .

وأحس سامى أنه وقع فى المصيدة ، فقال صارخا .
— كذابه .. والله كذابه ..

فقال نبيلة ، وهى تدنى وجهها منه فى حركة تمثيلية :

— والسيجاره الى كنت بتشربها بالليل ؟

— دى سيجاره حلاوه اشتريتها من مراد ؟

فقال مراد فى بساطة :

— أبدا .. ماحصلشى .

فثار سامى وقال :

— يا كذاب .. بتنكر عشان تبقى تشتري منك !

فقال مراد وهو يهز كتفيه :

— ما خلاص التجاره فلسست .

فقال له أمه فى زجر :

— قول الحق .

فقال مراد وهو يبتسم :

— الحق .. الحق .. أنا الى اديته السيجاره .

فلطمته أمه على وجهه وقالت :

— أمال بتكذب ليه ؟

فقال مراد وهو يتحسس وجهه بيده .

— الحق على الى قلت الحق .

وقالت الأم :

— إذا كانت أحلام خارجه ما حدش ح يخرج معاها الا سامى .

فقال نبيلة في غيظ :

— يا سلام ! عشان ما هو ولد ؟

فقال لها سامى وهو يخرج لها لسانه :

— راجل .

واتجهت نبيلة إلى أحلام وقالت لها :

— طب هاتى بلوزتى بقى .

فقال الأم :

— وبعدين معاكى يا نبيله ؟

— مش عايزه حد يلبس هدومى .

فقال سامى وهو يرتدى ملابسه ، ويسرح شعره :

— لو كنتى ح تروحي معاها كنتى اديتها لها .

— ما لكش دعوه يا بايخ .

خلعت أحلام « البلوزة » وألقت بها في وجه نبيلة ، وراحت ترتدى بلوزة أخرى ، وانتهى سامى من ارتداء ملابسه . ودخل غرفة أحلام فرآها تمرر أصابعها على شفتيها فقال لها :

— إن حطيتى أحمر في شفايفك مش ح امشى معاكى .

فقال له نبيلة :

— جتك القرف في شكلك .

فأخرج لها لسانه ، فتركت له الغرفة وانصرفت .

وتحرك سامى وأحلام ، وسار عاطف خلفهما ، حتى إذا ما فتح

الباب تقدم عاطف ليخرج ، فصاحت سوسن :

(أم العروسة)

— ماما .. ماما الحقى . عاطف نازل الشارع .

— سيببه يتهوى .

واغتاضت سوسن ، فقالت :

— أنا مالى .. أهو دلوقت يوسخ هدومه .

وذهبت إلى حافظة كتبها القماش وحملتها واتجهت إلى حيث ذهبت

نبيلة . ولحت مراد يعبث فى الصوان ، فقالت له :

— مش ح تذاكر ؟

فقال لها بصوته المنبعث من حنجرته ، وقد نفرت عروق رقبتة :

— إيه ! ما ادينى بدور على كراسى فاضى أهو .

وعثر مراد على الكراس ، وانطلق خلف سوسن .

وتحرك الأب ليغادر غرفته ، وقبل أن يخرج التفت إلى زوجته وقال

لها :

— وراكى إيه النهارده ؟

— المرار الى ما بيخلصش ، ح اخيط شرايات العيال ، واركب لهم

الزراير .

وبدأت تحمل كومة من القمصان ، وعلبة رصت فيها الجوارب

الممزقة ، وقال الزوج :

— أنا ح اقرا الجرنال .

— لأ . وراك شغل كثير .

— ورايا ايه ؟

— جزم وصنادل العيال عايزين يصلحوا أهم عندك ورا الباب :

ونظر خلف الباب ، فرأى صندوقا من الورق المقوى ، تكدست فيه أحذية الأولاد وصنادلهم ، فحمل الصندوق ، وانطلق إلى الردهة الخارجية ، ووضع الصندوق على الأرض ، ثم اتجه إلى المطبخ ، وأحضر كرسيًا قصيرا صنع من الخشب ، وعلبة صفيح بها خيط وسكينة أحذية وإبر ومسامير وقدم ، وحمل سندانا مما يستعمله من يقومون بإصلاح الأحذية وذهب إلى الردهة .

وجلس على الكرسي ، وقد وضع السندان أمامه ، ومد يده في الصندوق وأخرج حذاء سوسن وراح يقلبه فآلفاه مفتوقا ، فوضعه على فخذه ، ومد يده في العلبه الصفيح يأخذ الإبرة .

وأقبلت الأم ووضعت كوم القمصان على الأريكة ، ثم جلست ترفو الجوارب وهى تنظر إلى زوجها بين لحظة وأخرى ، وهو منهمك فى خصف نعال أبنائه ، والتقت عيونهما مرة ، فابتسم الزوج وهو يغمز بعينه :

— صنعه فى اليد .

الفصل الثالث

أتى المساء . وانتهى حسين من إصلاح أحذية أبنائه ، وأتمت زينب تثبيت الأزرار وإصلاح الرتوق ورفع الجوارب ، فقامت تحمل البنطلونات والقمصان على رأسها ، وعلبة الخيط والجوارب في يديها ، وسارت قليلاً ثم توقفت والتفت خلفها وقالت :

— والنبي يا حسين تكوى للأولاد قمصانهم .

ووضعت علبة الخيط تحت إبطها ، ومدت يدها تسحب القمصان من فوق رأسها ، وتدفع بها إلى زوجها .

تناول حسين منها القمصان ، وأخرج من الصوان مكواة كهربية ، ومفارش وأغطية راح يفرشها فوق المنضدة ، وجاء بكوب ماء ، وأخذ يملأ فمه بالماء ويرشه على القمصان ثم يكوها ويضعها على المنضدة .

وبدأ في الكى ، وإذا بصوت سوسن يرن في الردهة :

— بسم الله الرحمن الرحيم . قل أعوذ برب الناس ، ملك الناس ، إله الناس ، من شر الوسواس الكناس .

فصاح الأب وهو مستمر في عمله :

— الخناس يا سوسن .

فأصلحت سوسن خطأها واستمرت في القراءة :

— من شر الوسواس الخناس ، الذى يوسوس فى صدور الناس .

وكانت الأم قد انتهت من وضع البنطلونات والجوارب في أماكنها وأقبلت ، فقالت لزوجها :

— الخناس يعنى إيه ؟

فشرّد حسين وقال :

— الخناس ؟ .. الخناس ؟ .. هاتى مختار الصحاح نشوف معناها

بالضبط إيه ، وهمت بالتحرك . وإذا بزوجها يقول :

— ولا مالوش لزمه .

— ليه عرفت معناها ؟

— أبدا ، بس ح نتعب نفسنا من غير لزمه .. ما فيش كلمه دورت

عليها فيه الا لقيت مكتوب الشئء الفلانى « معروف » .

— يعنى إيه معروف ؟

— يعنى سهل قوى ، مش محتاج لشرح ، الناس كلها عارفاه .

— طب والنبى لما اروح اشوف شارح « الخناس » بإيه .

واتجهت إلى غرفة الاستذكار ، إنها غرفة بسيطة ، بها مكتب واحد

متواضع ، وصوان صفت فيه الكتب ، لا ضلف له . أسدلت عليه

ستارة ، وقد جلست نبيلة خلف المكتب ، بينما انبطح مراد على وجهه على

الأرض ، وقد بسط أمامه كتاب الحساب وكراسة ، وجلست سوسن

على كرسي من القش ، ترتل القرآن وتهز رجلها .

ونظرت الأم ، فألفت عاطف قد نام فى كرسيه ، وقد تكور فيه ،

بينما نامت هالة على الأرض ، فقالت لنبيلة :

— حرام عليكى .. هو انتى ما فيش فى قلبك رحمه ؟

فقالت نبيلة في دهش :

— في إيه ؟

— مش شايفه اخواتك نايمين ازاي ؟

— دول لسه نايمين دلوقت .

— ناموا يا كبدي من غير عشا .

— ما كلوا العصر .

وذهبت إلى هالة وحملتها في رفق ، ثم التفتت إلى نبيلة ، وقالت :

— هاتي أخوكي .

فرمت نبيلة الكتاب من يدها في تهرم وهي تقول :

— أف .. الواحد ما يعرفش يذاكر في البيت ده .

— يعني المذاكره حليت دلوقت ، لما كنتي ح تخرجي مع أحلام ما

فكرتيش في المذاكرة ؟

وحملت نبيلة عاطفا ، وسارت الأم وبين يديها هالة ، وخلفها نبيلة ،

وعلى كتفها عاطف ، واتجهت الأم إلى غرغتها وذهبت نبيلة إلى غرفة

البنين .

وضعت الأم هالة في فراشها في حنان ، وراحت تخلع لها حذاءها في

رفق ، ثم مالت ووضعت على خدها قبلة .

ودخل الأب الغرفة وهو يحمل القمصان ، فالتفتت إليه زوجته ،

وقالت :

— إيد ما نعدمها .

ثم دنت منه وقبلته في خده ، فأشرق وجهه ، ورفت على فمه بسمه

رضا .

ووضعت نبيلة عاطف على فراشه وخلعت له فردة خذاء ثم غطته في عجلة ، وفي رجله الأخرى « فردة » .

عاد الأب والزوجة إلى غرفة الاستذكار ، وإذا بسوسن تردد القسم ،

وهي واقفة :

— أقسم بالله ، أن أكون مخلصة لمصر ..

ورفع مراد رأسه والتفت ، فلما رأى أباه نهض وفي يده كتاب

الحساب ، ذهب إليه وهو يقول :

— مش فاهم المسألة دى .

فقال الأب وهو يتسهم :

— ح تفهمها ازاي وسوسن عماله تذيع قرآن وأناشيد ؟

فقالت سوسن ورأسها مرفوع :

— يعنى ماذا كرش ؟! أطلع خاييه زعيم ؟

فقالت أمها وهي تربت على ظهرها :

— كفايه النهارده . أكلك في التلمية كليه وخشى نامى .

— حاضرياماما .

وأقبلت نبيلة ونظرت ، فلما رأت أباهما في الغرفة مدت يدها وتناولت

الكتاب وخرجت لتستذكر دروسها في غرفة أخرى .

وتناول الأب الكتاب من مراد ، وقرأ المسألة ، ثم قال :

— شوف يا مراد ، عندك حوض على شكل متوازي مستطيلات
أبعاده من الداخل ١٢٠ سنتى و ١٠٠ سنتى و ٨٠ سنتى متر ، ركب
عليه حنفية تنزل ٦٠ لتر فى الدقيقة وفيه بلاعه تفرغ ٤٠ لتر فى الدقيقة ،
فإذا فتحنا الحنفية والبلاعه مع بعض ، بعد أد إيه يتملى الحوض ؟
فقلت الأم فى حماسة :

— كلام إيه الفارغ ده ، اللي عايز يملا الحوض يسد البلاعه ، إنما يفتح
الحنفيه ويسيب البلاعه مفتوحه يبقى جنان .
— المسألة بتقول كده .

— يعلموا العيال حاجه معقوله .
ومد مراد يده ، وأخذ الكتاب من أبيه وأغلقه ، فقال له أبوه :
— بتعمل إيه يا مراد ؟

فقال مراد وهو يضع الكتاب على المكتب :
— ما دام حاجه مش معقوله أفهمها ليه !
وتحرك ليغادر الغرفة ، فقال له أبوه :

— تعال ، رايح فين ؟
— رايح آكل وانام .

ودق جرس الباب الخارجى ، فذهب مراد وفتحته ، فاندفعت أحلام
فى مرح يتبعها سامى فى تؤدة ، وسارت حتى بلغت غرفة الاستذكار ،
فأطلت برأسها وقالت متلهلة الأسارير :
— السلام عليكم .

ثم صارت تصفر ، وكل خالجة فيها تنطق بسرورها ، وراحت الأم تتبعها بنظرها برهة ، ثم قالت :

— إيه اللي جرى الليلة دى ! أحلام مش زى عوايدها .

— مزقطة ومش على بعضها .

وارتفع صوت أحلام فى غناء :

— مال هوا يا امه .

فالتفت الأم إلى زوجها ، وقد اتسعت عيناها دهشة :

— سامع .. بتغنى . وما سمعتهاش بتغنى قبل الليلة أبدا .

وأنصت الزوج مليا ، ثم التفت إلى زوجته وقال :

— غريب . صوتها طالع من قلبها .

ثم قالت بصوت خافت :

— تكونشى بتحب ؟!

فهبت الأم كمن لدغتها أفعى :

— بتايه ؟ هو انا عندى بنات يعرفوا الكلام ده !

وانطلقت خافقة القلب إلى غرفة ابنتها ، فألفتها قد خلعت ثيابها ،

ووقفت أمام المرأة تتفرس فى مفاتها التى عجز القميص الشفاف عن

سترها ، وأخذت الأم تنظر إلى ابنتها مليا ، فرأتها لأول مرة فتاة نامية ،

اكتملت أنوثتها ، فاشتد وجيب قلبها وتقدمت إليها فى قلق ، وقالت :

— شفتى مين عند فايزه ؟ كان مين اللى قاعد معاكو ؟

فقالت أحلام فى بساطة :

— ما كانش فيه حد غريب .. كانت فايزه وأمها وابوها وجلال .

فقالت الأم في اضطراب :

— وجلال كان قاعد معاكو !

— أيوه يا ماما .

فقالت الأم في صوت فيه رنة غضب :

— وازاى يقعد معاكو ؟

— وفيها إيه يا ماما ؟ لقي سامى قاعد قعد .

— لكن سامى لسه صغير ، إنما جلال بقى راجل .

سمع سامى الحوار الدائرين أمه وأحلام ، فخرج من غرفته ، وانسل إلى الغرفة الثانية حتى يشترك في الحديث ، وقال :

— أنا كنت قاعد فى أدبى مش زى جلال .

فقال أحلام فى ثورة وقد توردت وجنتها ، فازدادت جمالا :

— ما كان قاعد فى أدبه راخر ، قول لى عمل إيه كده ؟

فالتفت سامى إلى أمه وقال :

— لو شفتيه وهو بيص لها ح ياكلها .

فتقدمت أحلام نحوه صائحة :

— خللى عندك أدب .

ولم يأبه لها ، بل استمر يقص على أمه ما حدث :

— طول ما هو قاعد ييص لرجليها .

واتسعت عينا الأم ، ونظرت برغمها إلى ساقى ابنتها العاريتين ،

فامتألت حنقا ، واحتقن وجه أحلام بالدم ، وصاحت :

— ما بس بلاش كلام فارغ .

- وهز سامى رأسه فى عدم اكتراث بها ، وقال :
- ولو شفتى الى عمله أبو فايزة .
- فقالت الأم فى فزع :
- وعمل إيه راخر ؟
- فتقدم وهو يقلد الرجل فى حركاته وفى نبرات صوته :
- طبطب على خد أحلام وقال لها : « أهلا مرات ابنى » .
- فقالت الأم وهى تشهق :
- مرات ابنه .. مرات ابنه ازاي ؟!
- وخرجت كالعاصفة ، وانطلقت إلى غرفة الاستذكار ، فإذا بزوجها قد اضطجع وراح يقرأ الجريدة فى هدوء ، فصاحت فيه :
- يا بختك بروقان بالك .
- فنهى الجريدة ، واعتدل وقال :
- حصل إيه ؟
- قال الرجل يطبطب على خدها ويقول لها : أهلا مرات ابنى .
- يهزر معاها .
- هزار إيه البايخ ده الى يفتح عينين الاولاد ؟
- وجاء سامى خلف أمه يسعى ، ودخل الغرفة وقال :
- نسيت اقول لك .
- نسيت إيه كمان ؟
- فأمسك الباب بيده ، ووضع ساقا على ساق ، ومال قليلا ناحية ذراعه التى أمسك بها الباب وقال :

— أبو فايزه وامها وجلال يقولوا لكم إنهم ح بيجوا يزوروكم يوم
الخميس الجاى .

فقالت الأم فى دهشة :

— إيش عجب ! لا يعرفونا ولا نعرفهم .

وشردت ببصرها ، وراحت الأفكار تتزاحم فى رأسها ، وصمت
الأب يفكر ، ونظر سامى إلى أمه وإلى أبيه ، فألفاهما شاردين ، فهز
كتفيه وقال قاطعا حبل تفكيرهما :

— مش ح تتعشوا ؟

فقالت الأم فى سرعة للتخلص منه :

— إحنا شعبانين ، روحوا اتعشوا انتم .

وانسحب سامى ، وجلست الأم على أقرب مقعد ، وقد حملت
رأسها بكفها ، وأرادت أن تطمئن إلى الأفكار التى نمت فى رأسها
فقالت :

— تفكر يا حسين بيجوا يزورونا ليه ؟

ولم يشأ أن يعبر عن الخواطر التى طفت على سطح ذهنه ، حتى

لا يسبب لها ألما إذا ما خاب حدسه ، فقال :

— إيش عرفنى .

وساد الصمت بينهما ثانية ، وانفرد كل منهما بأفكاره ، حتى أفاق
حسين على صوت كرسي يسحب من الخارج ، فالتفت إلى زوجته
وقال :

— يللا يا زينب ننام .

فنهضت وهى تقول :

— يلا .

— ودخلا غرفتهما ، وتمددا فى السرير ، وراحت زينب تتقلب

قلقة ، فقال لها زوجها :

— ما تنامى .

— مش جاي لى نوم .

وخيم الهدوء على الغرفة ، ثم تنهدت زينب بصوت مسموع ، فقال

لها زوجها :

— بتفكرى فى إيه ؟

— يا ترى الناس دول شكلهم إيه ؟

— ناس زينا ، لهم عين وودان وبق ومنخير .

— مش قصدى .

— أمال قصدك إيه ؟

— يا ترى دول ناس طيبين واللا جنسهم إيه ؟

فقال لها وهو يربت على ذراعها العارية :

— نامى نامى .. بكره نعرف كل حاجه .

الفصل الرابع

جلست زينب أمام « التواليت » وراحت تصفف شعرها ، ولححت زوجها مقبلا في المرأة ، وهو يرتدى بيجامته ، فقالت له :

— ح ننزل نشترى للأولاد جزم .

فقال لها الزوج وهو يعبث بذقنه :

— ماصلحناهم أول امبارح .

— جزمهم بقت عره ، والناس ح ييجوا بكره ، يقولوا علينا إيه ؟

— دول ما بقا لهمش شهر .

— أنا عارفه بيعملوا فيهم إيه ؟

وصمتت قليلا ثم قالت :

— خد مقاسهم ويللا .

— طب البسى انتى وما تأخريناش .

فقالت وهى ترفع حاجبها عجبيا :

— بقى أنا باغيب فى اللبس ، والله ما طلع على الحكاياه دى غيرك .

فقال وهو يغادر الغرفة :

— لما نشوف .

ونادى وهو فى طريقه إلى الردهة :

— سامى ، هات ورقة بيضه وقلم رصاص .

وأقبل سامى ومراد وعاطف وسوسن ، ووقفت نبيلة على باب غرفتها
تنظر . قدم سامى إلى أبيه الورقة والقلم ، فوضع الأب الورقة على
الأرض ، وقال لعاطف :
— حط رجلك .

فوضع عاطف قدمه عارية فوق الورقة ، وأخذ الأب يمرر القلم
الرصاص حول القدم ، ليحدده على الورقة ، وقال سامى :
— مقاس رجلى ٣٩ .

وقال مراد بصوته المنبعث من حنجرتة :
— وأنا مقاسى ٣٦ .

ورفع عاطف قدمه ، ووضعت سوسن قدمها ، وراح الأب يرسمها
على الورق ، وقالت نبيلة :
— أنا عايزه جزمه « سبور » ٣٧ .

والتفت نبيلة خلفها ثم قالت :
— وأحلام عايزه جزمه بكعب على ٣٦ .
وإذا سوسن تربت على خد أبيها وتقول :
— وأنا يا بابا عايزه جزمه بكعب على .
ودنا عاطف وقال :

— وأنا كان .
وقال الأب وهو يتجه إلى غرفته :
— حاضر .

ودخل يرتدى ثيابه ، فالتفت إلى زوجته فألفاها لا تزال تصفف

شعرها ، فقال :

— لسه !

فقالت له :

— والنبي البس انت وما تلخمينش .

وارتدى قميصه وبنطلونه ، وجلس يدس قدمه في الجورب ، وإذا

بسوسن مقبلة تصيح :

— ماما .. ماما .. إلحقى سامى بيحلق دقنه .

وقام الأب وقد لبس « فردة » جورب وقدمه الأخرى حافية ،

وذهب إلى الحمام ، فوجد الصابون الغزير يغطي ذقن سامى : فقال له

الأب في زجر :

— إيه اللعب ده ؟ تهيج دقنك .

فقال سامى في مكابرة :

— هو انا عملت حاجه ! أنا باغسل وشى .

وأقبلت نبيلة وقالت :

— مستعجل قوى ، عايز تبقى راجل .

فقال لها سامى :

— وانتى إيش حشرك ؟

وقالت سوسن :

— شفت يا بابا هو اللى بياخد امواسك ويقول إن أنا اللى باخدهم

أبرى بيهم الأقلام .

ومد سامى يده وقبض على ذراع سوسن ، وهزها في غيط :

— يا بت انتى بطلى الكذب والتأويم .

وصرخت سوسن وقالت وهى تبكى :

— آه يا دراعى .

فقال الأب فى غيظ :

— إنت بتضربها ليه ؟

فقالت نبيلة :

— ماحدش مالى عينه .

وصاحت الأم :

— ما بس بقى ، والله لو صحيت هاله ما حد ح يشيلها غيركم .

وانسلت نبيلة إلى حجرتها ، وخرجت سوسن وهى تمسح دموعا متوهمة ، وعاد الأب إلى الغرفة يستأنف لبسه ، فوجد الجورب قد ابتل بالماء ، فخلعه وقام يحضر جوربا آخر . وأتم ارتداء ثيابه ، وزوجته جالسة لا تزال بقميص النوم أمام التواليت ، وفى يدها أصبع الأحمر تمرره على شفيتها ، فقال لها :

— أنا يدى أعرف بتزوقى لمين بس ؟

فقالت فى دلال وهى تنظر فى المرأة :

— لك يا راجل .

— مانتى قاعده كل يوم فى البيت من غير زواق ، واشمعنا الأبيض والأحمر

ما يحلاش إلا ساعة الخروج .

— عايزنى أمشى جنبك عره ؟!

— إذا كان على أنا عاجبنى من غير زواق ، بس شهلى ، والله ما حد

(أم العروسة)

ح يخطبك ، اتجوزتى وخلاص .

— آهو انت اللى بتعطلىنى وترجع تقول باغيب فى اللبس .

فقال وهو بهم بمغادرة الغرفة :

— ما فيش فايده ، كل الستات يحبوا إن الرجاله يصفروا لهم .

— مش كلهم .

— كلهم ، وانتى أولهم ، فاكره يوم ما جيتى فرحانه وقلت لى إنك

كنتى ماشيه بين اتنين صحابك وواحد قال لك : أحلاهم اللى فى
الوسط !

— طب اخرج بقى خلىنى البس ، الحق علىّ اللى بقول لك كل

حاجه .

وخرج من الغرفة ، وراح يغدو ويروح فى الشقة وقد لاح فى وجهه
الضيق ، ووقع بصره على الراديو ، فذهب إليه ليديره لعل النغمات
المنبعثة تنزل الراحة بصدرة ، وتعينه على الصبر .

ونظر إلى الراديو فأتسعت عيناه دهشة ، كان زجاجه محطما ،
وعقاربه منزوعة ، والأزرار التى تدير العقارب مفكوكة ، فقال :

— راديو إيه ده ؟ بتدوروه ازاي ؟!

فأسرعت سوسن إليه وقالت :

— عايز آنى مخطه ؟ مصر واللا صوت العرب ؟

فقال الأب :

— أى مخطه .

فمدت يدها تدير ذلك المسمار العارى الذى كان مركبا عليه زرار

العقارب ثم توقف وقالت :

— آهى دى محطة القاهرة .

فالتفت أبوها إليها وقال :

— يعنى ما نطقش .

فقالت سوسن فى بساطة :

— ده ما بيمشيش إلا بالضرب ، إدى له على نافوخه .

فنظر إليها وهو لا يفهم مما تقول شيئاً ، فأسرت إلى الراديو وضربت سقفه بقبضة يدها الصغيرة ، فانبعث صوت الراديو مجلجلاً فى الشقة .

وجلس الأب يصغى برهة ثم نهض واتجه إلى غرفة النوم ونظر ، فألفى زوجته لا تزال تقوم بارتداء ملابسها ، فعاد إلى الراديو ضيق الصدر ، وضرب سقفه فى غيظ بقبضة يده ، فإذا بالراديو يسكت عن الكلام . وعاد ثانية إلى حيث كانت زوجته ، وقال :

— ما تيللا بقى .

فراحت تمرر زجاجة العطر خلف أذنيها فى هدوء ، ثم مدت إليه يدها بالزجاجة وهى تقول :

— خد ، إتريح .

فانقشع غضبه سريعاً وقال :

— بعدين الستات تجرى ورايا .

— مش أحسن ما تجرى منك ؟

ومد يده وجذبها من يدها وهو يقول :

— إتأخرنا خالص ح نخرج فى الضلمه .

وجذبت يدها منه وقالت :

— طب لما أقفل الدولاب .

وأغلقت الدولاب ، ووقفت أمام مرآة « التواليت » تنظر إلى
ظهرها ، فمد يده وجذبها فانقادت له .

وخرجتا من الغرفة وسارا في الردهة ، وإذا بها تقف فجأة وتقول :

— والله ما حد بيلخمني غيرك ، نسيت آخذ مقاس رجل هاله .

وعادت إلى الغرفة . ووقف في الردهة يصرف أنيابه ، وغابت قليلا

ثم عادت ، وانطلقا حتى إذا بلغا باب الشقة الخارجى قالت :

— أوه ، نستنى الجوانتى .

وتركته وعادت لتحضر قفازها ، ووقف يدق بقبضة يده دقات

مكتومة تنم عن ضيقه ونفاد صبره .

وعادت إليه تعبت بقفازها ، وعلى فمها ابتسامة هادئة ، ففتح الباب

وقال :

— اتفضلى ، على الله ما تكونيش نسيتى حاجه تانيه .

وانطلقا ، حتى إذا بلغا شارع ٢٣ يوليو ، راحا يتفرسان واجهات

المحال ، وقال لها :

— مش ح نخش نشترى بقى ؟

— مش لما نتفرج قبله .

وسارا ، وإذا بشاب يصفر ، فالتفت إلى زوجته وقال :

— ما تفرحيش ، مش بيصفر لك ، بيصفر لى ورانا .

والتفتت خلفها ، وإذا بفتاة قد ارتدت ثوبا ضيقا مثيرا ، برز منه

نهداها ، وتعلو وجهها طبقة من المساحيق ، وقد ركبت رموشا طويلة
وصبغت شعرها بلون الذهب ، فقالت :

— أنت بتبص للفتارين ولا للماشيين ؟

فقال في بساطة :

— يتفرج .

ووقفا أمام محل يبيع أقمشة ، وقالت :

— ما بقاش عندى فساتين أخرج بيهم ، تعال لما اقطع لى فستانين .

فقال في صوت مضطرب :

— لكن احنا نازلين نشترى جزم للأولاد .

— دلوقت نشترىهم .

ودخلت إلى المحل ودخل خلفها ، وانسابت مسرعة إلى قسم الحراير

وهو في أثرها ، وقالت للعامل .

— عايزه قماشه بيعج وردتها صغيرة .

وراح الرجل يعرض عليها القماش ، وهى ترفض :

— لأدى وردتها صغيرة قوى .. لأدى وردتها كبيرة قوى .. عايزه

ورده أكبر من دى شويه ، ورينى ورده أصغر من دى سنّه .

وتكدست أثواب القماش أمام العامل ، حتى كادت تخفيه ، ونفد

صبر الزوج ، فتقدم من العامل وقال له :

— لو كانت الفابريكه تنصف ، كانت تبعت لكم القماش ساده ،

وتبعت معاه الألوان والفرش ، وكل زبونه ترسم السورده اللى على

مزاجها .

وأحست الزوجة أن ضيق زوجها بلغ منتهاه ، فاختارت القطعتين وتناولت من العامل القسيمة ، ودفعت بها إلى زوجها ليدفعها .
وذهبا إلى محل أحذية ، واشتريا ما يحتاجان إليه بعد أخذ ورد طويلين بين الزوجة وصاحب المحل في الأثمان ، وخرجا من المحل ، الزوج يضع لفة القماش تحت إبطه وتتدلى في كل يدربطة أحذية ، بينما سارت الزوجة إلى جواره تعبت بقفازها !

ووقفت الزوجة عند واجهة محل ، وراحت تتفرس في حقائب اليد المعروضة ، ووقف الزوج بعيدا ، فإذا بها تلتفت إليه وتناديه ، فلما يدنو منها : تقول له وهي تشير بأصبعها من الزجاجة :
— إيه رأيك في الشنطة دى ؟ شنطتى بقت عره .

— اعقلى بلاش تبذير ، طالع لنا بنات .

— هو احنا جنبنا حاجة زياده ؟ حتى تحت الشنطة مستخسرها فيه !
ما استهلهاش ؟

— إذا كانت عاجبا كى خديها ..

وهمت بالدخول ، فقال لها :

— اسمعى قبل ما تحشى ، مكتوب عليها تلاته جنيه ، نخش ندفع الفلوس ونخرج ، مش عايز فضال ووجع دماغ ، إن فاصلتى ح اسيبك واخرج على طول .
— طيب .

ودخل خلفها وهو لا يدرى كيف يوفق بين لومها له واتهامها إياه بالتبذير يوم اشترى أقة تفاح ، وبين ما تفعله اليوم !

وجعلت تقلب الحقيبة بين يديها ، وتجرب قفلها ، وتتفكر في محتوياتها ، ولما اطمأنت إليها ، سألت :

— تمناها كام ؟

فقال الرجل :

— ثلاثه جنيه .

— كثير ، ميه وخمسين قرش بس .

واريد وجه الزوج ، ونظر إلى زوجه في غيظ ، ثم غادر المحل وتركها وحدها ، ووقف أمام المحل يدق الأرض بقدمه في ضيق ، وتقضى بعض الوقت ، ثم أقبلت الزوجة وفي يدها الحقيبة .

— خدتها بكام ؟

فقالت في هدوء :

— بميه وخمسين قرش .

فالتفت إلى المحل وهو يجز على أسنانه ، فمدت الزوجة يدها إليه

وقالت وهى تجذبه :

— يللا .. أصل فلوسك كثير .

الفصل الخامس

جاء يوم الخميس ، وكان ميعاد الزيارة المرتقبة ، فدبت حياة عاصفة صاخبة في الشقة، كان الأبناء جميعهم يرتدون أفخر ما عندهم حتى الأب راح يرتدى بذلته الرمادية التي كان يدخرها للمناسبات ، وارتفعت الأصوات واختلطت فكانت أشبه بالضجة المنبعثة من مشاهدى مباراة حامية في كرة القدم .

وصاح سامى فى عصبية :

— المشط فين ؟ مين خده من قدامى ؟

فقالت نبيلة وقد خلعت جاكete البيجاما ، ووقفت أمام المرأة تلف شعرها دوائر :

— أنا الى خدته ، ما بقى لك ساعه بتتسبب .

وصاح الأب :

— مين الى خد الكرافته من هنا ؟

فصاحت نبيلة :

— مع سامى .

وخرج الأب من غرفته ، وهو عارى الساقين ، يرتدى قميصا أبيض ، واتجه إلى حيث كان سامى ، ووقع بصره على الكرافته ، فانقض

عليها وأخذها وهو يقول :

— حتى الكرافته دى ح تاخذها ؟ دانا بقى لى خمس سنين مش

عارف أشتري غيرها .

ونادت أحلام :

— نبيله نبيله ، والنبي تناولينى البنس .

فاتجهت نبيلة إلى الحمام ، ودفعت إلى أحلام بالبنس .

وصاح عاطف فى بكاء :

— لأ ما البسش البنطلون ده ، عايز البنطلون الأحمر .

وقال مراد وهو يدس قميصه فى البنطلون فى إهمال بحيث أصبح

القميص من أمام داخل البنطلون ، بينا كان طرفه الخلفى خارجه :

— ما تدى له البنطلون اللى هو عايزه .

وجاءت سوسن تهروول ، وهى ترتدى فستانا قصيرا كشف عن

ركبتها ، وهى تقول :

— ماما .. ماما .. لبسينى الفستان .

وأولت ظهرها لأمها ، فهمت الأم بمد يدها لتصلح هندام ابنتها ، وإذا .

بعاطف يصيح :

— أنا مالى عايز البنطلون الأحمر .

وارتفع بكاء هالة ، فصاحت الأم :

— يا نبيله ، أنا مش عارفه بتعملى إيه عندك ، تعالى شوفى أختك .

وقال سامى وقد ارتدى ثيابه :

— لما تخلص زواق .

— أنا قلت لك ميت مره مالكشى دعوه بيه .

وقالت الأم لسامى :

— فوت انت بقى روق لنا الشقه شويه .

فقال سامى :

— هاتوا ثمن تذكرة السينما .

فقالت الأم بصوت عال :

— إدى له يا حسين .

فقال الزوج فى ضيق :

— ما كانوا قعدوا فى الشقه !

فقالت الأم فى حدة :

— أنا واحده عيانه وما تجبوليش الأوى ، حرام عليكو كفايه قرف

بقى !

فقال الأب وهو يدفع لسامى ثمن التذكرة فى صوت أقرب لصوت

المعددة :

— ليه العواذل حاسدينى ، دول حقهم ييكو على .

ورأى مراد أن سامى حصل على ثمن تذكرة السينما ، فتشجع واقترب

من أبيه وقال :

— وأنا ؟

فقالت الأم وهو تصفف شعر عاطف :

— خد أخوك معاك ياسامى .

فقال مراد بصوته المنبعث من حنجرتة :

— لأ ما امشيش مع سامى ، ييزغدى فى السكه .

فقال سامى وهو ينصرف :

— ومين يمشى معاك ؟

وأخذ مراد نقوده ، وانطلق مهرولا وأمه تصيح خلفه :

— تعرف تركب بيهم عجل ح اقطم رقبتك .

وخرجت أحلام من الحمام ، وهى فى قميص وردى ، تضع على كتفها منشفة ، غطت بها ظهرها وصدرها ، وإن ظل الأخدود الغائرين ثديها عاريا ، واتجهت فى تودة إلى غرفتها ، كانت فى قرارة نفسها تحس أن اليوم يومها .

ونظر الزوج إلى زوجته وقال :

— لسه ما لبستيش ؟ الناس زمنهم جاين .

— ح البس أهو .

ووضعت يد عاطف فى يد سوسن وقالت :

— اقفى باخوكى ع الباب .

فقال سوسن :

— طب هاتوا نضيع .

وأعطاها أبوها قرشا ، فرفضت أن تأخذه وقالت :

— أنا شفتك اديت لسامى ومراد إيه ، عايز تضحك على ، واللا

يعنى عشان ما هم ولاد ؟

وأعطاها أبوها حتى رضيت ، وأقبلت نبيلة تحمل هالة وتقول فى ملل :

— كان على ذنب ألتجس معاها النهارده .. ما كنت خيرجت أنا رخره ..

فقال لها أبوها :

— كنت تزوحى على فين ؟

فقال نبيلة وهى تلف بهالة فى حركة راقصة ؟
— أى حته .

فقالت الأم وهى تخلع ثوبها :
— ما هى الدنيا ساويه .

ودخلت نبيلة غرفتها وانبعثت من الراديو أنغام راقصة ، فراحت ترقص وهى ترفع هاله بيدها ، وأخذت تدور ، فقامت لها أحلام :
— كفاه بقى زغللتى عنيه .

ولم تكف نبيلة عن الدوران ، بل قالت :
— قولى لى الناس دول جاين النهارده ليه ؟

فقامت أحلام وهى تزرر فستانها :
— أنا عارفه !.

— كل حاجه فيكى بتقول إنك عارفه ، تسريحتك ، فستانك ، لمعان عنيكى ، الفرحة الى ..

قالت أحلام مقاطعة :

— بس بلاش غلبه ، هو انتى ما بتتعبش م الكلام !

وظلت نبيلة فى دورانها وحديثها :

— الكلام ده نعمه .. يمكن انتى ما تحسبش بيها ، لأن حواليكى ناس

كثير بيكلموكى ، زى الشبعان اللى ما يعرفش قسوة الجوع ، ياما ناس
يتمنوا يلاقوا اللى يكلموهم .

وارتفع صوت الأم ينادى :

— نبيله .. نبيله .

فقالت نبيلة وهى تتحرك فى خطوات راقصة :

— مؤكد ماما لبست الشراب .

وانطلقت إلى حيث كانت أمها ، فألفتها قد ارتدت ثوبها وجورها

وقد لفت بجذعها تنظر إلى بطن ساقها ، ولما رأت نبيلة ، قالت لها :

— شوفى خط الشراب معدول ؟

فنظرت نبيلة ثم قالت :

— معدول خالص ، وان ما كانش معدول ح يحصل إيه فى الدنيا ؟

فقالت الأم فى إيمان :

— إزاي ؟ دى قيمة الست فى شرابها .

وقالت نبيلة فى خبث :

— طب واللى من غير شراب ؟

فقالت الأم فى بساطة :

— ما لهاش قيمه .

وضحكت نبيلة ضحكة طليقة ، فهذا الحديث يدور بينها وبين أمها كلما لبست الأم جوربها .

وأقبل الأب وهو في كامل هيئته ، ولحته نبيلة فقالت في مرح :

— إيش . إيه الشياكه دى كلها ؟

فقالت الأم وهى تبتسم :

— يا بت خللى عندك أدب .

وقال الأب وهو يهز رأسه :

— الشياكه راحت من يوم انتم ما جيتوا .

ودق جرس الباب الخارجى ، فالتفت الأب إلى الأم فى اضطراب ،

وقال :

— أهم جم . افتحى لهم الباب .

وقالت الأم فى قلق :

— أنا ما اعرفهمش . روح قابلهم انت .

وقالت نبيلة :

— انتوح تسيبوا الناس واقفين ع الباب ! أروح أفتح لهم أنا ؟

وقال الأب فى سرعة :

— لأ .. لأ .. أحلام اللى تفتح لهم .

وخرجت أحلام من غرفتها ، وسارت صوب الباب الخارجى فى

حيوية ، وإذا بالأب يقول :

— دخلى الستات فى الأوده المفروشه والرجال فى المكتب .

ووصلت إلى الباب ، فوقفت برهة تصلح هندامها ، ثم مررت يدها على شعرها لتتأكد من أن الهواء لم يعيث به ، وفتحت الباب فألفت جلالاً وأباه وأمه ، فرفت على فمها بسمه ، وتأخرت خطوة ، لتفسح الطريق ، وقالت :

— تفضلوا .

والتقت عيناها بعيني جلال ، فأحست كأن تياراً كهربياً سرى فى بدنهما ، واستشعرت نشوة وسارت فى خفة ، وأشارت إلى أم جلال أن تتفضل إلى غرفة الاستقبال وانطلقت أمام جلال وأبيه تقودهما إلى غرفة المكتب .

وجلس جلال وأبوه يقلبان عيونهما فى المكان فاحصين ، كان جلال شاباً فى الثالثة والعشرين ، أسمر الوجه ، أسود العينين ، يميل أنفه إلى الكبر ، غزير الشعر ، متوسط القامة . وكان أبوه ربعة ، بارز الكرش ، مستدير الوجه ، أصلع الرأس على الرغم من غزارة شعر حاجبيه ، سقطت بعض أسنانه ولم يفكر فى أن يضع مكانها أسناناً صناعية .

وأقبل حسين وزوجته فى الردهة ، حتى إذا بلغا غرفة المكتب وقف حسين متمهلاً كأنما يستجمع شجاعته ، ثم دلف إلى الغرفة ، بينما انطلقت زوجته إلى غرفة الاستقبال ، ولحى جلال وهو مقبل ، فقد كان مقعده مواجهاً للباب ، فنهض لاستقباله ونهض أبوه .

ومد حسين يده مصافحاً ضيوفه ، فقال أبو جلال معرفاً بنفسه :

— أنا مصطفى علوان .. ابني جلال .

فقال حسين :

— تشرفنا .. أنا حسين عبد المتعال .. أهلا وسهلا .. أهلا وسهلا .

اتفضلوا .

ومر بعض الوقت في ترحيب ، وجاءت نبيلة وهي تحمل هالة واقتربت من الغرفة تصغي ، وخطر لها أن تتخلص من هالة ، فعادت إلى غرفتها ، ووضعتها في السرير لتتيمها وتمددت إلى جوارها ، وإذا بنبيلة تنام ، بينا راحت هالة تعبث في شعرها .

وغادرت أحلام غرفة الاستقبال ، ومرت بالمكتب وتمهلت قليلا ، فرأت جلالا ينظر إليها مبتسما ، ثم يغمز لها بعينه في غفلة من الأبوين الغارقين في حديث تافه ، فأشرق وجهها والتمعت عيناها سهرورا ، وانسلت في خفة الغزال .

وغابت أحلام قليلا ثم عادت تحمل صينية عليها ثلاث صحاف في إحداها موز وفي الثانية « جاتوه » وفي الثالثة برتقال من الحجم الكبير ، ودقت باب الغرفة بطرف الصينية وجلال يرقبها ، وقد هم أن يخف إليها يحمل عنها الصينية ، ولكنه ثاب إلى رشده ، وبقي في مكانه ، وأحس أن والده بدأ ينظر إليه لما نهض حسين ليتناول من ابنته الصينية ، فتظاهر أنه يغض من بصره في حياء متكلف ، فابتسم أبوه ابتسامة عريضة فضحت فمه الحرب ، ورماه بنظرة لو ترجمت إلى ألفاظ ، لكانت « لا داعي للنفاق ، إنى أعرفك جيدا » .

ووضع حسين الصينية على منضدة صغيرة ، ثم حمل المنضدة وما عليها ووضعها أمام مصطفى علوان ، حتى كادت تلمس كرشه ، واختفت أحلام من عيني جلال ، ولكن سرعان ما عادت تحمل صنييه أخرى وانطلقت صوب غرفة الاستقبال .

واعتدل مصطفى في مقعده ، وتأهب للخوض في الحديث الذي جاءوا من أجله ، فنظر إلى جلال وهو يخفى موزة في فمه ، وقال :
— أتكلم أنا واللا تتكلم انت .. ما هو شبان اليوم عندهم مفتحه ؟
وضحك ضحكة طليقة ، ثم قال لحسين :
— أنا فاكرو يوم مارحت مع أبويا يوم كتب كتابي بقت سناني تتكتك
وركبي تخبط في بعضها .

وابتسم حسين ابتسامة باهتة ، حزر ما جاءوا من أجله ، فراح يجمع شتات نفسه التي ذهبت شعاعا ، كان يخمن الدافع لهذه الزيارة المفاجئة ، وكان يعد نفسه لها ، ولكن ما إن سمع كلمة « كتب الكتاب » حتى اضطرب وانقشع أمنه ، وسرت في صدره رهبة .

ومال مصطفى علوان نحو حسين وقال :
— جلال ده ابني ، أنا اللي ريته ، قدامي طيب مستقيم ، لكن من ورايا ما اعرفش ، مش عايز أغشك ، إذا وافقت على طلبه اسأل عليه ..
طالب إيد أحلام .. أحلام دى بنتنا ، بنحبها كلنا ، بس إياك جلال يعجبكم ويكون له قسمة ..

فقال حسين في صوت خافت مضطرب :

— ده شرف كبير لنا .

— أستغفر الله .. الجواز قسمه ونصيب .

وسمع وقع أقدام في الخارج ، فالتفت حسين فألقى زوجته منطلقة في
تأثر ، فالتفت إلى مصطفى وقال :

— عن إذنك .

— اتفضل .

وذهبت الزوجة إلى غرفتها ، وانطلق حسين خلفها مهرولا ، ودلفا
إلى الغرفة وإذا بحسين يرى في المرأة زوجته مطرقة وفي عينيها الدموع ،
وما إن أحست به حتى قالت في صوت تخنقه العبرات :

— عارف جاين ليه ؟

— عارف ، جاين يخطبوا أحلام .

وانفجرت الزوجة بالبكاء ، فدنا منها يربت على كتفها ويقول :

— مسير البنت تكبر وتسيب بيت أبوها .. أنا عارف إنها ح

توحشك .

فقالت وهي تشرق بدموعها :

— أنا مش بعيط على كده .

— أمال بتعيطى على إيه ؟

فقالت وقد استدارت وأخفت وجهها في صدره :

— بعيط على إن بقى لى بنت تتجوز .

وضمها إليه في حنان وقال :

— اطمنى ، مش ح تعجزى أبدا .
ومد يده ورفع ذقنها ، والتقت عيناه بعينيها ، وقال :
— ح تفضلى طول عمرك حلوه .
ثم قبلها قبله هادئة وقال :
— امسحى دموعك وروحي للناس .
فقالت وهى تجفف دموعها بيديها :
— و ح تقول لهم إيه ؟
— ح اقول لهم : إدونى مهله أفكر .
وسارت زينب وهى تقول فى أسى :
— هيه .. كلها سنه والا اتنين وابقى جده .
وذهب حسين إلى غرفة المكتب ، وانسلت زينب إلى غرفة
الاستقبال ، وما إن استقرت فى مقعدها حتى دوى صوت « بمب »
أطفال ، وصوت زمارة .
واستيقظت نبيلة على الدوى ، وبكت هالة ، فنهضت نبيلة وحملتها ،
وذهبت نائرة إلى غرفة الاستقبال وهى تقول :
— كده خضيتوا البنت .
وتظاهرت بأنها فوجئت بوجود أم جلال ، فتأخرت خطوة ، وإذا
بأم جلال تقول :
— خشى يا بنتى .. ما فيش حد غريب .
وتناولت الأم هالة ، وضمتها إلى صدرها ، وجلست نبيلة وتأهبت

لتطلق لسانها من عقاله وإذا بصوت ارتطام حذاء صغير بالبواب يستابع ،
وإذا برنين الجرس يدوى متصلا ، فقالت الأم :

— نبيله .. شوفى مين .

وقالت أحلام فى سداجة :

— ما فيش إلا سوسن وعاطف .. هى اللى تحط صباعها ع الجرس ما
تشيلوش إلا لما يتفتح الباب ، وهو يفضل يضرب الباب بجزمته .

وفتحت نبيلة الباب ، فدخلت سوسن ترتدى قناعا على وجهها
يتبعها عاطف ينفخ فى زماره وقد تمددت مثنائها حتى بلغت نهاية تمدها ،
فقالت له نبيلة :

— بس بقى .. ح تطق .

فقال لها عاطف وهو ينفخ :

— مال كيش دعوه .

وضربت سوسن « بمبة » .

وأرادت نبيلة أن تبعدهما ، وإذا بسوسن تفلت منها ، وتذهب إلى
غرفة الاستقبال .

رأتها أم جلال ، فقالت :

— أهلا .. أهلا .. ما تشيلى الوش ده وورينا حلاوتك .

وهزت سوسن كتفها ، وقد ثبتت عينها على الموز والبرتقال
والجاتوه ، وأرادت أمها أن تخرجها من الغرفة ، فقالت لها :

— سوسن .. بره .



.. كذا عبد الله ..

وقبل أن تتحرك سوسن ، دخل عاطف وصوت زمارته يسبقه ونبيلة
في أثره ، فقالت الأم في غيظ مكتوم :

— نبيلة .. خدى اخواتك من هنا .

فقالت أم جلال :

— سييهم .. كلنا عندنا عيال .

ورأى عاطف الصينية وما عليها ، فقال :

— موزة .. موزة ..

ودفعته أمه ، وإذا بمثانة الزمارة تنفجر ، فقال عاطف لأمه وهو

يبكى :

— أنا مالى . إنتى اللى طققتها .. ما حدى ح يدفع تمنا غيرك ..

وارتفع صوته بالعويل ، فأقبل أبوه وقال وهو بعيد عن الغرفة :

— عاطف .. تعال .. تعال أجيب لك واحد تانيه .

وحملته نبيلة ، وذهبت به إلى أبيه وهو يتلوى بين يديها ، وأخذته أبوه

في رفق وراح يربت على ظهره ويقول له :

— بس . ح اجيب لك عروسة كبيره .

فقال عاطف وهو يمسح دموعه .

— لا .. أنا عايز أتوميل .

وراحت الأم تنظر إلى نبيلة نظرات زجر لتنسجب ، ولكن نبيلة

أعرضت عن نظراتها .

وقالت أم جلال :

— أمال سامى فين ؟

فقالت أحلام :

— راح السينا .

وقالت أم جلال :

— عقبال ما يروح مع عروسته .

فقالت زينب :

— تسلمى .

ونفضت أم جلال ، فقالت زينب :

— ما بدرى .

— بدرى من عمرك . ابقوا شرفونا .

وسلمت على الأم وعلى نبيلة ، وعلى سوسن ، ثم طبعت قبلة على خد
أحلام .

وأسرعت أحلام تفتح الباب ، وسارت زينب وأم جلال وخلفهما
نبيلة وسوسن .

ونفض جلال وأبوه وحسين ، وانطلقوا صوب الباب ، وإذا بالجميع
يتقابلون عند الباب لأول مرة ، وانتهزت أحلام هذه الفرصة ، فراحت
ترنو إلى جلال فى حب وهو ينظر إليها مشرق الوجه مبتسما .

وجاء مراد ، وفى وجهه أثر شحم ، وقد اتسخت يده ، وفى ساقه
أثر تراب امتزج بعرقه ، وما إن رآته أمه حتى اربد وجهها ، وقالت فى
ثورة :



— غوله عملت فرح قالوا : إلهه سعيدة عليها وعلى أولادها —

— مش قلت لك ما تركبش عجل .

فقال فى بساطة :

— ما ركبتش عجل .

— أمال إيه الوساخته دى !

— ركبت موتوسيكل .

وشق طريقه بينهم وانطلق .

وانصرف الضيوف ، بعد أن تصافح الجميع ، وضغط جلال على يد
أحلام ضغطة خفيفة أحست أثرها فى قلبها الذى اشتد وجيبه ، وفى
وجنتيها اللتين اشتعلتا نارا .

واتجهت نبيلة إلى غرفة الاستقبال وحملت الصينية ، وانطلقت أحلام
إلى غرفة المكتب وعادت بالصينية الثانية، ووضعت الصينيتان على نضد
بالمطبخ، وإذا بالأيدى تتخاطف ما بهما ، وقالت نبيلة ، وهى تمد يدها
تأخذ قطعة جاتوه :

— غوله عملت فرح قالوا ليلة سعيدة عليها وعلى اولادها .

الفصل السادس

أتى المساء ، فنام عاطف كعادته على الأريكة في الردهة ، وفي قدمه فردة حذاء ، وقدمه الأخرى عارية ، وأقبلت سوسن تتمطى ودنت من أمها وقالت :

— ماما .. ماما .. عايزه أنام .

— روى نامى .

— حد يفرش لى السرير .

فقال أحلام :

— تعالى .. أنا داخلة أنام .

والتفت أحلام إلى أمها وأبيها وقالت :

— اتمسوا بالخير .

وسارت حتى إذا بلغت الردهة ، حملت عاطفا لتضعه في سريره .. وانطلقت إلى غرفة نوم الأولاد ، فإذا بمراد قد نام ورجلاه مستندتان إلى الحائط ، ورأسه مدلى عند منتصف السرير فلم تلتفت إليه ، وتقدمت إلى سرير عاطف ، ووضعت حملها فيه في رفق ، ثم ذهبت إلى غرفتها وسوسن في أثرها تردد في صوت ممدود كله تكاسل :

— عايزه أنام .

وتقدمت أحلام من سرير سوسن وأصلحت وضع وسادته ،
ورفعت الأغطية ، فأسرعت إليه سوسن وقبل أن تتمدد فيه قالت :
— غطيني .

وأحكمت أحلام وضع الأغطية حول سوسن ، ثم خلعت ثيابها
واندست في سريرها وقد أغمضت عينها لترى بعين خيالها أحلامها البهيجة
وأيمانها العذاب .

كان الزوجان يترقبان انصراف الأولاد ليتحدثا في نجوى ، ويتشاورا
في أمر خطبة جلال لأحلام ، ولكن بقاء سامي ونبيلة في الغرفة جعل صبر
الأب ينفد ويقول لهما :

— انتوا مش داخلين تناموا ؟

فقال سامي :

— لأ . أنا ح اذاكر .

وقالت نبيلة وهى تنهض :

— إذا كنت ح تذاكر هنا ح اسيب لك الأوده واروح اقرا في أودتنا .

فقال لها سامي :

— تعملى طيب .

وغادرت نبيلة الغرفة ، والتفت الزوج إلى زوجته وقال :

— الواحد وخمان النهارده ، ياللا نخش ننام .

ونهمض ونهمضت زوجته وسارا إلى غرفة نومهما .

ووصلت نبيلة إلى غرفتها ، فأضاءت النور ، وقطعت على أحلام حبل

أحلامها اللذيذة ، فقالت فى عصبية ، دون أن تفتح عينها حتى لا تفر
الرؤى العذاب :

— اطفى النور . خلىنا ننام .

وراحت نبيلة تخلع ثيابها وترتدى بيجامتها ، وقالت فى هدوء :
— ما تنامى .

فقالت أحلام وهى تتقلب فى غضب :
— ما اعرفش انام فى النور .

— وانا ما اعرفش اقرا فى الضلمه

— هو الواحد ما يعرفش يستريح فى البيت ده !

فقالت نبيلة وهى تتمدد فى السرير وفى يدها كتاب :
— هانت .. بكره تسييه وتستريحى منه على طول .

وتقلبت أحلام مرة ثانية فى حق ، ثم جذبت غطاءها وأخفت به
وجهها ، لتعيش فى الظلام تهيم فى دنيا جميلة من نسج خيالها .

ودخل الزوجان غرفتهما ، وأغلقا بابها عليهما ، واتجهت الزوجة إلى
هالة ، وأحكمت الغطاء حولها وهى تقول لزوجها :

— عرفت ماهية جلال كام ؟

— قالوا خمسة وعشرين جنيه .

— وتفتكر خمسة وعشرين جنيه تفتح بيت اليومين دول ؟ ح يسكن

بكام ويكسى بكام وياكل بكام ؟

وهز الزوج كتفيه ، ولم ينبس بكلمة ، وقالت الزوجة :

— قل لي : أبو جلال قال لك إيه ؟

— قال لي : إذا حصلت قسمة يجيبوا الشبكة ، ويقروا الفاتحة
ويأخروا الكتاب للدخلة .

— اسمع أنا بنتي لازم يتعمل لها فرح ، أنا مش بقى لي تمتاشر سنة متجوزه
لكن مش قادرة أنسى إني دخلت ع السكت ، الحكاية دى عملت لي
قرحة في قلبي ، كل ما افكرها انقبض وعينييه ترغرغ بالدموع . إيه اللي
خلانا عملنا كده ؟ إزاي قبلت انك تيجي لوحدك تاخذني زى اللي
نكون عملنا عمله .. دخلنا شقتنا نتسحب زى الحراميه ، لا طقت
زغروته ولا انقادت شمعة .

واقترب منها وقال وهو يلف ذراعه حولها :

— ياما ناس اتعمل لهم أفراح ولا عمروش .

— لكن برضه الفرع حلو .

وقال لها وهو يضمها إليه :

— الستر والتوفيق أحسن .

وابتعدت عنه في دلال وهي تقول :

— افكرنا نفسنا وح ننسى البنات ، قول لي ما عرفتش إذا كان ح

يسكن لوحده واللاح يسكن مع ابوه ؟. أنا بنتي ما تسكنش مع حد
أبدا .

— دى تفاصيل ما تكلمناش فيها ، مش لما نوافق ع الجواز قبله ؟

أتما خلع ثيابهما ، واتجها إلى السرير وتمددا فيه ، وقال الزوج وهو

يضع رأسه على ذراعه وينام على جنبه ، ووجهه في وجه زوجته :

— قبل ما نقول آه أولا لازم ناخذ رأى أحلام .

— ناخذ رأيها في إيه ؟

— في جلال . يمكن ما بتستظرفوش .

— أحلام لسه صغيره إيش عرفها بالكلام ده .

— أنا لما جيت أتجوزك مش خدوا رأيك ؟

— قالوا لي إنك جاي تخطبني ، قمت وديت وشي الناحيه الثانيه ،

قال إيه مكسوفه ، والحقيقه إني كنت فرحانه .. كل بنت بتفرح لما

تتخطب ، بتحس إن بقى لها قيمه ، وإن فيه راجل بيطلبها . فرحت

خالص مع إنك كنت غريب عني ، ما كنتش أعرفك خالص ، كنت

بالنسبه لي زي سر جميل .

— وعرفتني السر ده إمتى ؟

— بعد ما اتجوزنا . الحب ما يجيش الام العشرة .

— آمال اللي بيعحبوا بعض قبل ما يجوزوا ؟

— ده حب شيطاني . ما بيعمرش .

وقربت وجهها منه وقالت :

— قولي لي بتحب فينا إيه ؟

— باحب فيكم كل حاجه فيكم . كدبكم ، وزيطتكم ووجع

الدماغ اللي بتسببوه لي ، تعرفي آخر مره سافرت فيها ، لما جه الليل

ودخلت أودتي أنام حسيت إني وحيد ، ما ليش حد في الدنيا ، بقيت

أتلفت وأنا مقبوض ورغرغت عيني بالدموع ، اشتقت ساعتها لعياط
هاله ، وسآلة سامى ، ولت نبيلة .

وشرد قليلا ثم قال :

— الله احنا مالنا الليلة دى ينفكر نفسنا ونسى البنت .

الصبح لازم تسأل أحلام عن رأيها فى جلال .

— ح أسألهما وإن كنت واثقه انها ح تودى وشها الناحيه الثانيه

وتطاطى راسها .. يا ترى عيلة جلال شكلها إيه ؟

— هى ح تتجوز جلال واللاح تتجوز عيلته ، الرك عليه هو .

— الرك ع الأصل برضه ، الأصيل ما يعبش .

ثم تنهدت وقالت :

— بقى انا الى كنت بالعب أول امبارح فى الحاره بقى لى بنت

تتجوز !

— ما شفتكيش وانتى بتلعبى فى الحاره ، شفتك شابه حلوه .

— هو انت لحقت تشوفنى ، كنت مستعجل قوى ، ما لحقت

خطبتنى ما لحقت دخلت عليه .

— فافكره ليلة الدخله لما لقينا نفسنا فى الشقه لوحدنا ؟

ومدت يدها تطفيء النور ، وهى تضحك ضحكة خافتة وتقول :

— والنبى ما تفكر نيش ، دا احنا كنا عبطه قوى .

وامتزجت ضحكاهما الخافتة ، ونسيا ابنتهما وراحا يفكران فى

نفسيهما بكل حواسهما .

وانقضى الليل بأسراره ، ودبت الحياة فى الشقة ، فإذا بملابس النوم تلقى هنا وهناك ، وإذا بشجار وصياح وعويل وبكاء ، وإذا بأيد تمتد إلى الصحاف ولا ترتفع إلا بعد أن تصبح خاوية .

وخرج الأب والأولاد ولم يبق فى الشقة إلا أحلام وهالة وأمهما . راحت أحلام تلتقط الثياب المبعثرة ، وتملأ القلقل ، وتعيد تنسيق المكان ، بينما كانت الأم تغسل ثياب هالة وجوارب الأولاد ومناديلهم . ونادت الأم :

— أحلام . تعالى خدى الغسيل ده انشريه عندك .

وذهبت أحلام إلى الحمام ، ودنت من أمها ، فإذا بالأم تقول لها وهى تتظاهر بالانهماك فى عصر ثوب من ثياب هالة :

— عارفه إن جلال جه يخطبك امبارح ؟

ونظرت إلى ابنتها من طرف عينيها لتراها وهى تشيح بوجهها خجلا ، ولكن أحلام قالت فى هدوء :

— عارفه .

ولم تجد الأم مبررا لتتظاهر بالانشغال عن ابنتها لتخفف من حدة خجلها ، فما عادت البنات يخجلن من ذكر الزواج والخوض فى أحاديثه فوضعت الثوب على الصنبور ، وأسندت كفها على الحوض وقالت :

— وعارفه إنه يياخذ خمسة وعشرين جنيه ؟

— عارفه .

— وتفتكرى الخمسة وعشرين جنيه يكفوكو ؟

(أم العروسة)

فقال أحلام في حماسة :

— يا ماما لازم نبتدى من أول السلم ، نكافح سوا ، ويكون لنا هدف واحد ، نبتدى صغيرين ونكبر مع بعض ، عشان لما نعجز تكون لنا ذكريات مشتركة نعيش عليها ، انتى نسيى يا ماما بابا كانت ماهيته كم لما اتجوزتو ؟

— كانت ماهيته اتناشر جنيه ، لكن كانت أيام غير دى ، كانت أجره الشقه اتين جنيه ، ورطل اللحم الضانى كان بتلاته ونص .

— يا ماما احنا اتنين ، ح ناكل إيه ولا ح نشرب إيه ؟
— النهارده اتنين بكره ح تزيدوا .

— وكان ماهيتنا ح تزيد ، ومش ح نعمل زيكو ، ح نخلف واحد أو اتنين بالكثير .
— كان غير كم أشطر .

واقتربت أحلام من أمها وقالت :

— قولى لى : إيه هى أسعد أيامكم ؟ مش أيام جوازكم الأولى والأيام اللى اتولدت فيها واللى اتولدت فيها نبيله وسامى ومراد وسوسن وعاطف ؟ دانا فاكركه يوم ما اتولدت هاله ، كان بابا فرحان ، إحنا لما اتولدنا كنا عبء جديد عليكم ، وبرضه فرحتوا بينا ، مش كل الأعباء تزعل ، فى أعباء لذيدة الواحد يتحملها وهو مبسوط ، أنا أفتكر إن متاعب الكفاح من الأعباء اللذيذة . لما تزرعى شجرة وتتعبى فى زرعها مش بتنسى كل تعبك لما تشوفها كبيره ، كان الزوجه بترعى جوزها

وبتعب عشانه وبتحرم نفسها من كثير ، عشان توفر له الراحة ، وتبها
له الفرصة اللي يكبر فيها ، لغاية ما تشوفه كبير ، وساعتها تنسى كل
تعبها .

ونظرت أمها إليها فى دهش ، وهى صامته ، لم يدر بخلدها أن أحلام
ابنتها الطفلة ، التى كانت تحسب حتى الساعة أنها لا تفهم عن الحياة
شيئا ، تتحمس لخطبتها كل ذلك الحماس ، كانت تظن أنها ستدير
وجهها حياء ، حتى إذا ما ألحت عليها فى استطلاع رأيها قالت فى صوت
متهدج : (البركة فيكم . اعملوا اللي تشوفوه) .

ورأت الأم من الحكمة أن تساير ابنتها فى عواطفها ، وألا تحاول
تبصيرها بمستقبلها ، فقد أحست ضآلة نفسها بعد أن سمعت آراء ابنة
الأمس ، فقالت :

— يا بنتى احنا كل اللى عايزينه سعادتك ، وإن ربنا يهدى سركم .

والتفتت الأم صوب السماء وقالت :

— يا رب اجعل أيامهم أحسن من أيامنا .

فقالت أحلام وهى تبتسم :

— والللا زيا .

— والللا زيا يا بنتى . والله أيامنا ما كانت وحشه .

وأخذت أحلام الغسيل وغادرت الحمام لتنشره ، والأم تنظر إليها فى

إعجاب وعجب .

وراح الوقت يمر ، وعاد الأولاد من مدارسهم ، وبدأت متاعب

الغداء ، وارتفعت الأصوات ، وأقبل الزوج ، واتجه إلى غرفته ،
وأسرعت زوجته إليه ، فقال لها وهو يخلع جاكته :

— هيه . كلمتي أحلام ؟

— كلمتها .

— موافقة على جوازه ؟

— موافقه بس ! دا لو جاب محامي ماكنشى اتكلم له زى
ما تكلمت له .

— قالت لك إيه ؟

فقالت وقد التمت عيناها ببريق الإعجاب :

— قالت كلام ما عرفش اقوله أنا يا لى متجوزة بقى لى تمتاشر سنة .

ثم مصمصت بشفتيها وقالت :

— بنات آخر زمن .

الفصل السابع

وقفت أحلام أمام المرأة تديم النظر إلى وجهها ، ثم ترفع يدها وتصلح
الشعرات المبعثرة على جبينها ، واقتربت نبيلة منها ومررت يدها على
ظهرها لتذهب التقلصات التي كانت بثوبها ، ونظرت إلى ساقها مليا ،
فالتفتت إليها أحلام وقالت وهي تبتسم :

— إيه ، خط الشراب مش عدل ؟

فقالت نبيلة وهي تضحك :

— فين الشراب ده ، هو انتى لسه لبستيه ؟

ورفعت أحلام ثوبها ، والتفتت بنصفها الأعلى ، لترى بطن ساقها

وقالت :

— ما ايه .. بصى عدل .

فازداد ضحك نبيلة ، وقالت :

— ح تستعميني ، وانا نظرى سته على سته ؟

وصكت ضحكات نبيلة أذن سامى ، فخرج من غرفته ، وهو عارى

الصدر ، يرتدى بنطلونا قصيرا وجوريا وفردة حذاء ، وفى يده الفردة

الثانية وقال :

— إيه الضحك ده ، زمان جلال طالع ، يقول علينا إيه ؟

فقلت نبيلة وهى تشيح بوجهها عنه :

— إيه . ما نضحكش ؟!

— لأ ما تضحكيش .

— هو حكم قراقوش ده ، واللإيه ؟

— أيوه حكم قراقوش .

— اسمع . انت مالکش دعوة بيه . انت مش ولى أمرى .

— لازم تعرفى إني أنا مسئول عنك .

كانت الأم ترقب زوجها وهو يرتدى ثيابه ، فقلت له همسا :

— يا راجل اخرج لهم خليك حمش .

وخرج الأب لهم وقال فى صوت خافت :

— ما بس . زمان جلال طالع .

فقلت نبيلة فى عصبية :

— خليه يسكت عنى ، مالوش دعوه بيه ، دا مش عايزنى

أضحك .. مش عايزنى اتكلم .. مش عايزنى اتنفس .. يعنى أموت

يعنى ؟

فقال سامى :

— يا بابا مش سامعها بتضحك ازاي ؟

— يا بابا دا عامل نقره من نقرى .

ووقف الأب حائرا بينهما ، فأسرعت الأم لتضع حدا لهذا النزاع

فصاحت :

— خللى عندك دم انت وهى ، ياللا كل واحد منكم على أودته ، مش عايزه أسمع حس حد فيكم .

وانسحب سامى إلى غرفته ، ودخلت نبيلة إلى غرفتها ، فإذا بأحلام فى شغل عنهم جميعا بتنسيق وضع الشيكولاتة على الصينية ، كان همها إرضاء جلال .

ولمحت الأم مرادا وهو مقبل من أقصى الشقة ، وقد اتسخت ملابسه ، وتلوثت يدها بالخبز ، فصاحت فيه :

— مراد . خش اشطف والبس هدوم نظيفه ، زمان جلال طالع . فقال فى بساطة :

— وانا مالى ومال جلال ؟!

— لما يشوفك وسخ كده يقول إيه ؟

— يقول اللى يقوله ، هو جاى عشانى ؟

ونظر من خلال الباب فرأى أحلام ، فقال :

— اللى جاى عشانهم يتزوقواله .

فصاحت الأم فيه :

— خش اشطف بلاش قلة أدب .

وأسرع مراد إلى الحمام ، واتجهت الأم إلى زوجها ، وقالت :

— كلمه بصراحه .. اسأله إذا كان ح يسكن لوحده واللاح يسكن

مع أمه ، إذا كان ح يسكن مع أمه ماتوافقش ، إحنا لسه على البر ، واللا

ح تتكسف زى عوايدك ؟

فقال وهو يدس رجله في الحذاء :

— أكسف ازای !

— آه . دی بنتنا ولازم نریجها .

وصمتت قليلا ثم قالت :

— تعرف يا حسين أنا يوم ما اتخطبت قلبی ما دقش زى النهارده . أنا

مش عارفه مالى موهومه كده .. بخايفه .. إلا يا حسين سألت عليه
كويس ؟

— كل اللى سألتهم عنه قالوا إنه ابن جلال .

وسمع ارتطام حذاء بالباب الخارجى ، فصاحت الأم :

— نبيله ، افتحى لاخو كى .

وأسرعت نبيلة إلى الباب وفتحته ، وإذا بعاطف يدخل منفوش
الشعر ، فى وجهه آثار عرق ممزوج بالتراب ، وقد حمل فى يده فردة حذاء
وتدلى بتطلونه فبدت الفانلة من تحت قميصه القصير ، فصاحت نبيلة فيه
وهى تجذبه من يده :

— إيه الوساخه دى . تعالى .

وانطلقت به صوب الحمام وقالت لمراد :

— اغسله وشه وايديه معاك .

وتركته ، فانسبل مسرعا إلى حيث أمه ، فقالت له :

— روح اغسل وشك وتعال عشان ألبسك البدله الجديده .

فقال عاطف وهو يهز كتفه :

— قبله هاتى قرش .

— بعد ما تغسل وشك وتنضف ح ادبك قرش .

ودق جرس الباب الخارجى ، فقالت الأم :

— سامى افتح . جلال جه .

لكن رنين الجرس ظل متواصلا ، فقال سامى :

— دى سوسن .

— طب روح افتح لها .

وقال الأب وهو يرتدى جاكته وينظر إلى هندامه فى المرأة :

— الشيكولاته والملبس اللى اشتريتهم فى ؟

فقالت الأم :

— مع أحلام .

وأقبلت سوسن ، وفى يدها قطعة من كعكة عيد ميلاد واتجهت إلى

أبيها وقالت وهى تتمسح به :

— بابا اسمعنى جيرانا كلهم بيعملوا لأولادهم عيد ميلاد ، واحنا ما

بنعملش ؟

ومرر أبوها يده على شعرها فى حنان وقال :

— عايزه تعملى حفلة عيد ميلاد ليه ؟ عشان تاكلى جاتوه

وشيكولاته ؟ أجيب لك جاتوه وشيكولاته .

— لأ يا بابا . أنا مش عايزه أعمل عيد ميلاد عشان آكل جاتوه

وشيكولاته ، عشان أعزم أصحابى اللى بيعزمونى ، عشان يفرحوا

ويهبصوا معايا ، زى ما بفرح واهيص معاهم . النهارده بقيت قاعده معاهم مكسوفه ، لأنى عارفه إنى مش ح اجيبهم فى عيد ميلادى ، لأنى ما ليش عيد ميلاد .

واكتسى وجه الأب بسحابة من الحزن ، وظل صامتا يغالب مشاعره ، تحرك الحنان فى صدره فكاد يضعف ويعد ابنته بحفلة عيد ميلادها ، وإن كلفه ذلك ما لا يطيق ، وإذا بزوجه تجذب سوسن من يدها فى رفق ، وتقول لها فى صوت فيه رنة أسى وحزن ، وإن جاهدت أن ينبعث طبيعيا ، لا يشوبه ذلك الكدر الذى حرّكه حرمان ابنتها من أمنية عزيزة من أمنيتها :

— اسمعى يا سوسن ، اللى بيعملوا حفلات عيد ميلاد أولادهم بيكون عندهم ولد اتنين مش زينا ، احنا لو عملنا « عيد ميلاد » ح نعمل حفله كل شهر .

وتسرب ذلك الحديث إلى آذان الأولاد ، فأقبل سامى ونبيلة وأحلام ومراد وعاطف ووقفوا عند باب الغرفة يصغون ، وكأنما شاءت هالة أن تعلن عن وجودها فراحت تعبث فى أصابع رجلها وهى مستلقية فى سريرها ، تصيح صيحات متتابعة .

وانبرت نبيلة تشد أزر أختها قالت :

— بلاش نعمل لكل واحد فينا عيد ميلاد ، نعمل عيد ميلاد واحد لنا

كلنا .

فقالت الأم :

— ونختار تاريخ الحفلة دى ازاي ؟

فقال سامى وهو يشمخ بأنفه :

— تتعمل فى عيد ميلادى أنا ، لأنى أنا أكبر ..

ولم تتركه نبيلة يتم جملة ، وقالت مقاطعة :

— ليه الأنانيه دى ؟

وقالت الأم منتبهة هذه الفرصة لتتخلص من هذه الورطة .

— ح تتخنفوا ! ياللا كل واحد فيكم على أودته .

وقالت أحلام فى هدوء :

— ولا خناق ولا حاجة . نعمل الحفلة دى فى عيد ميلاد بابا .

وصاح الأولاد كلهم موافقين :

— أيوه عيد ميلاد بابا .

واندفعوا إليه يلتفون حوله ، وأمسكت سوسن بينظلونه وصاح

مراد :

— يحيا بابا .

ودق جرس الباب ، فقال الأب :

— جلال جه . ياللا يا سامى افتح له ودخله أودة الاستقبال .

وخرج سامى ، وانسلت أحلام ونبيلة من الغرفة ، وقالت الأم

لمراد :

— ياللا روح اقلع هدومك الى زى الزفت دى ، يا نبيلة خدى

عاطف لبسيه .

وعادت نبيلة وتناولت يد عاطف وخرجت به ، وأسرعت سوسن
لتنظر إلى جلال من بعد ، وبقي الزوجان وحدهما في الغرفة ، فقالت الأم
في مرارة :

— طبعاً يحبوك ويكرهوني أنا . ما انت دائماً تصدرني لهم . أنا اللي
أقول ما فيش فساتين .. ما فيش بدل .. ما فيش جزم .. ما فيش
خروج .. ما فيش فلوس .. إزاي يحبوني .. أنا من بعد النهارده ما ليش
دعوه بأولادك . انت اللي تربيههم :

فاقترب منها وقال :

— إنتي زعلتي ؟! أهم ولادى وولادك .. دول ما يقصدوش .
— دى مش أول مره . دول بيعاملونى زى ما اكون مرات أبوهم .
فقال وهو يبتسم :

— ولا يهملك . كفايه انك تكونى أمى أنا .

وأسرع عاطف ، بعد أن ارتدى ثياباً جديدة ، إلى غرفة الاستقبال ،
ووقف ببابها بالقرب من سوسن ينظر .

كان جلال جالساً في المقعد المواجه للباب ، وكان سامى إلى جواره ،
وقد ساد الصمت بينهما . ولمح جلال عاطف ، فقال له وهو يهيم
لاستقباله :

— تعال .

فقال عاطف وهو يهز كتفه :

— لأ ..

— تعال عشان أديك حاجه حلوه .

فقال عاطف وهو يتقدم :

— هات قرش قبله .

واربد وجه سامى وصاح فى عاطف :

— ح اقطم رقبتك .

وقال جلال :

— سييه .

وانطلقت سوسن كالعاصفة إلى حيث كان والدها وقالت :

— ماما .. ماما .. إلحقى . عاطف بيشحت من جلال قرش .

فقالت الأم فى عصبية :

— امشى هاتيه ، هى العيال دى ما تسترش أبدا .

ومد الزوج يده إلى عقدة الكرافتة وأصلحها ، ثم سار إلى غرفة

الاستقبال ، وزوجته توصيه :

— ما تنكسفش .. إذا كان ح يسكن مع أمه الله الغنى عن دى

جوازه .

ودخل الأب الغرفة ، فنهض جلال لاستقباله ، وتصافحا ، وانسل

سامى من الغرفة وراح يبعد إخوته عنها ، فيسمع الأب وجلال

همهمتهم ، فيرفع الأب صوته بالترحيب ليغطى الضوضاء المنبعثة من

الخارج :

— أهلا وسهلا . إزاي والدك ؟

— بخير والحمد لله .

واعتدل الأب في جلسته ، وراح يجمع شتات نفسه ، فقد كان مقبلا على حديث خطير ، قال :

— أنا كل الى سألتهم عنك قالوا إنك طيب وابن حلال ، وأنا يا بني يشرفنى إني أدى لك بنتى ، بس أحب أقول لك إن العيشه اليومين دول صعبه ، كل حاجه غاليه ، فكرت ح تسكن بكام وح تعيش ازاي ؟ أيام أنا ما اتجوزت سكنت باتنين جنيه ونص ، وكل الى كنت باصرفه على البيت ثلاثه جنيه ، كنت عايش بالمبلغ ده عيشة أمرا .. كنت باكل تفاح وموز وفراخ وحمام ، وبالبس حرير وصوف إنجليزى ، أفصل كل ست اشهر بدله جديده .. كان القسط الى بدفعه للترزى خمسين قرش .

وسمع طرق خفيف على الباب ، فالتفت الأب فرأى أحلام وبين يديها الصينية ، عليها صحاف من بلور ، نسقت فيها الشيكولاتة والملبس والجاتوه ، فنهض ليأخذ منها الصينية ، فإذا به يرى أبناءه جميعا قد اصطفوا خلف أحلام ، كانوا أشبه بالقطط التى جاءت على رائحة السمك .

وضع الأب الصينية أمام جلال وقال :

— اتفضل ..

ومد جلال يده وتناول قطعة شيكولاتة ، بينا راحت أحلام تبعد أخواتها عن الغرفة فى رفق وتحول بينهم وبين الهجوم على الصينية المشتهاة .
ووجد جلال الفرصة سانحة ليتحدث ، فقال :

— حكاية الشقه فرجت .



كانت فرصة ذهبية أن يتفردوا بالشيكولاتة والملبس والجأتوه

— إزاي ؟

— بابا اتنقل المنصوره ، ح ياخذ ماما معاه ، وح يسيب لى الشقه .
وأحس الأب راحة ، فقال وهو يزفر فى اطمئنان :
— عال .

— أما الأكل واللبس ..

فقاطعه الأب قائلا :

— الحاجات دى كلها مقدور عليها .

ونفض الأب مستأذنا ، وأسرع إلى زوجته يزف إليها النبأ ، ويطمئنئها
أن ابنتها لن تعيش مع حمااتها تحت سقف واحد .

واستطاع عاطف أن ينسل فى غفلة من الجميع إلى غرفة الاستقبال ،
وأن يذهب مباشرة إلى الصينية ، وأن يغتنم الفرصة لينفرد بما فيها وحده ،
وجلال يعاونه على فض أغلفة الشيكولاتة ، وفطنت سوسن إلى غياب
عاطف ، وإلى تسربه إلى غرفة الاستقبال ، فخفت تشاركه الغنيمة .
وأراد الأب أن يعلن بطريقة عملية أن جلالا قد صار فردا من الأسرة فأذن
لأولاده جميعا أن يشاركونه جلسته .

وأقبل الجميع يسلمون عليه ، ودخلت الأم وصافحته فى شوق ، وما
أن جلس الأولاد حتى رأوا فتك عاطف وسوسن بالشيكولاتة ، فخف
كل منهم إلى الصينية ليأخذ نصيبه .

وجاءت أحلام ، ومدت يدها إلى جلال ، فإذا به يضغط على يدها
فى حب ، والتقت عيونهما لحظة ، كان لها فى نفسيهما وقع السحر ،

واتجهت إلى كرسي قبالته وجلست ، فشاع في المكان جو عجيب من الحب والهيام ، ما كان يعكره إلا الأيدي الممتدة إلى الصينية في تتابع ، ونظرات الزجر التي كانت تسدها الأم إلى أبنائها ، والتي كانوا يشيخون بوجوههم عنها ، كانت فرصة ذهبية أن ينفردوا بالشيكولاتة والملبس والجاتوه ، وأن يلتهموا ما يشاءون كما يشتهون تحت بصر أمهم وسمعها ، دون أن تقدر على زجرهم ، فرصة قلما يجود الزمان بمثلها !.

الفصل الثامن

أراد جلال أن يعلن أصهاره أن في أسرته من يمتلك سيارة ، فدعا شفيق ابن خاله ليذهب معه في اليوم المحدد لقراءة الفاتحة ، ودفع المهر والاتفاق على يوم الزفاف .

ووقفت السيارة أمام بيت حسين ، وهبط منها جلال وأمه وأبوه وشفيق ، كان شفيق شابا في الرابعة والعشرين ، طويل القامة ، عريض المنكبين ، خفيف الظل ، من ذلك الطراز الذي تهفو إليه القلوب من أول نظرة .

وكان عاطف وسوسن واقفين عند باب البيت ، فلما رأى عاطف جلالا ، أسرع بحبيه ، فمد له يده مصافحا وقال :

— أهلا صاحبي ، انت جيت ؟

ورفعه جلال بين ذراعيه وقال له وهو يقبله :

— أهلا عاطف ، ازيك .

ووضعه على الأرض ، فرفع رأسه وقال :

— هات قرش بقى .

فوضع جلال يده في جيبه وأخرج قرشا ، ووضعه في كفه ، فقالت سوسن كأنما تعلن عن وجودها :

— انخص يا عاطف ، ح اقول لاما .

فقال لها عاطف :

— وانتى مالك ؟

— يا شحات .

ومد جلال يده فى جيبه وأخرج قرشا آخر وأعطاه لسوسن ،
فتمنعت تمنع الراغب ، ثم أخذت القرش فى خفة ، وقالت لعاطف :
— تعال لما اشترى لك حاجه .

وابتعدا وجلال ينظر إليهما وهو فى طريقه إلى البيت ، وقد وسع
خطاه ليلحق بأهله الذين سبقوه إلى السلم .

ودق الجرس ، فإذا بحسين يفتح الباب فى سرعة ، فقد كان يرصد
مقدمهم ، ورحب بهم وقدم مصطفى علوان شقيقا إلى حسين ،
وجلسوا يتبادلون عبارات الترحيب ورائحة البصل المحمر فى السمن تملأ
أنوفهم .

كان المطبخ على قدم وساق ، أحلام تغرف الطبخ فى الصحاف ،
والأم تحمر الدجاج ، ونبيلة وسامى ومراد يغدون ويروحون بين المطبخ
والسفرة يحملون الصحاف والخبز والماء المثلج .
وقالت الأم :

— روحى انتى يا أحلام غيرى هدومك .

فقال نبيلة ، وهى تجفف يديها فى « الفوطة » التى كانت ترتديها

فوق ثوبها :

— واشمعى أحلام ، ما اروح أنا رخره أغير هدومى .
فقال سامى متحديا ومتأهبا للشجار :

— هو ما فيش حد بيعمل حاجه ، إلا لازم تعملى زيه ، ما تقولى لازم
أتجوز أنا رخره .

— وانت حاشر نفسك فى كل حاجه ليه يا بايخ ؟
فقال الأم :

— هس .. انكتموا وخللو عندكم دم ، الناس جوه . ياللا غوروا
كلكم من وشى . مش عايزه حد منكم هنا .

وانسلوا من المطبخ ، وراحوا يرتدون ملابسهم . كأنما كانوا فى
سباق ، وخرج سامى من غرفته يرتدى الحذاء والقميص والجاكتة ،
وهو يهرول صوب غرفة الاستقبال ، وإذا بعاطف يضحك ضحكات
عالية ، وأطلت أحلام ونبيلة برأسيهما ، ومراد يقول :

— سامى ح يقابل الناس من غير بنطلون .

ونظر سامى إلى ساقيه العاريتين ، ثم عاد مهرولا إلى غرفته ، فقامت
له نبيلة وهى ترمقه فى زراية :

— بلاش خفاقة والنبي .

وأتمت أحلام ارتداء ملابسها وتقدمت فى تودة إلى غرفة الاستقبال ،
وما إن لحها مصطفى علوان حتى قال مرحبا :

— أهلا .. أهلا بعروستنا .

ونهبوا جميعا لاستقبالها ، وصافحتهم واحدا واحدا ثم استدارت

لتجلس في كرسي بعيد ، فقال شفيق وهو يفسح لها مكانا إلى جوار جلال :

— ح تروحي فين ، محللك بقى هنا .. جنبه .
وأطرقت رأسها حياء ، ثم اتجهت إلى الكرسي المجاور لكرسي جلال وجلست .
وجاءت نبيلة في خطوات راقصة ، وتقدمت ثابتة الخطو وسامى ومراد خلفها ، وقالت وهى ترفع يدها إلى رأسها بالتحية :

— السلام عليكم .

ورد الجميع :

— وعليكم السلام ..

واتجهت إلى مقعد مواجه لمقعد شفيق وجلست ، وقعد بالقرب منها سامى ومراد .
ولاحظت أم جلال أن نبيلة تطيل النظر إلى شفيق فى استغراب ، فقالت :

— شفيق ابن خال جلال ، كانوا سوا فى المدرسة ، انتقلوا مع بعض من فصل لفصل ، لغاية ما خلعوا الجامعة سوا .
وأقبلت زينب وصافحت الجميع ، وما إن استقرت فى مقعدها ، حتى أخرج جلال من جيبه علبة صغيرة من الخممل الأحمر ، وفتحها وتناول منها دبله راح يضعها فى أصبع أحلام ، وقد أطرقت خجلا ، وإن كانت كل خالجة فيها تنطق بالفرح .

وقال له شفيق :

— جيلك . مالك مستعجل كده ؟

فقال والد جلال :

— خير البر عاجله .

والتفتت أم جلال إلى زينب وقالت :

— ما فيش حد يعرف يزغرط ؟

ولم تنبس زينب بكلمة ، كانت الدموع تترقرق في مآقيها ، وأحست
أن الأنظار ستوجه إليها ، فنهضت وقالت :
— اتفضلوا .

وقام الجميع ، وقال شفيق وهو يفسح الطريق لأحلام وجلال :
— العريس والعروسة الأول .

فقال جلال لوالده ووالد أحلام ، وهو يشير بيده :
— اتفضلوا .

فقال مصطفى علوان وهو يبتسم :

— انتم الأول النهارده — دا احنا ما جيناش إلا عشانكو .

وتقدم جلال وأحلام ، ثم سار الجميع خلفهم ، ومراد يشق طريقه
بينهم ، والتفت شفيق ، فإذا بنبيلة تسير إلى جواره جنباً إلى جنب ،
فرفت على شفتيه بسمه رقيقة .

وجلسوا حول المائدة ، جلال وإلى جواره أحلام وإلى جوارها والددة
جلال ، ثم نبيلة فسامي ، وجلس مصطفى علوان في صدر المائدة ،

وجلس حسين أمام جلال وإلى جواره زوجته ثم شفيق ومراد .
ومدت أم جلال يدها ، ورفعت الأطباق من أمام أحلام وقالت :
— النهارده تاكلى انتى وجلال فى طبق واحد ، عشان ما تفترقوش عن
بعض أبدا .

وأطرقت أحلام حياء ، وقالت أم جلال لابنها :
— اقطع لقمة وغمسها فى الملح وكلوها سوا ، عشان يبقى بينكو
عيش وملح .

وابتسم جلال ، وبقي مترددا برهة ، فقال شفيق مشجعا :
— يللا يا جلال ياللا .

وتناول جلال لقمة خبز غمسها فى الملح ، ثم قسمها جزأين ، وغيب
جزءا فى فمه ومد يده بالجزء الآخر إلى فم أحلام فالتقمته وقد تضرع
وجها بلون الدم ، والتقت عينا شفيق بعيني نبيلة ، فإذا بها تنفجر
ضاحكة ، فسددت إليها أمها نظرة زجر قاسية .

وقال حسين وهو يشير بيده إلى الطعام المكدس على المائدة :
— اتفضلوا .

وقال شفيق وهو يغرف الحساء بالمغرفة :
— ياما حضرت خطوبات كثير ، وكتب كتاب وأفراح ، ماشفتش
حكاية العيش والملح دى ولا الأكل فى طبق واحد .

فقال حسين وهو يبتسم :

— اللى يعيش ياما يشوف .

فقال مصطفى وهو يضحك :

— مهما عاش مش ح يشوف اللى شفته .

والتفت إلى زوجته وقال مداعبا :

— الست دى ياما ورتنى ، ورتنى كثير .

ورمقته زوجته من طرف عينيها وقالت :

— يا راجل عيب .

— هو انا قلت حاجه ! أنا قلت إنك ورتينى كثير ، لكن ما قلتش

ورتينى إيه ، يمكن ورتينى حاجات حلوه كثير .

وشاع السرور ، وتوجت الابتسامات الشفاه ، وراح جلال وأحلام

يتناولان طعامهما فى طبق واحد ، وتعمد جلال أن تمس يده يد أحلام ،

والتقت عيونهما أكثر من مرة فى لمحات كانت أفصح من حديث طويل .

وانتهز مراد فرصة انشغال الجميع فى الحديث ، فترك الشوكة

والسكين وراح يعالج قطعة الدجاج بيده .

وعلى حين فجأة ارتفع بكاء هالة ، فوقف فم أمها عن الحركة ،

وقطبت جبينها ، ثم التفتت إلى نبيلة وقالت :

— هاتى أختك .

ونفضت نبيلة وغادرت المائدة ، وصوت هالة يدوى فى المكان ،

وأراد مصطفى أن يزيل ذلك الحرج البادى على وجه أمها وأبيها فقال :

— عقبال ما نفرح بيك يا شفيق .

فقال شفيق وهو يدس ورك دجاجة فى فمه :

— قريب إن شاء الله .

فقلت له أم جلال :

— ما كنت بتقول مش ح تتجوز أبدا .

فقال حسين :

— الجواز نص الدين .

فقال شفيق مبتسما :

— دا النص الحلو فيه .

وعادت نبيلة تحمل هالة ودفعت بها إلى أمها ، فأجلستها على فخذاها ، وراحت هالة تعبث بكل ما تصل إليه يدها ، عبثت بالشوكة مرة ، وبالسكين مرة أخرى ، ثم وضعت كفها في طبق به ملوخية ، ورفعته ومررته على وجه أمها ، وتحملت الأم مضايقات ابنتها في صبر ، وإن كان الحنق يكاد يمزق صدرها .

وانتهوا من تناول طعامهم ، فغادروا المائدة وعادوا إلى غرفة الاستقبال إلا مصطفى وحسينا اتجها إلى المكتب .

وأخرج مصطفى من جيبه رزمة أوراق مالية ، ودفع بها إلى حسين ، وهو يقول :

— الشقه بعد أسبوعين ح تكون فاضيه ، اللي تشتروه تقدرؤا تبعته

على هناك على طول .

فقال حسين وهو مأخوذ :

— إن شاء الله .

— ربنا يتمم بخير .

ولاحظ مصطفى أن حسينا يعاني ذلك القلق الذى يحسه المقدم على مغامرة ، فقال له ليرفه عنه :

— دا كل شىء قسمه ونصيب ، أنا ربنا رزقنى بالست بتاعتى كانت سبب سعدى ، فهمتها وعرفت بركتها فين ، ماكتتش أعمل حاجة إلا لما آخذ رأيها فيها ، وإن قالت يمين أنا أعمل شمال ، أعمل عكس رأيها على طول ألاقى الحاجة مشيت وبقت عال .. ده توفيق كبير .. رضا .
وابتسم حسين وقال :

— إن اتزفنا فى حاجة نبقى ناخذ رأيها .

— خلاص بقى بقينا أهل ، وادى انت عرفت السر .
ونهض مصطفى وقال :

— بللا نقعد مع الأولاد .

واتجهوا إلى غرفة الاستقبال ، ودخل مراد إلى الشرفة ينظر ، فرأى عاطفا وسوسن يعثان فى سيارة شفيق ، ويفرغان الهواء من إحدى العجلات ، فأسرع إلى أبيه وقال له هامسا .
— عاطف وسوسن فسوا عجلة الأوتومبيل .

فأشار الأب برأسه إلى سامى أن يتبعه ، وخرج من الغرفة ومراد معه ، فإذا بسامى ينهض ويتجه إليهما ، وقال الأب :
— العفارىت فسوا عجلة الأوتومبيل ، لازم تنفخها بأى طريقه .
فقال سامى :

— آخذ مفاتيح العرييه من شفيق واشوف عنده منفاخ ، وأنفخها .
فقال الأب لسامى :

— أنا عايزك تنفخها من غير ما يعرفوا .
فقال سامى :

— ح انفخها ببقى !

وقال مراد :

— أنا اروح للعجلاتى . وح اخليه يجيب منفاخه وييجى ينفخها .
والتفت الأب إلى سامى وقال له :

— هو انت ما تعرفش تتصرف أبدا ؟

وهو رول مراد منصرفا ، وعاد الأب وسامى خلفه شاخا بأنفه ، وما
إن لمحته الأم حتى نادى :

— سامى ، تعال .

ودنا منها ، فقالت له هامسة :

— خد نبيلة وروحوا شيلوا الأطباق والحاجه من على الترايزه .

والتفت ناحية نبيلة ، فألفاها تتحدث مع شفيق وجلال وتضحك ،
فراها فرصة سانحة ليعكر صفوها فقال بصوت عال :

— نبيله . تعالى .

والتفت إليه نبيلة فى ضيق وقالت :

— إيه ، عايز إيه ؟

وأحست الأم بداية العاصفة ، فقالت فى حزم :

— نبيلة روى معا .

وسار سامى ونبيلة خلفه ، حتى إذا ابتعدا عن الغرفة قليلا ، قالت :

— نعم ؟

فأشار إليها بأصبعه ناحية المائدة ، فقالت له فى غيظ :

— ما تنطق عايز إيه ؟

— عايزينك تشيل الأطباق اللى ع الترايزه .

— وكانت قد وصلوا إلى المائدة ، فراح سامى يستعرض ما عليها بنظرة

ازدراء ثم قال :

— أنا عارف هوام إيه اللى ياكلوا ويسيبوا الترايزه بالشكل ده !

— إذا كنت ح تشتغل ، اشتغل من غير ما تنفـس بكلمه أحسن لك .

وراحا يتنقلان بين المائدة والمطبخ ، يحملان الملاعق والسكاكين والشوك والصحاف ، دون أن يتبادلا كلمة . كان سامى يحمل الأشياء وذراعا مبهـوطتان حتى لا تتسخ ثيابه ، بينما تسير نبيلة على أطراف أصابع قدميها ، كأنها ترقص على مسرح .

وبدأت فى جمع الفوط ، ووجدت كوبا موضوعا فوق فوطة ، فجذبت الفوطة بقوة ، فصارت فى يدها بينما ظل الكوب على المنضدة . ورأى سامى ما فعلته ، فأراد أن يقلدها ، جذب فوطة ليخلصها من طبق موضوع فوقها ، فصارت الفوطة فى يده ، ولكن الطبق سقط على الأرض ودوى صوت تكسره ، وصك الصوت أذنى الأم فضمت هالة إليها فى غيظ ، وإن ظلت البسمة تتوج شفتيها .

ولاحظ مصطفى كثرة تلفت حسين صوب الباب ، فقام وقال :
— نستأذن بقى .. يللا يا جلال .

فقال شفيق :

— إذا كان على جلال مش عايز يمشى أبدا .

وقال حسين وزوجته :

— والله ما انتو نازلين دلوقت . بدرى .

واتجه حسين إلى مصطفى وقال له وهو ينظر فى الشرفة ، ويرى مراد

و« العجلاقي منهمكين فى نفخ عجلة السيارة .

— والله لانت قاعد .

وقال شفيق وهو ينهض :

— ما تيجو معانا فى العربية تشموا هوا .

فقالت زينب وهى تنظر إلى هالة :

— والأولاد !

— ييجوا معانا .

فقالت الأم وهى تبتسم :

— هو دا معقول . فيه عرييه تاخدنا كلنا إلا إذا كانت أمنيوس .

واشرأب حسين بعنقه ، ونظر من خلال الشرفة ، فوجد مرادا

والرجل منهمكين فى نفخ العجلة ، فقال وهو يجلس :

— والله ما انتوا نازلين دلوقت . اقعدوا شويه .. اقعدوا .. قهوه

يا نبيله .

فقال مصطفى :

— والله ما احنا قادرين نشرب حاجه ، نقعد ولا نشربش .

فقال حسين وهو يتنفس في راحة :

— طب اقعدوا .

وجلسوا ، وأقبلت نبيلة وسامى ، وقال شفيق وهو يحاول أن يقهر

نفسه ويرغمها على عدم التطلع إلى نبيلة :

— طب نيجى بكره ناخذكم ونتفسح شويه .

فقالت زينب :

— كتر خيرك ، وما تتعشى نفسك ، مش ح نقدر نخرج .

وقال جلال ، دون أن يحيد نظره عن أحلام :

— ناخذ الأولاد .

وضحك مصطفى وقال :

— ما بلاش لف ودوران وتقولوا إنكم عايزين تفسحوا أحلام .

وأطرقت أحلام في خفر ، وقالت نبيلة في بساطة :

— ليه ما نتفسحش بكره ، ما فيش ورانا حاجة ؟

وحدجتها أمها بنظرة تأنيب ، وقال لها أبوها :

— انتى حاشرة نفسك ليه ، هو حد عزملك ؟

وقال سامى :

— زى البصل محشوره فى كل حاجه .

وقال شفيق :

— بكره نيجى ناخذ أحلام وسامى ونبيله .

وقالت الأم :

— والنبي ما تفتحش على نفسك الفاتحه دى .

وقال سامى :

— بكره الساعه خمسہ تلاقونا جاهزين .

وجاء مراد وفى يديه ووجهه آثار شحم ممزوج بالتراب ، والعرق يتفصد من وجهه، ووقف بعيدا وجعل يشير لأبيه بيديه أن النفخ قد انتهى ، وأنه يريد نقودا للرجل .

وهم أبوه بالذهاب إليه ليعطيه ما يطلب ، ولكن الأم محتة ،

فصاحت :

— درمغت نفسك فى إيه كده ، ركبت عجل تانى ؟

فقال مراد وهو ينظر إلى أبيه :

— هو عارف .. هو اللى قال لى .

— قال لك تدرمغ نفسك كده !

وكان أبوه قد وصل إليه ، وأعطاه نقودا فانصرف مهرولا ، ورأت

الأم ذلك فقالت لزوجها فى تأنيب :

— بقى يوسخ نفسه وتديه فلوس ! أنا مش فاهمه .

وأحست أن الأنظار اتجهت إليها ، فكظمت غيظها وقالت :

— أهلا وسهلا . شرفتونا .

وقال مصطفى وهو ينهض :

— نستأذن بقي .

وقال حسين :

— خليكو على راحتكو .

وكان ذلك إيذانا بالانصراف ، فنهض الجميع وراحوا يتصافحون ، وقد اختلطت أصواتهم ، وظل جلال يهمس بحديثه لأحلام ، وكان آخر من انصرف :

وخف حسين وزوجه وسامى وأحلام ونبيلة ومراد الذى عاد بعد أن أعطى الرجل نقوده إلى الشرفة يرقبون ضيوفهم وهم ينصرفون .
أسرع شفيق يفتح أبواب السيارة ، وتقدم مصطفى وزوجته فى تودة ، بينما حمل جلال عاطفا بين يديه وقال له :

— عملت إيه بالقرش ؟

— اشتريت طباشير .

— فين هو ؟

— خلص . كتبت بيه ع الأنومبيل .

ونظر جلال إلى السيارة فإذا بها قد غطيت بخطوط ودوائر بيضاء ، وأن بابها كان أشبه بسبورة كتب عليها : زرع . درس . وزن . فقد شارك سوسن أخاها فى استهلاك الطباشير .

ووضع جلال عاطفا على الأرض ، وضربه مداعبا على مؤخرته ، وقال له :

— اطلع على فوق .

ورفع بصره ، فانجذب إلى أحلام ، كأنما لم يكن في الشرفة غيرها ،
فابتسم لها ولوح بيده مودعا ، ثم سار إلى السيارة وركب إلى جوار
شفيق .

وغابت السيارة عن العيون ، فقالت الأم :

— ياللا . كلكوع المطبخ .

وقالت نبيلة :

— يا ماما ورايا مذاكرة .

— اشمعنى المذاكره حليت دلوقت ؟ قدامى ع المطبخ اللى سايينه
لايص وواقف على رجل .

وانسلت أحلام ونبيلة وسامى ومراد ، وبقي الزوجان وحدهما فى
الغرفة ، فالتفتت الزوجة إلى زوجها وقالت :

— هيه . عملت إيه مع مصطفى ؟.

— دفع لى المهر .

— وقلت له إن النجف والمشمع وحاجة المطبخ عليه هو انه يجيبها ؟

— ما قتلوش .

— ما قتلوش ليه ؟

— ما جتش فرصه .

— ما جاتش فرصه واللا انت انكسفت ؟

— والله أنا مش فاهم الكلام ده . اشمعنى العريس يجيب النجف

والمشمع وحاجة المطبخ ؟.

(أم العروسة)

- الدنيا كلها ماشيه على كده .
- ما شفتش حد ماشى على كده إلا انتو .
- قصدك تقول إننا خليناك تجيب حاجات ما حدش يجيبها ؟!
- كل العرسان بتجيب الحاجات دى ، وان ما كنتش مصدقنى اسأل .
- ولا بسأل ولا حاجه .
- بلاش ، أصل فلوسك كثير ، قال على رأى المثل .
- ما تقولى المثل إيه .
- أنا عارفه ؟!
- وذهبت إلى المطبخ ، وانطلق خلفها ليعاون أولاده ، وهو يغمغم :
- قال على رأى المثل : « عقلك فى راسك ، اعرف خلاصك » .

الفصل التاسع

كانت الردهة خالية ، ولكن لم يكن للصمت فيها مكان ، فالأصوات منبعثة من غرفة الوالدين ، وغرفة الأولاد وغرفة البنات ، كان الجميع يتكلمون وما كان أحد يصغى إلى ما يقال ..

وقالت الأم :

— بس يا مراد ، انزل يا عاطف من ع الكرسي ، وانتي يا سوسن ابعدي من هنا بلاش وجع دماغ .. أوه يا سامي بلاش مناهده بقى .. ما كفايه يا نبيله كلام .

فكانت أشبه بمذيع فى مباراة كرة حامية .

وخرجت أحلام من غرفتها ، ترتدى ثوبا ورديا ، ضاق عند خصرها غاية الضيق حتى ليحار المرء إذا ما فكر كيف مر ذلك الثوب من صدرها الممتلئ عند ارتدائه ، واتسع غاية السعة عند طرفيه ، وزينت جيدها وأذنيها وصدرها بعقد وأقراط و « بروش » من طراز واحد ، وكان شعرها ينطق ببراعة الحلاق .

ومرت فى الردهة ، والأصوات تتناثر هنا وهناك ، فلم تحفل بها ، كانت مشغولة بنفسها تعيش للحظة التى سيقدم فيها جلال لياأخذها لأول نزهة بكل حواسها ، والتفتت إلى الساعة المعلقة فى الردهة ، فإذا

بها الخامسة إلا خمس دقائق ، فقالت :

— ياللا يا نبيلة زمانهم جاين .

فقالت نبيلة وهى تديم النظر فى وجهها فى المرأة :

— أنا خلاص لبست .

وقال سامى وهو يحاول أن ينيم شعره الذى كان أشبه بعرف الديك :

— وانا جاى اهه .

ودنا مراد من أبيه وقال فى غضب :

— واشمعنى سامى الى يروح معاهم ؟

فقالت له الأم :

— المرة الجايه تروح معاهم .

وقال سامى فى غطرسة :

— حتى انت ليك نفس ، يا شيخ روح طلع الخير من صوابك قبله .

وقال مراد فى عناد :

— لازم اتفسح النهارده . ماليش دعوه .

ودنت سوسن من أمها وقالت :

— عايزين نتفسح — اشمعنى هم يخرجوا ؟

وأسرع عاطف إلى أبيه وقال له :

— آه يا بابا نتفسح ، والنبي نتفسح .

ورق قلب الأب لأولاده ، فقال لهم :

— طب البسوا وانا أفسحكم .

فقال سامى وهو فى طريقه إلى غرفة أبيه :

— يا بابا تاخذ مراد معاك ازاي وشعره طويل كده .. لما يحلقه قبله .

فقال مراد فى تحد :

— وانت مالك ؟

— ما هو يا ماما ..

فقاطعت أمه :

— بس مالکش دعوه بيه . روح انت مطرح ما انت رايح .

وقالت سوسن وهى تتمسح بأبيها :

— هم ح یركبوا أتومبیل ..

فقال لها الأب :

— ح ارکبکم أتومبیل .

وقال عاطف فى فرح :

— وانا اللى اسوقه .

فقال لأب وهو يعبث فى شعره فى حنان :

— وانت اللى تسوقه .. ياللا روحوا البسوا .

وخرجوا من غرفة أبيهم فرحين ، مراد يخلع جاكته بيجامته ،
وسوسن تحاول أن تخلع ثوبها وهى فى طريقها إلى غرفتها ، وعاطف

يصيح :

— لبسونى .. لبسونى ..

وقالت أمه وهى تضع هالة بجوار أبيها :

— طيب . أنا جايه البسك .

والتفت الأب إلى هالة وقال مداعبا :

— وانتى .. مش عايزه تتفسحى ؟

فقالت الأم وهى تهم بمغادرة الغرفة وعاطف فى يدها :

— ياريت تاخدها معاك وتريجنى .

ونظر الأب إلى هالة ، فإذا بعاطفة الحنان تتحرك فى جوفه ، وإذا بأساريره تنبسط ، وإذا به يمد يديه ويحملها ، ويضمها إلى صدره ويقبلها .

وبلغ صوت نداء سيارة آذان الجميع ، فحدث فى الشقة هرج شديد ، راحت أحلام تهرول صوب باب الشقة فى فرح وفى أثرها نبيلة وسامى ، وقد أخذ سامى يصيح :

— أيوه . نازلين .

وقالت سوسن فى غضب :

— اشمعنى هم ينزلوا قبله .

وجرى عاطف إلى والده حافى القدمين ، وجذبه من بنطلونه الذى كان يرتديه ، وقال له :

— ياللا احنا كان ننزل بقى .

فقال له أبوه وهو يدفعه فى رفق :

— روح كمل لبسك ، وتعال ننزل .

وخف مراد إلى الشرفة يرقب إخوته .

تقدمت أحلام إلى السيارة في دلال ، وإن كانت المشاعر الرقيقة المنبعثة في جوفها انعكست على مرآة وجهها ، وضيق من خطوها ، ولو طاوعت نفسها وأطلقتها على سجيتها لهرولت وهى تنادى : « جلال .. جلال » .

وتقدمت نبيلة في رشاقة كأنما تسير على أطراف أصابعها ، وقد شمخت برأسها في كبرياء ولم تغير صفحة وجهها مسحة من كبر ، وسار سامى وهو ينقل عينيه بين أحلام ونبيلة والسيارة . كان المراقب الذى يخشى أن تشرد منه شاردة ، أو يأتى أحد المراقبين بحركة في غفلة منه ! وقفز شفيق من السيارة في رشاقة وفتح بابها ، فحيت أحلام بإيماء من رأسها ، ومدت بصرها فألفت جلالا جالسا خلف عجلة القيادة ، فصعدت لتشاركه في المقعد الأمامى وهى تقول فى نبرات مشحونة بالعاطفة المشبوبة :

— مساء الخير .

فقال جلال مغازلا :

— مساء النور ، مساء الجمال .

وقالت نبيلة وهى ترفع يدها إلى رأسها ، فقد نسيت كبرياءها المصطنعة ، وعادت إلى طبعها :

— السلام عليكم .

فقال شفيق وجلال :

— عليكم السلام .. أهلا .

ومدت يدها وصافحت شقيقا ، ثم صعدت إلى المقعد الخلفي ، وهي تمد يدها إلى جلال لتصافحه .

وهز سامى رأسه محييا ، وغمغم بعض كلمات لم يفهم منها شيء ، ولكنها أولت على أنها تحية . ووقف برهة مترددا يفكر . وإذا به لأول مرة في حياته يتمنى لو أن أحد إخوته قد جاء معهم ، حتى يجلس بين أحلام وجلال ، بينا يجلس هو بين نبيلة وشفيق ، حتى يطمئن إلى عدم تماس أجسام البنات بأجسام الشباب .

وفي مثل لمح البصر تذكر أن هناك خطبة بين أحلام وجلال ، وأنه لا غضاضة من تركهما جالسين في مقعد واحد دون عازل ، ماداما تحت بصره وسمعه ، فصعد وجلس إلى جوار نبيلة ، وقعد شفيق إلى جواره وأغلق باب السيارة خلفه .

وانطلقت السيارة ، وقال جلال وهو ينظر إلى أحلام :

— تحبوا تروحوا فين ؟

قالت نبيلة في نشوة :

— نروح الهرم ، أنا مارحتوش من أيام ما كنت في ابتدائي ، لكن لسه

فاكره المنظر الجميل اللى شفته هناك ساعة الغروب ، منظر بديع ، كانت الشمس وهى نازله زى ..

وقال سامى مقاطعا :

— إيش ودانا لهناك ؟

فقال شفيق وهو يديم النظر إلى نبيلة ، دون أن يأبه لعيني سامى

المحلمقتين :

— فكره جميله ، أنا موافق ع الهرم .

وقال جلال لأحلام :

— وانتى ، رأيك إيه ؟

فقالت وهى تغوص فى مقعدها :

— مطرح ما تحبوا .

فقال شفيق :

— يعنى موافقه . خلاص نبقى أغلبية . ع الهرم .

وصمت سامى على مضض ، وإن راح يمضغ غيظه ، وقال شفيق

لنبيلة :

— كملى . كنتى بتقولى : كانت الشمس وهى نازله زى .. زى

إيه ؟

فقالت وهى تضحك :

— والله ما انا فاكره ، أنا لما حد يقاطعنى وانا باتكلم يطير كل اللى فى

خى .

فقال سامى فى شماتة :

— الحمد لله إنه طار ، وإلا كنا ح نفضل نسمع للصبح .

فقالت له فى تهديد :

— سامى ، لم لسانك أحسن لك .

وأحس جلال أن الجو بدأ يتكهرب ، وأن نقاش نبيلة وسامى

سيخرجه من الجو الشاعرى الذى بدأ يستشعره ، وهو قابض على عجلة القيادة وأحلام إلى جواره ، والنيل ينساب رقراقا كمرآة سحرية تعكس أفانين من الجمال ، تفجر ينابيع الحب والهيام ، فضغط على زر راديو السيارة فإذا بأنغام عذبة تنبعث حنونة ، فتهدئ الأعصاب التى بدأت تثور ، وتجعل الجميع يسترخون حاملين فى مقاعدهم .

ودنت أحلام من جلال ، ومالت برأسها نحوه ، ثم أسندته على مسند المقعد ، وراح شقيق ونبيلة يتبادلان النظرات ، ثم يطبقان الأجفان حتى لا تفر رؤى الأمانى العذاب ، التى كانت الموسيقى تفتق مواهبها ! ونظر جلال إلى أحلام ، فآلفاها ترمقه بعينين والهتين ، فيهما حب وفيها رغبة وفيهما نداء ، فراح يديم إليها النظر ، وتخطبت العيون ، وانبثقت الأحاسيس ، وولدت اللحظات المسحورة التى تنتشى فى ذاكرة المحبين ، وتخزن فى سويداء القلوب ، لتعيش الأفتدة عليها فى السنين العجاف .

وفقد جلال سيطرته على حواسه ، كان فى شبه غيبوبة ، استرخت قبضته على عجلة القيادة فإذا بالسيارة تنحرف ، وتكاد ترتطم بشجرة ضخمة من الأشجار المغروسة على جانبى الطريق .

وصاح سامى فى فزع :

— حاسب ح نروح فى داهية .

وأفاق جلال من حلمه ، وفى مثل لمح البصر سيطر على السيارة ، وأبعدها عن الخطر ، فأحدث احتكاك العجل بالأرض صوتا غطى على

صوت الموسيقى ، ولكن سرعان ما تلاشى ، وسرت مرة أخرى الألمان
الحاملة .

وتأهب من في السيارة ليستأنفوا شرودهم اللذيذ ، وإذا بصوت
سامي يعكر صفاءهم :

— والنبي تدور لنا محطة غير دى .

ومد جلال يده إلى الأزرار ، والتفت سامي إلى نبيلة وقال :

— شورتك كانت ح تودينا فى داهية .. كان لازم الهرم ؟! حبكت !

فقال شفيق :

— حصل خير .. مين عارف كان ح يحصل إيه لو كنا رحنا فى حته

تانيه .

وأرضى نبيلة انبراء شفيق لتأييدها والدفاع عنها ، فمنحته بسمه

اعترافا منها بجميله .

وانطلقت السيارة حتى إذا لاحت الأهرام فى الأفق ، قالت نبيلة فى

انشراح :

— الأهرام أهيه .. مش عارفة أنا فرحانه كده ليه ، متيأ لى إني

رجعت عيله صغيره .. عايزه انتنطط واجرى ، تعرفوا لو توافقوني على

عقلي ، تقفوا هنا وانزل أجرى .. أجرى لغاية ما اوصل الهرم .

فقالت أحلام ، وهى تبتسم :

— تجزى من هنا هناك ؟. كان انقطع قلبك .

وملاً شفيق رثييه بالهواء وقال :

— حاجة لطيفة . تيجو نوقف العرييه ونجى شويه .

فقال له جلال :

— اعقل .

فقال شفيق :

— والله نفسى أجرى . بقى لى زمان .

— طب استنى لما نوصل فوق .

ونظر شفيق إلى نبيلة ، وقال دون أن يعد عينيه عنها :

— سامى . تسابقنى ؟

فقال سامى فى غرور :

— ح اسبقك . ما فيش كلام .

فقال شفيق :

— الميه تكذب الغطاس .

وقالت نبيلة :

— وانا ح اخش معاكم فى السباق ده .

فقال لها سامى :

— نفسى تبطل غلبة ، ولا تحشيش نفسك فى اللي مالتيش فيه .

وصعدت السيارة المنحدر ، ووقفت عند سفح الهرم الأكبر ، وفتح

شفيق الباب وهبط يتبعه سامى ثم نبيلة ، بينا ظل جلال وأحلام فى

مكانهما يصغيان إلى الموسيقى .

ودارت نبيلة دورة على أطراف أصابع قدميها ، وقالت :

- احنا مش عايشين . آدى الحياة .
فقال لها سامى وهو يهز رأسه أسفا :
— نفسك تسيبى على طول .
— نفسى أبقى حره .. طليقه .. زى النسيم .
فقال لها سامى :
— ح نمثل .. شياطين الفن ح تتحرك .
فدنا منه شفيق وقال له :
— انت فى سنه إيه ؟
— أولى ثانوى .
فقال شفيق فى استنكار :
— لسه أولى ثانوى .
فقالت نبيله وهى تضحك :
— ما هو أولى ثانوى دلوقت .. يعنى تالته ثانوى زمان .
— دى حاجه تلخبط . ما افهمش حاجة فى النظام الجديد ده أبدا
لدرجة إنى فكرت مره أعمل جدول معادلات .. وانتهى فى سنه إيه ؟
فقالت فى فخر :
— فى تالته ثانوى .
— ودى تساوى إيه فى جدول المعادلات ؟
— توجيبى .
— وناويه بعد ما تخلصى تقعدى فى البيت زى أحلام ؟

فقالت وهى تشب على أصابع قدمها :

— لأ .. ح اروح الجامعه ، وح ادخل كلية الطب .

فقال لها سامى :

— دا بعدك .

— بكره تشوف .

— بكره تشوفى انت .

وقال شفيق :

— ياللا مش ح نتسابق ؟

وراح يخلع جاكته ، ففعل سامى مثله ، ومد شفيق إليه يده بالجاكتة

وقال :

— والله لو تسمح تودى الجاكتة دى معاك فى العريه .

وتناول سامى الجاكتة ، وذهب إلى السيارة ، وأحست أحلام دنوه

فرفعت رأسها عن صدر جلال ، والتفتت إليه ، فإذا بجلال يلتفت ويقول :

— ناوين على إيه ؟

— ح نتسابق .

واقرب شفيق من نبيلة وقال لها :

— وليه ما تقعديش فى البيت زى أختك ؟

— أقعد فى البيت أعمل إيه ؟

— تعملى زيها .

— أملا قلل واغسل واطبخ وامسح . لا .. دانا ح ابقى دكتور ..

دكتور مشهوره .. أنا شايفه اليا فطه دلوقت على العيادة .. » الدكتور
نبيلة حسين .

— بقيتي دكتور مشهوره . وبعدين ؟

وقالت مفكرة :

— وبعدين ؟ وبعدين ؟ مش عارفه .. ما فكرتش .. كان أملى إني

أبقى دكتور .

وابتسم شفيق ، ووصل إليهما سامى ، وقال :

— ياللا . اقفوا جنبى هنا ، شايفين الحجر الكبير اللى هناك ده ؟ ح

نجرى لعنده ونرجع للعريه .

واصطفوا صفا واحدا ، والتفت سامى إلى السيارة وقال :

— أحلام . خدى بالك . ح نبتدى .

وقالت أحلام دون أن تلتفت :

— حاضر .

واستأنف جلال حديثه وأحلام ترنو إليه فى وله :

— تعرفى ، نفسى اكون أنا وانتى لوحدا فى جزيره ، ما شفش غيرك

ولا تشوفيش غيرى ، واسمعلك لوحدى ، وما تسمعيش غيرى .

فقالت وهى تبتسم فى إغراء :

— وإن زهقت ؟

— مش معقول أزهد وانتى جانبى .

وازدادت قربا منه ، ورفعت بصرها إليه ، فإذا به يهوى عليها ويقبلها

وهو يضمها فى قوة .

وارتفع الصياح ، فالتفت جلال وأحلام ، فوجدا أن سامى وشفيق
في عودتهما بينا لم تصل نبيلة إلى الحجر .
وقفت نبيلة ، وتلفت شفيق نحوها وخفف من سرعته ، وراح سامى
يعدو بأقصى سرعته مزهوا بنصره .
ووقف شفيق ، وانتظر حتى وافته نبيلة وسارت إلى جواره تلتفظ
أنفاسها ، وقال لها :

— تعبتى ؟

— حاسه إن قلبى ح ينط من بقى ، وإن رجليه مش قادره تشيلنى .
ومد لها ذراعه وقال :

— طب اسندى على .

وترددت ، وإن كانت تلهث ، وتحس قواها تخور ، وفطن إلى تردها
فمد لها يده ، فإذا بها تضع يدها فى يده ، وتسير معه .

وصاح سامى فى فرح وهو مستند إلى السيارة :

— لما انتو مش قد الجرى ما تبقوش تتغالبا .

وأدار وجهه ناحية الغرب ، فإذا بالشمس فى الغروب . فهتف :

— ما تمدى يا نبيله شويه عشان تشوفى المنظر الجميل اللى عجبك قبل

الشمس ما تغيب .

وقال لجلال وأحلام :

— ح تفضلوا لابدين فى العربيه كده . مش ح تنزلوا شويه ؟

فقال جلال وهو يفتح باب السيارة :

— آدى احنا نازلين .

ووقف الجميع برهة صامتين ، وهم يرصدون الشمس وهي تغوص في الأفق البعيد .

وركبوا السيارة وقد خيم الظلام على المكان ، وقفلوا عائدين وقد سيطر عليهم السكون ، صمت الراديو وركن سامى إلى الهدوء ، حتى نبيلة لم تنبس بكلمة ، كانوا جميعا يجتثرون الحوادث التي انزلت من لحظات من دنيا الواقع إلى عالم الذكريات ، وقد راحت يد الخيال تنمقها فتزيدها فتنة وجمالا .

ولاح في وجه جلال وجد وهيام ، فمد يده ووضعها فوق يد أحلام ، ليربط ما يدور برأسه بواقعه الذى يعيش فيه .
وبلغت السيارة الدار ، فأفاق الجميع من أحلامهم ، وفتح الباب الخلفى وهبط شفيق وسامى ونبيلة ، ثم فتح الباب الأمامى وهبطت أحلام وهي ترنو إلى جلال وتقول :

— مش ح تطلع شويه ؟

— معلش المره دى .. بقينا ليل .. المره الجايه .

ومدت يدها وصافحته ، ثم صافحت شفيقا ، وانطلقت مرحة ، وقالت نبيلة :

— السلام عليكم .

ولكنها لم تنصرف ، بل مدت يدها إلى شفيق تصافحه ، وأحست يده تضغط على يدها ، فحفق قلبها ، ونظرت إليه فإذا في عينيه نور

يأتلق ، فاستشعرت كأن تيارا كهريا سري في روحها فزلزل كيائها .
وتسمرت لحظة ، وقد اسند بها اضطراب لذيذ ، وأحست في لحظة
أنها تغيرت ، لم تعد طفلة ، فقد راحت تمور في أغوارها مشاعر ناضجة !
ودارت على عقبيها ، وسارت في تودة ، كانت تستشعر كأنما صارت
طيفا ، ومع ذلك لم تنطلق في خطوات راقصة على أصابع قدميها
كعادتها ، بل انسابت في رزانة ، تطأ الأرض بكل قدميها .
ووقف سامي يودع جلالاته وشفيقا ، ولم يتحرك إلا بعد أن ابتعدت
السيارة وابتلعها الظلام .

وصعدا إلى الشقة وإذا بمراد وسوسن وعاطف يخفون إليهم ويلتقون
بهم ، ويسألونهم في صباح :
— رحتم فين ؟ . رحتم فين ؟
فقال سامي في فخر :
— الهرم .

وقالت سوسن في حزن :
— بابا ضحك علينا ، وركبنا تاكسي شويه صغيره ورجعنا .
وقال مراد وهو يحاول أن يعترض طريقهم ليؤخر وصولهم إلى
غرفهم :

— تعرفوا عداد التاكسي ضرب كام ؟ تمانية صاغ .
ودخلت سوسن على أبيها وقالت :
— أنا عايزه أروح الهرم .

وقال الأب في أسي ، فقد جرح نفسه سخرية أولاده من النزهة التي حاول أن يدخل بها السرور على قلوبهم ، كان يأمل أن يرضوا فإذا بها تخلف في نفوسهم مرارة :

— حاضر .

وأقبل عاطف وقال :

— وانا يا بابا .

وعبث بشعره وقال :

— وانت يا حبيبي .

ودخل مراد وقال :

— المره الجايه أنا اللي ح اخرج معاهم ، اشمعنى سامى يعنى الى يخرج معاهم كل مره .

فقلت الأم :

— هم خرجوا إلا المره دى ؟

فقال مراد وهو يعبث في كرفاته أبيه المعلقة :

— ما انا عارفه لزقه ، ما يحبش إلا نفسه وسامى أنا نى خطف الفسحه

من قدامى .

فصاحت الأم فيهم جميعا :

— إيه لزمة الخوته دى دلوقت ؟. ياللا امشى بره انت وهو .

فقال مراد معترضا :

— إيه . احنا عملنا حاجه .

وهمت الأم وتحركت في مقعدها وقالت :

— والله إن ما خرجتو من هنا لضرباكم بعصاية الغليه .

وفر الأولاد من الغرفة كأرانب مذعورة ، فالتفت الأب إلى الأم

وقال :

— ليه بس كده ؟

فقالت الأم :

— دلهم يا خويا عشان يحبوك . أنا ما اعرفش ادلع . أنا أرى ..

التربية ما تنقص عمر .. قال على رأى المثل .

فقال الزوج مداعبا :

— طب المثل بيقول إيه ؟

— أنا عارفه ؟

— المثل بيقول : ربى ابنك واحسن أدبه ، التربية ما تاخذ أجله .

— يا اخويا الأمثال كتير ، الواحد ح تفتكر إيه واللا إيه .

— أمال كل ما تتكلمى تقولى « على رأى المثل » ليه ؟ دا اللى يسمعك

يحسبك قاموس فى الأمثال .


— يوه بقى .

وخلعت أحلام ونبيلة ثيابهما ، وارتدتا ثياب النوم ، وأسرعت كل

منهما إلى سريرها لتعيش وحدها مع خيالها ، وجذبت نبيلة الغطاء

فوقها ، وتململت فى رقدتها وقد رفت على شفيتها بسمه حاملة .

وأحست أن الضوء المنبعث من الردهة الخارجية يشغلها عن



ساحتي، يا أحلام، ما كنتش فاهمه إني بضايقتك
لما كنت بانور الأباجوره .. النهار د بس فهمت .

الاستغراق في أوهامها ، فقامت تطفئ النور ، ومرت وهي في طريقها إلى
الزر الكهربي بعاطف وهو غارق في نومه على الأريكة ، فلم تفكر في حمله
إلى سريريه ، وضغطت على الزر ، ثم عادت إلى سريرها مسرعة ، وما إن
اندست في فراشها حتى التفتت إلى أحلام وقالت :

— ساحيني يا أحلام ، ما كنتش فاهمه إني بضايقتك لما كنت بانور
الأباجوره .. النهارده بس فهمت .

فقال أحلام في تكاسل :

— فهمتى إيه ؟

فقال نبيلة وهي تنام على ظهرها وتضع كفيها تحت رأسها ، وتشرّد
ببصرها :

— أنا عرفه ! فهمت كثير .

وهامتا في عالم وردى من التصورات ، ورفتا على شفّتهما ابتسامات
رضا وأمان وأمل .

الفصل العاشر

وقف حسين أمام باب الشقة وفي وجهه سهوم ، ومد يده إلى زر الجرس وضغطه ، ثم أرخى ذراعه وراح يعيث في أصابعه . كانت حركاته توحى بالقلق . وفتح الباب ودخل ، وما إن خطا خطوتين ، حتى دوت زغرودة طويلة ممدودة ، وبدرت حفنة من « الملبس » على الأرض ، فانقض الأولاد جميعا يلتقطون « الملبس » المنشور .

ونظر حسين إلى زوجته في تساؤل ، فقالت :

— دى الخياطه جابت فساتين أحلام .

ودلف حسين إلى غرفته ، وزوجته خلفه ، وقبل أن يستقر على مقعده ، قالت له زوجته :

— الخياطه طالبه خمسين جنيه .

فقال وقد اتسعت عيناه :

— خمسين جنيه ! دا كثير .. كثير قوى .

— مش كثير . يا دوبك . مش فصلت أربع فساتين سهره كوكتيل وخمسه تواليت وتمانيه اسبور وست جونلات وست بلوزات وتلات بلوزات نايلون وجيون تواليت وجيون اسبور ؟

وأحس حسين رأسه يدور ، وقام إلى الصوان وفتحته وأخرج منه

خمسين جنيتها ، وقال لزوجته وهو يمد لها يده بالأوراق المالية :
— خلاص . ما بقاش معانا حاجه ، المهر الى خدناه ، والقرشين الى
كنا شايلينهم طاروا .

— ياما قلت لك إوعى لنفسك ، ياما قلت لك طالع لنا بنات .
— يعنى كنا حانعمل إيه ؟ ما ناكلش ! كل الى كان بيعجينا كنا بناكل
بيه .

— برضه لو كنا وعينا لنفسنا ما كناش احتجنا لحد دلوقت . الى
حصل .

وخرجت زينب ، وبقي حسين وحده فى الغرفة ، فالتفت إلى المرأة
وقال لصورته فيها :

— دايما انت السبب .. إنت الى بتعزق الفلوس .. إنت الى ما
وعتش لنفسك ، إنت الى بتشتري كل شهر شنطه وجزمه وفستان
عشان مودة الى اشترتهم الشهر الى فات اتغيرت . معلهش . لك رب
اسمه الكريم .

ودست الخياطة الأوراق المالية فى حافظتها ، وقبلت أحلام ، ثم ربت
على خد نبيلة وقالت :

— عقبالك .. بس قريب إن شاء الله .

ومست أمنيته أذن حسين فنظر إلى نفسه فى المرأة فى ذعر ، وقد فغر
فاه دهشة .

وأسرعت نبيلة إلى أبيها وقالت :

— بابا أنا عايزه فستان أبيض أنزل بيه مع أحلام .

فجری سامی إليها حتى لا تفوته الفرصة وقال :

— غرنا ! ما تشوفش حاجه إلا لما تجيب زيها .

فالتفتت إليه وقالت :

— وانت مالك ؟

فقال لها سامی :

— مش تخلى عندك نظر .

وقالت وهي تنصرف :

— ح اجيب فستان غضب عنك .

وأخرجت له لسانها فلم يأبه بها ، لأنه أراد أن ينتهز الفرصة لنفسه ،

فقال لأبيه :

— بابا ، أنا عايز بدله كحلى وقميص أبيض وجزمه لميع .

وجاءت الأم ، وسوسن تتمسح بها ، ولما رأت أباهما قالت :

— عايزه جزمه بيضه بكعب على . اشمعنى أحلام ؟

فصاح مراد وهو مقبل :

— إيه الطمع ده ؟ ، ما عندك جزمه سوده جديده . أنا اللي ما عنديش

حاجه أبدا ، أنا عايز بدله بينطلون طويل .

فقال سامی :

— انت تلبس بنطلون طويل !

— وانت مالك ؟

وصاحت الأم فيهم :

— ابعدوا دلوقت خللوا بابا يقلع ويستريح . ياللا بره .
وانسحبوا من الغرفة ، وبدأ الأب يخلع ثيابه ، ومدت الزوجة يدها
وتناولت ثوبا صغيرا من سرير هالة ، ونشرته بين يديها وقالت في هيام :
— شوف الفستان اللي خيطته الخياطه لهاله .. مش طعم والنبى !
وخلع قميصه ، فبدت الفانلة ممزقة ، فقالت له الزوجة في إنكار :
— بقى تصرف الصرف ده وتستخسر في نفسك فالتين ؟
— والنبى تسيبني في حالى . أنا مش عايز حاجه ، نفسى بس أسد
بق البير المفتوح ده .

— كله ينتهى .

وأطرق صامتا ، وجلس يخلع حذاءه ، وبان في وجهه الهم ، وساد
الصمت برهة ، وزوجه ترمقه في قلق ، وأرادت أن تخرجه من صمته ،
فقالت له :

— أحلام عايزه أربع تطقم نايلون .

فقال في إنكار :

— أحلام تلبس نايلون ؟.

— وما تلبسش نايلون ليه ؟

— هو النايلون بيغطى حاجه . دا فضيحة .

وأرادت أن تداعبه لترفه عنه ، فقالت له :

— وانت إيش عرفك ، شفت النايلون على مين ، قول لى ؟

— شفته في الفتارين .

— يا راجل !

— ما تشوفي حاجة غير النايلون ده .

— ح نيجي ع الآخر ونكسر بخاطرها ، نجيّب لها الأربع تطقم
وخلص ، واهي ح تلبسهم في أودتها .

فقال وقد شرد ببصره :

— ع الآخر ؟ مين اللي قال ع الآخر . قدامنا كتير ، بتاع الموبيليا
عايز فلوس ، والمنجد عايز فلوس ، والنحاس عايز فلوس ، وأنا خلاص
ما بقاش معايا فلوس .

— وح تعمل إيه ؟

— عملت وخلص . طلبت استبدال جزء المعاش .

— خسارة !

— لا خساره ولا حاجة ، لو طلّ استبدال المعاش كله كنت
استبدلته ، مش أحسن ما الحكومة تورث فيه ؟
فقالّت الزوجة في فزع :

— ما وعيت .

— ح نوعي ، ودي فيها كلام ح اموت يوم ، وح تورث الحكومة
فيه .

— بعد الشر .

وشرد ببصره وقال :

— أنا مش فاهم الحكومه تورث ليه ، لهى أمى و ابويا ولا بنتى ولا
ابنى ولا انا مسئول عنها .

وتمدد فى السرير ، ونظر إلى حيث ترقد هالة ، ثم التفت إلى زوجه
التي تناولت حذاءه ؛ وراحت تضعه فى مكانه ، وقال لها :

— قولى لى يا زينب لو مت تعملى إيه ؟

فقالت له فى ضيق :

— أوه . والنبي تسيب السيره دى .

— وليه نهرب م اللى ح يحصل ؟ ما نفكر سوا فى اللى تعمليه لو مت .

— يمكن أموت قبلك .

— ونفكر فى اللى نعمله لو متى .

— ودى عايزه تفكير ؟ ح تتجوز واحده تانيه تذل الأولاد

وتمرطهم .

— تفتكرى كده ؟

— ما فيش كلام . يعنى انت أحسن من مين ؟

— طب لو مت قبلك تعملى إيه ؟

— أشوف شقه على قدى ، وادبر عيشتى أنا والأولاد على قد القرشين

اللى يطلعوا لى .

— يعنى من مصلحتك ومصلحة الأولاد إنى أموت قبلك .

— أوه . والنبي تفض السيره دى : أنا عارفه النهارده مالك ،

مسكت الحكاياه دى واستقلعت ليه ؟

وتركته وغادرت الغرفة ، وإذا بسوسن تقبل وفي يدها ورقة ،
ودفعت بها إلى أبيها وقالت :

— بابا عايزينك في المدرسة تحضر مجلس الآباء .

فقال وهو شارد :

— حاضر .

وأسرعت نبيلة إليه وقالت :

— اشمعني ح تحضر مجلس الآباء في مدرسة سوسن ، وما حضرتش

المجلس في مدرستي ؟

وخف سامي إليه وقال :

— مجلس الآباء بتاعنا بكرة ، ضرورى تحضره .

وصاح مراد :

— كل أصحابي أبهاتهم حضروا مجلس الآباء .

وأقبلت الأم على صياحهم ، وقالت لهم :

— هو ما حدش يعرف يستريح شويه في البيت ده ! بزه .

وانسلوا من الغرفة ، وقال الأب :

— بس الواحد ح يروح هنا واللا هنا واللا هنا واللا هنا . ح يجيب

الوقت منين ؟! يعنى ما يجيناش بدل الكلام ده عضوية مجلس إدارة

شركه .. تحمل أزمطنا ؟

— أنا عارفه عرسان اليومين دول إيه ؟ الواحد منهم يدفع المهر

ويسلت إيده ، لا نفقه ولا نشان ، فاكرا الهدايا الحلوه اللي كنت بتبعنها

لى فى المواسم ! عروسة المولد الى قد كده ! والحلاوة الحمصية
والسمسميه ، واللا السمك الى كان يملا طشوت .. والنشان الى
بعتولى .. الفستان القصب والجزمه القصب ، والشرابات الحرير
والصابون الممسك ، والشباشب الى قلبك يحبا . تصدق إن الهدايا الى
بعتهالى فرحتنى أكثر من كل الحاجات الى جابوها لى ؟

— دى بقت موضه قديمه .

— موضه قديمه ! والله كانت تشرح القلب ، ده فقر الى بيعملوه

اليومين دول .

— تعرفى أنا كل ما اشوف سامى ومراد وعاطف بتهدا نارى .

— ليه ؟

— مسيرهم ح يتجوزوا يوم ، وادفع لهم المهر وبس واسلت إيدى أنا

كمان ، واسيب غيرى يكع ، واخذ بتارى .

وسمع ارتطام حذاء صغير بالباب ، فقالت الأم :

— عاطف جه ، كان فى غطسان من بدرى ؟

وأسرعت تفتح له الباب ، وبدأت هالة تبكى ، فنهض حسين وحملها

فى حنان ، وقال لها وهو يرقصها بين يديه :

— تعرفى لو عشت لغاية ما أجوزك ، ح اجهزك جهاز ما فىش واحده

اتجهزته ، مش ح يبقى ع الحجر غيرك .

وضمها إليه وقبلها قبله أنسته كل آلامه ومتاعبه ، أحس الكدر الذى

غبش صدره ينقشع ، والهموم التى كادت تنقض ظهره تتلاشى ، وإذا

ببصيص من الأمل يبدد ظلام نفسه ، ثم ينداح حتى يملأ جوانحه .
وفتحت الأم الباب ونظرت ثم ارتدت خطوة وصاحت :
— إيه القرف ده ؟

كان عاطف يرتدى قميصاً أبيض مخططاً بخطوط خمر ، صار رمادياً
من أثر التراب ، وقد التصقت خصلات شعره بجبهته من أثر العرق
المتصبب منه ، وكان بنطلونه ممزقاً عند فخذه ، أما حذاؤه فلا لون له ،
وفي يده قطعة جبل وفي نهايتها كلب صغير ، أذناه طويلتان تخطان في
الأرض وشعره متهدل ، أبيض اللون ، حول عينه اليسرى هالة سوداء .
وجذبت الحبل من يده ، ولكنه تشبث به ، فقالت له :

— سيب الكلب ، جبهته منين ؟

— واحد صاحبي اداهولى .

وعوى الكلب ، فإذا بأحلام ونبيلة وسوسن وسامى وممراد ،
يتسابقون إلى الباب ، أحلام فى قميص النوم ، ونبيلة ترتدى بنطلون
البيجاما ، عارية الصدر ، حافية القدمين ، وسامى ليس عليه إلا بنطلونه
الأبيض القصير ، وممراد بالفانيلا و « الكلسون » ، أما وسوسن فقد
راحت تهزول وفي قدميها شبشب كبير .

وخرج الأب من غرفته ينظر وهو يحمل هالة .

وقالت الأم وهى تجذب الحبل :

— ما تتعبش نفسك ، الكلب دا مش ح يبخش الشقه أبدا .

وقالت أحلام :

— يا جماله !

وأسرعت نبيلة إليه وحملته ، فصاحت فيها أمها :

— نزيله ع الأرض ، مش شايفاه وسخ ازای ؟ .

فقالت نبيلة :

— ح احميه .

وقالت سوسن :

— والنبي يا ماما تسيبيه ، دا لطيف خالص .

وصاح مراد :

— ح ننضفه ، ح نخليه فل .

فقال له أمه في غيط :

— ياخى روح نضف نفسك .

وسارت نبيلة به إلى الحمام ، وإخوتها خلفها يتصايحون ، فقالت لها

أمها :

— يعنى عفيتى دلوقت ، لا تعبانه ولا مهمده ولا وراكى مذاكره ،

ما تشطريش إلا فى الحاجات الهايفه .

وأغلقت الأم الباب خلفها ، وسارت مهزومة حتى إذا بلغت زوجها

قالت له :

— هو البيت كان ناقص كلاب ! ما كفايه اللى فيه .

وسار الزوجان إلى الحمام ووقفوا بعيدا ينظران ، وجدا أحلام تدلك

جسم الكلب بالصابون بينما راحت نبيلة تصب لها الماء ، بينما راح عاطف

يصيح :

— ده كلبى ، أنا اللي أحميه .

وطفق يمد يده لياخذ من نبيلة الكوز ، وسامى يعبده ، ومراد يقول له :

— استنى لما يستخمه ابقى خده .

وقالت سوسن وهى تلوح بالمشط فى يدها :

— أنا اللي ح اسرحه .

وقالت أحلام :

— ناولنى فوطه يا سامى .

قالت الأم فى غضب :

— مش ناقصنا إلا الكلب نجيب له فوط راخر ، وهو انتو مش دارين ، ما بتحسوش . والله الى ح يحط الفوطه على جسمه ح يعرف شغله .

وشقت نبيلة طريقها إلى غرفتها وعادت بجاكتة بيجامتها ، ولفت الكلب فيها ، ثم عادت إلى غرفتها وإخوتها خلفها .

وسارت الأم إلى غرفتها مطرقة وزوجها إلى جوارها ، وقالت له :

— هو احنا قادرين نأكلهم لما ح نأكل الكلب ؟ قال على رأى المثل .

فقالت زوجها وهو يتسم :

— مش لاقين العيش ياكلوه ، يجيبوا كلب يربوه .

الفصل الحادى عشر

اصطف الأولاد فى حلقة واسعة ، وقد ركع سامى ومراد وأحلام
ونبيلة وسوسن على ركبهم بينما ظل عاطف واقفا ، ووضعوا الكلب فى
مركز الدائرة ، وقالت نبيلة :

— الى يروح له الكلب يبقى ح ينجح السنه دى .

وراح كل منهم يناديه ، ويغريه بالاتجاه إليه ، فارتفعت فرقة
الأصابع ، وصفر كل منهم بفمه بطريقته الخاصة .
وترددت النداءات :

— بوى .. بوى .

ووقف الكلب حائرا ، يدير رأسه يمينا وشمالا ، وقالت نبيلة :

— بلاش نقول له « بوى » نسميه اسم تانى .

فقالت أحلام وقد وضعت سبابتها على خدها :

— نسميه إيه ؟

وشردت ببصرها تفكر ، وهى تغض شفتها السفلى بأسنانها ، وقال
سامى :

— نسميه جليجل .

والتفت إلى أحلام ، وضحك ضحكة ساخرة ، فنهزته نبيلة قائلة :

— بلاش قلة أدب .

وتوردت وجنتا أحلام ، والتفتت إلى سامى غاضبة ، وقالت في غيظ :

— ح نتخاف ؟

وقال عاطف :

— نسيمه « عاطف » .

وضحك الأولاد ، وقالت سوسن وهى تضحك ، لتعلن الجميع أنها فهمت سبب ضحكهم :

— يعنى عاطف كلب .. يعنى عاطف كلب .. هى هئ .. هى هئ .

وقالت نبيلة وهى تفرقع بأصابعها :

— نسيمه سوزى .

فارتفعت الأصوات تنادى :

— سوزى . سوزى .

واختلطت الأصوات بفرقة الأصابع ، وصفير الأفواه ، والكلب ييبص بذنبه ويتلفت ، ثم يتقدم إلى أحلام .

وحملته أحلام فى فرح وضمته إلى صدرها ، وصاح الأولاد جميعا وهم يضحكون :

— أحلام ح تنجح السنه دى .

وأسرعت إليها سوسن تضمها فى فرح لتعلن سرورها بنجاحها ،

وقالت أحلام وقد توجت شفتيها بسمه عذبة :

— ح انجح فى آنى امتحان ؟

ورنت إليها نبيلة رنوة ذات مغزى ، وقالت لها :

— هو ضرورى تنجحى فى الامتحان ، أهو ح تنجحى والسلام .

وعلا بكاء هالة على ضجيج الأولاد ، فنادت الأم :

— نبيلة ، تعالى خدى أختك لعبوها ، والا يعنى مش ح تحصل

الكلب !

وقالت نبيلة :

— مراد ، هات هاله والنبي .

فأسرعت سوسن تهرول إلى الردهة وتقول :

— أنا اللي ح اجيبها .

وانطلقت إلى حيث كانت أمها جالسة على الأريكة ، وحملت هالة ،

ثم عادت بها ، فقال سامى :

— حظوها مع الكلب لما نشوف ح تعمل إيه ؟

فقال مراد معترضا :

— لأ ، ح اقول لماما .

ولم يأبهوا لاعتراضه ، ووضعوا هالة والكلب فى وسط الدائرة ،

واشرأبوا بأعناقهم ينظرون .

وتمسح الكلب بها ، ومدت يدها تجذبه من شعره ، فانطلقت

صيححات الرضا ، وراحوا يزحفون على ركبهم يضيّقون الحلقة ، حتى

ينعموا بمراقبة الغزل الدائر بين هالة وسوزى .

وخرج الأب من الحمام ، يلف حول عنقه فوطة مبتلة وقرع أذنيه
صياح الأولاد ، فسأل زوجته :

— إيه الزبطه دى ؟

— زبطة أولادك اللى بتدلهم ، ييلعبوا الكلب ، يا راجل كش فيهم
خلهم يوطوا حسهم .

— وانتى ما كشتيش فيهم ليه ؟

— طول عمرى بكش فيهم لوحدى لما بقيت العدوه ، روح انت

ريهم مره .

وانطلق فى عزم إلى حيث كانوا يلعبون ، وزوجته تنظر إليه ، وقد
أصاحت السمع ، ووضعت القميص الذى كانت ترتقه جانبا .

ووقف عند باب الغرفة ينظر ، فرأى هالة تجذب الكلب من أذنه
وتحاول أن تضعها فى فمها ، فاحتلت وجهه بسمة عريضة ، ودغدغت
أذنيه ضحكات أبنائه ، فاستشعر مشاعر رقيقة تنبثق فى أعماقه ، وتقدم
مسرورا يشاركهم جوارهم .

وركع على ركبتيه ، وأبعد « الفوطة » عن عنقه ، وراح يفرقع
بأصابع يديه فى توافق عجيب كأنما يدق لحنا راقصا .

وبدأت سوسن تتمايل على الأنغام ، وتشجع مراد وراح يصفق لها على
الوحدة ، ولم ينهره أبوه ، فصفت نبيلة وأحلام وسامى معه ، وأسفر
تمايل سوسن عن وجهه الحقيقى ، فإذا بها ترقص وتميل برأسها إلى

الخلف ، حتى مس شعرها كعنها ، وبطنها في حركة دائبة .
وجدلت ضحكات ناعمة ، وتعالّت الأصوات ، وقرع ذلك أذن
الأم فقطبت جبينها وجذبت القميص الذى نخته في عصبية ، ثم استأنفت
رتقه وتثبيت أزراره .

وتتابع رنين جرس الباب فانقطع التصفيق وفرقة الأصابع وتوقف
الرقص ، ومد الأب يده وأخذ القوطة ووضعها على كتفه وهم
بالانصراف ، وأسرع مراد إلى الباب يفتحه .

وقال مراد :

— أهلا جلال .

ومس صوت جلال أذن الأب وهو يقول « أهلا بيك » فوسع في
خطوه ، حتى دنا من زوجه وهمس :

— جلال جه .

فقالت وهى تنهض :

— يا ريته كان جه من بدرى وشافك وانت بترقص العيال .

ووقفت أحلام تصلح هندامها ، وراحت نبيلة تمر يدها على شعرها
وفى عينها قلق ، وحمل عاطف كلبه وجرى إلى غرفة الاستقبال حيث
دخل جلال .

وقالت أحلام لسامى :

— احمل هاله .

— وانا مالى .

وغادر الغرفة ليرتدى ثيابه ، والتفت أحلام إلى سوسن وقالت :

— سوسن شاطره . احملي أختك .

فقالته وهى تهز كتفها :

— وانا مالى .

— احمليها وح اديكى قرش .

— هاتى قبله .

— روحى خديه من شنتتى .

ولم تنتظر حتى تحمل سوسن هالة ، بل انسابت مرحة إلى غرفة الاستقبال وفى أثرها نبيلة .

كان جلال يداعب الكلب ، وعاطف ينظر إليه مسرورا ، بينما راح مراد يفتح الشبابيك ، واقترب عاطف من جلال وقال له :

— عجبك الكلب ؟

فقال جلال وهو يعبث فى رأس الكلب :

— لطيف خالص .

فقال عاطف وقد لمعت عيناه خبثا :

— طب ادى له قرش يشتري بيه بسكويت بقى .

وسمعت أحلام ونبيلة ما قاله عاطف ، فوقفت أحلام وأطرقت

خجلا ، ووضعت يدها على فمها ، ودفعته نبيلة فى ظهرها تحثها على

التقدم ، وهى تبتسم ، وصاح مراد فى أخيه :

— امش اطلع بره ، بلاش قلة أدب .

وقال له جلال :

— ما تسبيبه ، ذا صاحبي .

ووقف جلال ومد يده في جيب بنطلونه ليخرج القرش ، وإذا به يلمح أحلام مقبلة ، فيمد يده مصافحا ؛ ثم يصافح نبيلة ويشغل بحديثهما عن عاطف .

وجلس جلال والكلب في حجره ، وأصابعه تتخلل شعره في حنان ، وقد تعلقت عيناه بوجه أحلام .

ورمق عاطف أحلام ونبيلة في غيظ ، عطل دخولهما حصوله على القرش ، ورمى جلال بنظرة شزراء ، ثم هجم عليه ينتزع الكلب منه ويقول :

— طب هات الكلب بقى .

فقال جلال وهو يقف ويمد يده في جيبه :

— إنت زعلت ؟ لك حق . خد القرش أهه .

فقالت أحلام في عتاب :

— ما تعلموش على كده .

فقال مراد وهو يطوح يده في يأس :

— هو لسه ح يتعلم ، ما خد على كده وخلص .

ودخلت زينب وصافحت جلال وقالت لمراد :

— افتح الشباك الى ورا جلال ، النهارده حر .

فقال جلال منتهزا هذه الفرصة :

— بلاش تعب ، احنا ح نخرج نتمشى ع النيل شويه ، يا للا

يا أحلام .

واتسعت عينا الأم ، واثارت دماؤها ، ولكنها كبحت جماح عواطفها
وقالت فى صوت مضطرب جاهدت أن يكون طبيعيا
— طب استنى لما تشرب حاجه .

— لا معلى .

— استنى حسين جاى .

وقامت نبيلة وتظاهرت بأنها تصلح ضلفة الشباك ، ورمت
ببصرها . كانت ترجو أن ترى السيارة واقفة ، وأن تلمح شقيقا فيها ،
ولكنها رأت الطريق خاليا ، فانقبض صدرها ، وعادت إلى مقعدها
مطرقة .

وانصرف الأم ، وانطلقت إلى زوجها نائرة ، وقالت له :

— سمعت ؟ عايز ياخذها ويخرج .

وقال الأب فى بساطة وهو يرتدى جاكته :

— وفيها إيه ؟

— وفيها إيه ازاي ؟ يخرجوا لوحدهم ؟

— مش قارى الفتحه ودفع المهر ؟

— والله ما يخرجوا لوحدهم ولو اتكتب الكتاب ، ما يخرجوا إلا بعد

الدخله .

— وح تعملى إيه دلوقت ؟

— ح اتصرف .

وعادت إلى غرفة الاستقبال ، ولكنها لم تدخل ، بل وقفت بعيدا بحيث يراها مراد ، ولا يراها جلال ، وجعلت تشير بيدها لمراد أن تعال . وقال مراد بصوت عال دون أن يتحرك :

— إيه . في إيه ؟

ووضعت أصبعها على شفيتها تأمره أن يلزم الصمت ، ثم عاودت الإشارة له بيدها ، فذهب إليها وهو ضيق بها ، وما إن وصل إليها حتى همست له :

— روح البس هدومك عشان تخرج مع أحلام وجلال : قوام .

وهرول إلى غرفته ، وفتح درج « الشوفير » وبحث عن قميص نظيف له ، فلم يجد فأخذ قميصا من قمصان سامى ، ولحج سامى وهو يسرح شعره ، فقال له :

— سيب القميص ده .

فقال مراد .

— ما عنديش قمصان . كل قمصاني اتوسخت .

وأسرعت الأم إليهما وقالت لسامى الذى انتزع القميص من يد أخيه :

— خليه يلبسه يا سامى .

— لا يا ستى . عشان يجيولى نصين ؟

— إن قطعه أجيب لك غيره .

— ما ليش دعوه .

— طب اديهوله واشترى لك بداله .

وقال سامى وهو يلقي بالقميص فى وجه مراد :

— إذا كان كده معلىش .

وراح مراد يرتدى ثيابه فى عجلة ، وأمه تعاونه ، ووقعت عيناها على

حذاءه ، فقالت له :

— جزمتهك وسخه قوى .. فىن الورنيش ؟

فقال سامى وهو يغادر الغرفة :

— لو كانوا بياكلوه ما كانش يلحق يخلص بالشكل ده .

وراحت الأم تلمع حذاءه بخرقة ، حتى إذا اطمأنت إلى مظهره ،

رنت إليه لحظة وقالت :

— ياما نفسى تفضل نضيف كده على طول .

وسارا إلى غرفة الاستقبال ، ودخلا . ولمح مراد كأسا على الصينية

فيها شراب وردى بين الكئوس الفارغة ، فخطر له أن يتناولها ولكنه وقف

مترددا ، وأحست أحلام به ، فقالت له :

— اشرب الشربات بتاعك .

ورفع الكأس إلى شفتيه ، فقال له سامى :

— حاسب توسخ القميص .

وابتسم الجميع إلا نبيلة فقد ظلت ساهمة ، ولاحظ جلال صمتها

فقال لها :

— مالك النهارده ؟ ساكتة ليه ؟

وتوردت وجنتها ، وأحست دماء حارة تتدفق في عروقها ، وقالت
وهي تمرر يدها على جبينها :

— مش عارفه مالى . عندى صدا ع شويه .

وقال لها أبوها :

— خدى لك اسبرنتين وكباية شاي وخشى نامى .

ونفضت لتفر من الغرفة ، خيل إليها أن العيون كلها صوبت إليها ،
وأن أمرها كاد ينكشف .

وقام جلال وقال لأحلام :

— يللا .

ونظرت الأم إلى مراد ، فنهض وسار جلال وأحلام إلى جواره
وانطلق خلفهما مراد . وقبل أن يصل إلى الباب كان مراد يسير بينهما .
وأحس به جلال ، فلم يشعر بارتياح ، وكبت عواطفه وابتسم وقال
له :

— جاى معانا ؟

فقال مراد فى ثقة :

— آه .

ولم تنهره أمه ، ولم يزجره أبوه ، فقال له جلال :

— تشرف .

وانطلقوا وقد تكدر صفو جلال ، وإن راح يربت على ظهر مراد ،
ويعمر يده على شعره . وبلغوا الجزيرة ، وساروا فى الطريق المنساب على

ضفة النيل ، وقد أضيئت المصابيح الخافتة التي عجزت عن قهر جحافل الظلام ، وكان مراد يسير بينهما ، ويشاركهما الحديث .

وأراد جلال أن يسير مع أحلام جنباً لجنب ، فوسع من خطوه وانتقل إلى جوارها ، وإذا بمراد يندس بينهما ويفصلهما . وضاق جلال به ذرعاً ، فجذبه من يده ، ونقله إلى يمينه فصارت أحلام عن يساره لا يفصل بينهما فاصل .

والتصقت كتفه بكتفها ، ومال رأسهما حتى كادا أن يلتصقا ، والتقت العيون وهمس جلال :

— أحبك .

فقال مراد .

— بتقولوا إليه ؟

فقال جلال في اضطراب :

— كنت باقول الجو لطيف النهارده .

فقال مراد :

— أبدا . الدنيا حر موت ، أنا عارف طايقين تتلرزقوا في بعض كده

ازای ؟

وابتعد جلال عن أحلام ، وقد لمعت العيون بالبسمة التي كبتها

الشفاه !

وانطلقوا ، وما إن ابتعدوا خطوات حتى التصق الكتفان ، ومال الرأسان ، وتحدثت العيون ، وتحركت المشاعر في الصدور ، وهمس

جلال مغازلا :

— قمر .

ومست الكلمة أذن مراد ، فقلب وجهه في السماء وقال :

— فين ده القمر ؟ مش شايف حاجه .

فقال جلال ، وهو يئد البسمة التي ولدت على شفثيه :

— سألتني أول الشهر العربي إمتى ؟ قلت لها ، لما يطلع القمر .

فنظر مراد إليه في دهش وقال :

— سألتك إمتى . أنا ما سمعتش حاجه .

وأشاحت أحلام بوجهها حتى لا يرى أخوها البسمة العريضة التي

ارتسمت على وجهها ، وقال جلال ليغير مجرى الحديث ، وهو يشير إلى
مركب يسير في النيل .

— شايف المركب ماشى بالليل ازاي ؟

فقال مراد :

— وإيه يعني ، ما المركب يمشى بالليل وبالنهار .

فقال جلال :

— صحيح .

وضربه على ظهره بقوة وهو يقول له :

— شاطر . ما كنتش فاهم إنك كده .

ووصلوا إلى جسر التحرير ، كان يأتلق بالنور والسيارات تنساب

فوقه في صفوف ، والناس على جانبيه يتدافعون بالمناكب ، فاندسوا بين

الجموع ، وقد أتاح الزحام فرصة التصاق جلال بأحلام رغم أنف
مراد .

ونادى صوت نسوى رقيق :

— جلال .. جلال ..

والثفت جلال خلفه ، ثم خفف من خطوه ، ولاحظت أحلام
تمهله ، فسارت في طريقها ، ومدت يدها وأمسكت مرادا من يده .
ونظرت خلفها فألفت جلالاتا يحادثان شابة جذابة وبيتسم ، فاربد
وجهها ، وتحركت عقارب غيرتها ، ولم تنطق صبرا ، فعجبت مراد من
يده ، ووسعت خطاها وراحت تشق طريقها بين الكتل البشرية
المتدفقة .

واشرأب جلال بعنقه فلم يجد لأحلام أثرا ، فجعل يتلفت ثم انطلق
يجد في أثرها ، ولكن أفواج الموج البشرى المتدفق على الجسر كان يعوق
تقدمه .

ووصل أخيرا إلى محطة السيارات ، ولمح أحلاما ومرادا في سيارة
بدأت تتحرك فهتف :

— مراد .. مراد ..

وأشاحت أحلام بوجهها عنه في غضب ، فضرب كفه بقبضة يده في
حنق ، وعقد العزم على أن يتركها الليلة لغيرتها تؤرقها وتنهش صدرها .
وعادت أحلام إلى الدار ، واتجهت إلى غرفتها حانقة ، وفطنت أمها
إلى غضبها ، فخفت إليها وقالت لها :

- رجعتی لوحدك ليه ؟ أمال فين جلال ؟
- سابنى ووقف يكلم واحده ، فته وجيت .
- وقف يكلم واحده ، إزای ده ؟
- أهو ده اللى حصل .
- ماتزعلش نفسك ، بس لما يبجى .
- وبدأت أحلام تخلع ثيابها وتلقمها فى غضب ، وغادرت أمها الغرفة
وذهبت إلى حيث كان زوجها وقالت له :
- شفت جلال عمل إيه !
- ونحى الرجل الصحيفة التى كان يطالعها وقال :
- عمل إيه ؟
- ساب أحلام ووقف يكلم واحده .
- وعملت إيه أحلام ؟
- فاته وجت .
- غلطانه .
- غلطانه ازای ؟ أمال كنت عايزها تعمل إيه ؟!
- تستنى لما تشوف مين ده ، مش يمكن قريته ، واحده من
معارفهم ؟
- بس لما يبجى .
- حتعملى له أيه ؟
- ح افرجه .

— مالكيش دعوه .. سيبيهم هم يصفوا مشاكلهم من غير ما حد
يتحشر بينهم ، يكره ح بيان لك إنها حكاية هايفه .
— هايفه ! بكره ح تشوف .
وتحركت لتغادر الغرفة ، ثم وقفت قليلا ساهمة ، خطرت لها فكرة ،
فأغذت السير إلى حيث علق زوجها ثيابه ، وراحت تعبث في جيوبه ،
وتقلب في أوراقه وهي تغمغم :
— مين عارف . يمكن . ! الرجاله كلهم خاينين وعينهم فارغه ،
وماهمش أمان .

الفصل الثاني عشر

أطفئت الأنوار ، وساد الظلام ، ونام حسين وزوجته وأولاده ، وبقيت أحلام مسهدة ، لا يمشى الوسن إلى جفניה ، ولا يغادر القلق صدرها ، ولا يهدأ لها بال ، ولا يستقر لها قرار . كانت تتقلب في فراشها تقلبها على جمر ، ما أن يمس جنبها الأيمن الفراش حتى تدور وتستلقى على ظهرها ، ثم تكمل دورتها لتنام على جانبها الأيسر ، وسرعان ما تعود سيرتها الأولى .

وكانت تحكم الغطاء عليها ، وتغطي وجهها ، وما تلبث أن تدفعه بيدها ، ثم ترفسه بقدمها ، ثم تعود وتجذبه بيدها وتسدله على جسمها القلق المحموم .

وكانت نبيلة ترقبها في صمت ، وخطر لها أكثر من مرة أن تحادثها لتنتشلها من ذلك القلق المضنى ، ولكنها كانت تتريث لعلها تهجع وتروح في سبات ، وظلت أحلام في عذاب ، فلم تطق صبرا ، وقالت وقد رفعت رأسها عن الوسادة ورمت ببصرها إليها :

— معذبه نفسك كده ليه ، الموضوع بسيط خالص .

ودفنت أحلام وجهها في الوسادة ، وشهقت ، فمدت نبيلة يدها وأضاءت الأباجورة ، ثم اتجهت إلى سرير أحلام وجلست على حافته ،

وقالت :

— قولى لى : بتفكرى فى إيه ؟ .

فقالت أحلام وهى تبكى :

— يسينى ازای وانا ماشيه معاه ويكلم واحده تانيه ؟

— وفيها إيه يعنى ؟ ما استنتيش ليه لما يرجع ويشرح لك كل حاجه :

غرتى قوام ! خليتى لبتوع زمان إيه ! .

ومالت نحوها ، وقالت وهى تمرر يدها على ظهرها :

— عايزه الحق . إنتى غلطانه .

وأجهشت أحلام بالبكاء ، فقالت لها نبيلة :

— بتعيطى ليه دلوقت ؟

— عشان عارفه ان أنا غلطانه .

— خلاص ، مدام معترفه انك غلطانه ، كل حاجة ح تبقى سهل ،

لما ح بيعجى بكره ح تتصلح كل حاجه .

والتفتت أحلام إليها وقالت فى لهفة :

— تفتكرى انه ح بيعجى بكره ؟

فقالت لها نبيلة وهى تهز رأسها :

— بقى عشان كده بتعيطى ! اطمنى . ح بيعجى . آمال ح يروح

فين ؟

وجلست أحلام فى فراشها وقالت :

— إن جه ح اعتذر له ، ح اقوله انى غلطانه ، ومش ح اعمل كده

تانى .

قالت لها نبيلة :

— إياكى تعتذرى له ، مثلى عليه . اعملى انك زعلانه لغاية ما يعتذر
لك عشان ما تبقيش انت اللى غلطانه .

وابتسمت أحلام على الرغم من الدموع المترققة فى مآقيها وقالت
وهى تدفع نبيلة فى صدرها فى حنان :

— اتعلمتى الحاجات دى فىن ؟

فقالت نبيلة فى غرور :

— الحاجات دى ما تتعلمش . نتولد بيها . خليكى ثقيله .

ونامت أحلام وسحبت نبيلة عليها الغطاء ، ثم أطفأت نور الأباجرة
واندست فى فراشها ، واستغرقت فى النوم .

وأصبح الصباح ، ودبت الحياة فى الشقة ، وراح الأولاد يهرولون
ويصيحون قبل أن يغادروا الدار إلى المدرسة ، وحملت نبيلة حقيبتها
وأسندتها على عجزها ، وقبل أن تنصرف ألفت أحلام تملأ القللى وهى
ساهرة ، فندت منها وقالت :

— والله ح ييجى . بس مش ح ييجى الصبح . ح ييجى لما يخلص
شغله .

وغادرت المطبخ وهى تصيح :

— ماما .. ح اتأخر العصر ، عندنا بروفه لحفلة التمثيل .

وقالت الأم وهى تقوم بلم ما بعثره الأولاد قبل خروجهم من ملابس

وأوان وفتات خبز وقصاصات ورق :

— والله ما انا عارفه التمثيل ده لزمته إيه !

ولم تحفل نبيلة باعتراضها ، وانطلقت كالطيف على أطراف أصابع قدميها ، ودوى في أذنيها صوت بوق السيارة ، فقالت وهي تجرى :

— أنا نازله . العربيه جت .

وصفق الباب خلفها .

وخلت الشقة من الأب والأولاد ، ولم يبق بها إلا الأم وأحلام وهالة ، أما عاطف فقد كان في طوافه اليومي على شقق الجيران .

وانتهت أحلام من عملها اليومي الرتيب ، وبدأت في كى ثوب من ثيابها ، واقتربت أمها منها وهي تحمل هالة وقالت لها :

— لما ييجى جلال أنا اللي ح اخش له .

فقالت أحلام ، وقد رفعت المكواة عن الثوب :

— ليه ؟

— مش ح تعرفى تكلميه ، أنا اللي ح اعرف أكلمه .

وخشيت أحلام أن تجرح أمها شعوره ، أو تسيء إليه من حيث لا

تدرى ، وتسبب لها المتاعب فقالت لها :

— أرجوكى يا ماما تسيبى الموضوع ده ليه .

فقالت لها أمها فى تهديد :

— بقى اسمعى . لو قرش ملحكتك مره ، ح يقرشها على طول . ح

تبقى هفيه .

— ما تخافيش .

وراح الوقت يمر وييدا وييدا ، وعاد الأولاد من مدارسهم ، وجاء الزوج . ومالت الشمس للمغرب ، ولم يأت الحبيب ، فطفقت أحلام تغدو وتروح فى الشقة فى قلق شديد ، كانت كلما سمعت صوت وقوف سيارة تهرع إلى النافذة تنظر وهى تأمل أن يكون جلال جاء فى رفقة شقيق ، ولكن سرعان ما يتبدد الأمل ، ويستبد بها يأس مرير .

ودق جرس الباب الخارجى ، فخفق قلبها فى شدة ، ولفها اضطراب ، وراحت دماؤها تندفق حارة فى عروقها ، وخفت إلى الباب ووقفت لحظة تصلح هندامها وشعرها ، ثم مدت يدها تفتح الباب فى تودة ، كانت أشبه بمقامر يفحص ورقه فى حرص ، خشية أن يفجع فيه . ولحت جلالا ، فاشتد وجيب قلبها ، وربما اضطرابها واحمرت وجنتاها ، ولكنها فتحت الباب على مصراعه وقالت فى فرح :

— أهلا وسهلا .. اتفضل .

وذهب إلى غرفة الاستقبال ، وقال جلال قبل أن يجلس :

— تقدرى تقولى لى مشيتى امبارح ليه ؟

فقال فى اضطراب :

— يعنى ما انتش عارف ؟

— لأ مش عارف .

— لما لقيتك سبتنى ومشيت اضطريت أمشى .

— سبتك ومشيت !؟

— بصيت ما لقتيكش جنبى . ما قتلش رايج فين ..
— هو انتى استنتينى علشان أكلمك .
— كنت اقف فين والناس عماله تزق فى بعضها ؟
— طب ولما ندهت عليكو وانتو فى الأتوييس وديتى وشك الناحيه
التانيه ليه ؟ أنا مش فاهم إيه الى زعلك .
— عايزنى أفرح لما تسيبنى وتكلم واحده تانيه ؟
— ما تقوليش سبتك ، واحنا ماشيين واحده كانت زميلتى فى الجامعه
شافتنا ، ندهت علىّ يا دوب رحت لها ، والتفت علشان أقدمها لك ،
بصيت ما لقتيكش .

ودنا منها وقال لها :
— مشيتى ليه ؟ غرقى !
فقالت وهى تشيح بوجهها عنه فى دلال :
— الى بيحب لازم يغير .
ثم عادت ونظرت إليه فى إغراء ، وتعطلت لغة الكلام وتخطبت
العيون ، فلف ذراعه حولها وقبلها قبله طويلة حارة .
وأقبلت سوسن ورأتهما وهما يتعانقان ، فصاحت وهى تهم بالعدو :
— ماما .. ماما .. الحقى .

وانفصلا فى فزع ، وفى مثل لمح البصر جرى جلال خلفها حتى لحق
بها ، فأمسكها ووضع يده فى جيبيه وأخرج قطعة نقود ، دسها فى راحتها
وقال لها :

— خدى اشترى حاجه .

وفتح الباب ودفعها منه ، وضربها على مؤخرتها ، ثم أغلق الباب وعاد إلى غرفة الاستقبال وهو يزفر فى راحة .

وجاءت الأم تسعى ، وخلفها زوجها ، ودخلا غرفة الاستقبال فألفيا أحلاما وجلالا يتناجيان فى ود ، فصافحا جلالا وجلسا ، وراح الزوج ينظر إلى زوجته وعلى شفثيه بسمه ، وفى عينيه كلام ، لو ترجم لكان : « مش قلت لك . ماتت حشريش بينهم ، سبيهم يصفوا مشاكلهم لوحدهم . شفتى ! جالك كلامى ! » .

وراح جرس الباب یرن رنینا متصلا ، فقالت الأم :

— نفسى سوسن ما تجطش إيدها ع الجرس على طول ، هى فاكركه البوايين واقفين ورا الباب ؟

وسمع صوت فتح الباب ، واندفاع سوسن وهرجها ، وما أن وصلت إلى الغرفة حتى صاحت :

— ماما .. ماما الحقى .

واتسعت عينا جلال رعبا ، وأطرقت أحلام خجلا ، ثم قامت لتغادر الغرفة قبل أن تشى سوسن بها ، واستشعرت عرقا باردا يتفصد من وجهها ، وخيل إليها أن لونها قد غاض ، وقالت الأم :

— فيه إيه ؟

فقالت سوسن :

— عاطف شحت برتقاله من الجيران .



مش قلت لك : ما تتحشريش بيهم ..

وارتمت أحلام في مقعدها ، وزفر جلال في راحة ، وهو يوسع خناق
الكرافاة ، وأقبل عاطف وهو يحمل البرتقالة ، وقال في صوت ثابت ،
لا أثر للخوف عليه :

— أنا ما شحتش .

وقال له أبوه :

— أمال مين ادهلك ؟

— هم مادوهاليش كده .

— أمال ادوهالك ليه ؟

— عشان جببت لهم سجاير .

فابتسم جلال وقال :

— مايقاش شحتها ، خدها أجرة المشوار .

وجلست سوسن ، وراحت تنقل بصرها بين جلال وأحلام ، ثم
تضحك وتخفي وجهها في راحتها ، وخشيت أحلام أن تسألها أمها عن
سبب ضحكها . فتبوح بالسر الذي تشتبه أن يكشف ستره ، فأشارت
إليها بيدها أن تأتي ، فذهبت إليها ، فأسرت أحلام في أذنها أن في درج
ملابسها قطعة شيكولاتة عليها أن تأخذها على ألا تعود حتى ينصرف
جلال .

ودوى صوت كلاكس سيارة ، فقال جلال :

— ده شفيق إيه اللى جابه ؟

فقال حسين وهو ينهض :

— خليه يتفضل .

ولم يتحرك جلال ، وأسرع حسين إلى النافذة المطلة على الطريق .
وأطل منها وقال :

— اتفضل .

وقال شفيق وهو في السيارة :

— جلال موجود ؟

— أيوه . اتفضل .

وصعد شفيق ، وقال لجلال وهو يصافح الموجودين :

— رحت لك البيت مالمقتكش ، سألتهم رحت على فين ، قالوا ما
يعرفوش ، قلت لروحي ضروري ح ييجى على هنا . ح يروح فين ؟
الرجل تدب مطرح ما تحب .

وجلس شفيق وضحك حسين وقال :

— إنت غاوى أمثال انت راخر ؟

فقال شفيق :

— ده المثل الوحيد اللي اعرفه .

وراح شفيق يقلب عينيه في المكان ، ويشرب بعنقه ويمد بصره إلى
الردهة ، كان يبحث عن نبيلة ، وهم أكثر من مرة أن يسأل عنها ، ولكنه
كان يكبح جماح نفسه .

ولاحت نبيلة في الطريق مقبلة ، وقد وضعت حقيبة كتبها على
عجزها ، ولحمت سيارة شفيق من بعيد ، فجعلت تنفوس فيها ، حتى إذا

ما تيقنت منها وسعت من خطوها ، ولو طاوعت نفسها لراحت تعدو في الطريق .

وبلغت الدار ، فألقت على السيارة نظرة ، ثم دلفت إلى مدخل السلم ، وأخذت تصعد في الدرج قفزا ، ووجدت باب الشقة مفتوحا فانسابت منه إلى غرفة الاستقبال .

وتريث قليلا تلتقط أنفاسها ، وأخرجت من حقيبتها مشطا وراحت تسرح به شعرها ، ثم تقدمت وقالت :

— السلام عليكم .

فقال جلال وشفيق :

— وعليكم السلام .

وتقدمت تصافحهما ، صافحت جلال في عجل ، وبقيت يدها في يد شفيق برهة ، وقالت الأم :

— جيتى بإيه ، يعنى ما سمعناش صوت عربية المدرسة ؟

— جيت فى الأتوبيس ، مش قلت لك الصبح عندنا بروفه لحفلة

التمثيل ؟

— لو قلتى انك ح تيجى فى الأتوبيس كنا بعتنا لك سامى .

— وفيها إيه يا ماما لما آجى لوحدى فى الأتوبيس ؟

— يا بنتى ما بقتيش صغيره .

ووجد شفيق الفرصة سانحة ليشارك في الحديث ، فقال :

— أمال لما ح تروح الجامعة ح تروح فى إيه ؟

فقلت الأم في استنكار :

— الجامعه ! كلها السنه دى وتقعدي البيت .

فقال شفيق في ارتياح :

— أحسن .

فقلت نبيلة :

— أنا لازم اروح الجامعه ، وابقى دكتوراه . ما تتكلم يا بابا .

— ناخذ رأى الموجودين . إيه رأيك يا جلال ؟

فقال جلال وهو ينظر إلى أحلام :

— أنا رأيي قلته عملي .

وابتسمت أحلام ، وسرت الأم ، كانت تحسب أن الأمر لا يخرج عن

معركة بينها وبين ابنتها ، ينبغي أن تفوز فيها تحفظ كرامتها .

وقال الأب :

— وانت يا شفيق رأيك إيه ؟

— أفضل في البيت واحده عندها حلوه ، اتعلمت كفايه ، عن دكتوراه

عندها مضعضعه ونضاره تخن كده .

وبالغ في سمك النظارة عندما أشار بأصبعيه ، حتى أن نبيلة

ابتسمت ، على الرغم من أن الرد لم يكن في صفها .

وقالت :

— ضرورى كل دكتوراه تكون لابسه نضاره تخن كده !

وأقبل سامى وهو يحمل الكلب على ذراعه ، ووقف بعيدا يصغى إلى

الحديث الدائر ، وقال شفيق :

— إن ما كانتش نضارتها تخن كده بيكون وشها كرمش ، شوفى
بتتعد كام سنه فى الكليه .

وقال جلال :

— من رأى يعملوا كشف هيئه على البنات الى تروح الجامعه ، وما
يسمحوش إلا بدخول الوحشين بس ! .

فقال سامى لنبيله :

— خلاص . ضمنتى إنك تخشى الجامعه .

والتفتت نبيله إليه فى غضب وقالت :

— إيش حشر العيال فى الكلام ده ؟

فقال الأم فى زجر :

— وبعدين معاكم .. لازم تتناقروا . روحى يا نبيله غيرى هدومك

وتعالى .

وغادرت نبيله الغرفة وهى تنظر إلى سامى شذرا ، وانطلقت إلى
غرفتها ، وراحت تخلع ثيابها ، وترتدى ثوبا أخاذا ، وقبل أن تكتمل
زينتها تذكرت شيئا ، فأسرعت إلى غرفة الاستقبال وشعرها منفوش ،
وقالت :

— بابا ، حفلة التمثيل بعد بكرة ، ضرورى تحضرها .

فقال الأب :

— ياريت ، مش فاضى ورايا شغل .

فقال نبيلة في عتاب :

— هو كل سنه ما يحلاش الشغل إلا يوم حفلة التمثيل ؟
— عندي لجنة .

فالتفتت إلى أمها وقالت : وانت يا ماما وراكي إيه ؟
— ولا حاجه .

فقال نبيلة في فرح : خلاص . ح تيجي أنت وأحلام وجلال .
ثم التفتت إلى شفيق وقالت :
— وانت .

فقال شفيق :

— حاضر .

— الحفله ح تبتدى الساعة اربعة .

وقال شفيق وهو يلتفت إلى الأم :

— أفوت عليكم أنا وجلال الساعة ثلاثه ونص .

فقال الأم :

— لأ تيجو تتغدوا معنا وننزل سوا .

فقال جلال :

— معلىش . اعفونا من حكاية الغدا دي .

فقال شفيق :

— لأ . ح نيجي نتغدى بس بشرط .

فقال الأم :

— إيه هو ؟

فقال شفيق :

— انكم تيجوا كلكم معايا العزبه يوم الجمعة ، نقضى اليوم كله
هناك .

فقال الأب فى استنكار :

— نيجى كلنا ؟؟ إزاي ؟ .

— المسافه قريه ، ح افوت عليكم الساعه سبعه الصبح وآخذكم فى
العريه .

فقال الأب فى سخرية :

— با اعقل ، مالك ومال الشبكه دى ؟

فقال شفيق وهويبتسم :

— أنا وأنا بكامل عقلى ، باعزكم يوم الجمعة ومصمم على العزومه
دى .

فقالت الأم وهى تهز كتفها :

— إيه . ذنبك على جنبك .

وقال الأب :

— على نفسها جنت براقش .

الفصل الثالث عشر

شرعت الأم في دس قدمها في الجورب النايلون ، وراحت تعالجه في حرص شديد ، كأنما نسج من خيوط العنكبوت ، ولما تم لها لبسه ، انتصبت واقفة ، ودارت بعجزها ونظرت لتطمئن إلى استقامة خط الجورب الخلفي ، وإذا « بسوزى » يقفز من فوق السرير ، ويهرع إليها ويشب على ساقها فتتشب أظافره في الجورب وتمزقه ، فدفعته بقدمها في غيظ وهي تقول :

— كتنا ناقصينك انت راخر .. يا سامى ... ، يا مراد .. تعالوا خدوا

الكلب ده من هنا .

وأقبل سامى ، وقال :

— فيه إيه يا ماما ؟

— خد الكلب ده الى من يوم ما جه ما شفنا يوم راحه .

فقال سامى وهو ينحنى ليحمله :

— عمل إيه بس ؟ دا راجل طيب .

فقالت وهي تخلع الجورب وتنظر فيه :

— قطع الشراب الى لسه تمنه ما بردش ، وامبارح طلع قطن الكنبه ،

وأول امبارح نزل الشارع مع عاطف جه وسخ البياضات كلها ، وما زاد
(أم العروسة)

وعاد إلا نومه على السرير على طول ، هي بقت شقتنا ، دى بقت شقة أبوه .

وجاء حسين وقال :

— أبوه مين بس ؟ هو فيه أبو حد هنا غيرى ، ياللا ، انتى لسه ما لبستيش ؟ الناس قلقوا .

فقالت وهى تشير فى غيظ إلى الكلب :

— ما هو السبب ، هو اللى عطلنى .

— دا انتى بتلبسى من بعد الغدا ، الساعة بقت تلاته ونص ، فاضل نص ساعة ع الحفله .

— أنا خلصت أهو .

والتفتت إليه وقالت :

— إنت ح تنزل امتى ؟

— الساعة سته .

— طب إن صحيت هاله لبنها عندك فى التلمية ، ولما تيجى تخرج سلمها لسامى .

وتلفتت وقالت :

— أمال فين مراد ؟

فقال سامى :

— بيذاكر .

ونادت الأم :

— مراد .. مراد .

وجاء مراد وفي يده كتاب إنجليزى وفي خده وشفتيه أثر حبر ، فقالت

له :

— أنا مش فاهمه ، إنت بتشرب الحبر ؟ إيه الحبر دا اللى فى بقلك ؟ .

فقال وهو يمسح فمه بيده :

— كنت باحل الحساب ، وأنا بافكر نسيت وحطيت سن القلم فى

بقى .

واقترب خطوة وقال :

— تعرفى يا ماما أنا صعبان على قوى الأولاد الانجليز الصغيرين .

— ليه ؟

فقال وهو يرفع الكتاب الإنجليزى فى يده :

— إزاي ينطقوا الكلام الإنجليزى الصعب ده ؟ !

فقالت له أمه :

— ما يصعبش عليك غالى .

وقال له أبوه :

— والله انت اللى صعبان على .

ثم التفت إلى الباب وقال :

— واللى مستنيين بره صعبانين على روخرين .

فقالت الأم :

— أنا خلاص لبست أهه .. خلى جلال وشفيق وأحلام يسبقوني ع

العريه ، وأنا نازله على طول . وابنت يا سامى خد أخوك وع المطبخ

اغسلوا الاطباق ، وشيلوهم محلهم .

فقال سامى :

— أمال ح نذاكر إمتى ؟ ما تجيئوا لكم خدامه تغسل الاطباق وتكنس

وتمسح .

فقالت الأم :

— إن جينا بنت ح ندفع لها أجرتها م الفلوس الى بتروحووا بيها السيما ،

واللى بتركبوا بيها عجل .

فقال مراد وهو يضع كتاب الإنجليزى على التواليت :

— لا . دا احنا نغسل الاطباق قوى ، ونلحسها بلسانا كمان .

وخرج سامى ومراد من الغرفة ، وسمع صوت مغادرة أحلام وجلال

وشفيق الشقة ، والتقى الوالد ومراد وسامى فى المطبخ ، وإذا بالأوانى

والصحاف والشوك والسكاكين والأكواب مكدسة فى انتظار من

يتفضل بغسلها .

ووضع سامى الكلب على الأرض ، فأسرع يلحق الصحاف ،

وارتدى سامى « فوطه » المطبخ ، وشمر عن ساعده ، بينا راح مراد

يحمل الأوانى على صدره ، دون أن يحفل بثيابه .

وجاء عاطف يصيح ، وفى يده غصن شجرة ، يضرب به الأرض :

— جلال وأحلام رايحين فين ؟ أروح معاهم .

خرجت الأم من غرفتها بعد أن اطمأنت إلى أناقتها ، والتقت بعاطف

فى الردهة ، وما إن وقع نظره عليها حتى قال :

— وانتى خارجه معاهم ؟ وأنا ح اروح معاكم .

فقالته له الأم وهى تبعد يديه عن ثوبها :

— خليك هنا ، وح اجيب لك حاجه حلوه .

— ح تجيبى لى إيه ؟

— ح اجيب لك عروسه .

— لأ . أنا مش عايز عروسه ، أنا عايز عريس زى أحلام .

فقالته له وهى تبتسم :

— إنت راجل . تيجى لك عروسه .

— لأ . أنا عايز عريس ، عريس يركبني أتومبيل .

— طيب . بس اسكت ..

وهمت بالخروج ، وإذا به يعترض طريقها وقد بسط ذراعيه يحول بينها

وبين السير ، وغصن الشجرة يسد الطريق :

— مش ح تنزلى إلا لما تدبنى قرش قبله .

وفتحت حقيبة يدها ، وأخرجت منها قرشا ودفعت به إليه وانطلقت

فى سبيلها ، وهى تنظر إلى المطبخ وترى زوجها وسامى ومراد منهمكين

فى غسل الأواني والأدوات .

وهبطت إلى الطريق ، وتقدمت إلى السيارة ، فإذا بجلال قد جلس

خلف عجلة القيادة وأحلام إلى جواره ، ووقف شفيق عند الباب وقد

فتحته ينتظر ركوبها ، فصعدت إلى المقعد الخلفى ، وصعد شفيق فى

أثرها ، ثم انطلقت السيارة بهم ..

وبلغوا المدرسة ، وراحوا يصعدون في درج دائرى ، ورأت الطالبات أحلام فحرف إليها بعضهن يضافحها ، وإن كانت عيونهن تنفرس في جلال وشفيق .

ودلفوا إلى قاعة واسعة ، أقيم المسرح في صدرها ، وصفت فيها كراسى خيزران ، فاتجهوا إلى الصفوف الأمامية ، والأنظار تتبعهم ، كانت الطالبات في شوق إلى معرفة خطيب أحلام ، فلما جلست أحلام وإلى جوارها جلال ، سلطت الأنظار عليه تفحصه من قمة رأسه إلى أخمص القدم .

وراحت مدرستان تديمان النظر إليهم ، ومالت إحداهما على الأخرى وقالت :

— الثانى أحلى من خطيبها .

— والنبي ياختى رآخر شربات . ما وحش الاقلته .

ونهضت ، وراحت تصلح هندامها ، فقالت لها زميلتها :

— على فين ؟

— رايحه أسلم على أحلام ، واتفرج .

فنهضت الثانية وقالت :

— خدينى ياختى معاكى .

وانطلقتا إلى أحلام ، فلما رأتهما ارتبكت ، وقامت تحية لهما ، وقد

توردت وجنتاها بلون الورد .

وقالت الأولى :

— إزيك يا أحلام ؟

— الله يسلمك يا أبله منيره .

وقالت الثانية :

— سنه طويله ما حدش يشوفك ، يخونك العيش والملح .

— والله ما باخرجش يا أبله وداد .

وسكن اضطرابها ، فالتفتت إلى أمها وقالت تقدمها إليهما :
— ماما .

— أهلا وسهلا .

وقالت وداد متملقة :

— والله ما افكرناهاش ماما ، افكرناها أختك الكبيره !

وأرضى ذلك الملق غرور الأم ، فقالت :

— الناس كلها بتفتكر كده .

وقالت أحلام وهى تشير إلى جلال وشفيق :

— جلال والأستاذ شفيق .

ومدت المدرستان أيديهما ليتمتعا بالمصافحة ، وعيونهما تتجول فى

وجهى الشابين ، وقالتا :

— اتشرفنا .. فرصه سعيده خالص .

وقالت منيرة :

— أحلام دى .. دى .. دى أختنا .

وقالت أحلام وهى تشير إلى مقعدين خاليين إلى جوارهما :

— ما تفضلوا جنبنا هنا .

— متشكرين ، إنت عارفه ما نقدرش نقعد النهارده فى حتة واحده ،
أورفوار مؤقتا .

وانصرفنا وما إن ابتعدتا عنهم ، حتى قالت منيرة فى مرارة :

— بنت امبارح بقت عروسه النهارده ، أمال احنا مالنا .

فقالته وداد وهى تمصمص بشفتيها :

— قسم .

ثم رفعت بصرها إلى السقف وقالت فى ابتهاج :

— يا رب ارزقنا بقى بعدلنا .

فقالته منيرة :

— إن شاء الله يا وداد يا اختى . من بقك لباب السما .

وراح جلال يتفرس فى المسرح ، فألفاه مكوونا من موائد المطعم ،

وقد شدت جوانبه بالخيش ، أما الستارة فكانت من مفارش سرر شبك

بعضها إلى بعض بدبايس إبرة ، والتفت إلى أحلام وقال :

— أظن انتو ساهمتوا فى بنا المسرح ده .

فقالته أحلام وهى تبتسم وتشير بأصبعها إلى الستارة :

— طبعا ! مفرش السرير التالت ده بتاعنا .

وقالت لها أمها همسا :

— نفسى يا أحلام ما تشوريش بصباeck وانتى بتتكلمنى .

فقالته لها أحلام :

— يا ماما انتى نفسك فى حاجات كثير ، مش ممكن تتعمل .
وظهر الميكروفون أمام الستارة ، فقال شفيق فى تأوه :
— آه . ح نشرب أكبر مقلب ، الخطبة ، نفسى يطلع قانون يحرم
الخطابة فى الحفلات .

فقال أحلام وهى ترنو إلى جلال فى حب :
— كلهم نفسهم مفتوحة النهارده ، عمالين يتمنوا ، ماما قالت
نفسى ، وشفيق قال نفسى ، وانت ما نفسكش فى حاجه ؟
فقال وهو ينظر إليها فى حب :
— نفسى فى حاجات كثير قوى .
— نفسك فى إيه ؟ قول .

فقال وهو يرمقها بطرف عينه فى خبث :
— ما اقولش ، وان كنت عارف انك عارفه اللى نفسى فيه .
وأسبلت جفניה دلالة ، ورفت على شفيتها بسمة عذبة ، واقترب
رأسه من رأسها ، وإذا بصوت الناظرة فى جنبات القاعة ، فيفيقان من
حلم لحظتهما .
وراحت الناظرة ترحب بالمدعوين ، فى أسلوب متحذلق . فمال
شفيق على جلال وقال :

— أراهن إن اللى كتب الخطبة دى مدرس لغه عربيه عتيق .
فقال له جلال :

— أمال ح يكون مدرس انجليزى !

— مش قصدى . قصدى انه مدرس يهتم باللفظ بس بيفضل اللفظ
الرنان ولو شوه المعنى .

وقالت أحلام :

— الى بيكت الخطب كلها أبو الأسود الدؤلى .

— يدوب كده ، باين على الخطبه إنها من أيام سيدنا على .

وضحكت أحلام وقالت :

— مش أبو الأسود بتاع أيام سيدنا على ، دا الشيخ الى قاعد هناك
ده ، البنات مسمينه كده .

ونظر جلال وشفيق الى حيث أشارت أحلام ، فإذا بشيخ معمم
يصغى الى الناظرة فى انتباه ، وهو يهز رأسه إعجابا ، كأنما يصغى الى
مطربة ، فقال شفيق فى حماسة :

— مؤكد هو الى كاتب الخطبه دى ، لأن كل كلمه فيها لابسه عمه
وكاكولا .

— وانتهت الناظرة من خطبتها ، فصفق شفيق فى شدة ، وقال له
جلال :

— إيه الإعجاب ده ؟

— ده إعجاب بأنها خلصت الخطبه .

وفتحت الستارة ، وإذا بطالبة فى ملابس « بلياتشو » فضج الفتيات
بالضحك . فراحت ترقص حاجبها ، ثم قامت ببعض ألعاب بهلوانية .
وقفزت الى أعلى ، فإذا بها ترتفع حتى وصلت الى سقف الغرفة ، كان فى

وسطها جبل متصل ببيكرة حديد قرب السقف ، فلما قفزت جذب بعض زميلاتها المحتفيات خلف المسرح طرف الحبل الآخر .
وبقيت متعلقة في الهواء ، وتحرك ساقها وذراعها في حركات مضحكة ، بين ضجيج المدعوين وضحكهم .

وأغلقت الستارة ، ودوى التصفيق ، ففتحت الستارة ثانيا ، وأرخت الفتيات المحتفيات خلف المسرح الحبل قليلا ، ثم جذبته ثانية فبدت الفتاة كأنها تنحنى للمصفقين ردا على تحيتهم ثم تنتصب قائمة .
وسرى في القاعة همهمة ، بعد انتهاء ذلك المشهد ، وارتفعت الضوضاء ، وإذا بدقات متتابعة على خشبة المسرح تعلن بدء المشهد التالى ، وفتحت الستارة وانبعثت من الفونوغراف موسيقى راقصة ، وظهرت على المسرح فتيات في ثياب قصيرة بيضاء فبدت سيقانهن وأفخاذهن ، ورحن برقصن على الأنغام ، وحملت الأم فيهن وهن يتمايلن ، كانت تبحث بعيونها عن نبيلة وهى مبهورة النفس ، وفي وجهها قلق وضيق .

ودخلت نبيلة المسرح وحدها تسير على أطراف أصابع قدميها لتتقدم المجموعة ، كانت في ثوب وردى قصير غاية القصر ، وكان صدرها عاريا ، ولا يستر ساقها وفخذيها إلا جورب أبيض قصير ، وطرف الثوب الذى كان على شكل دائرة .

وشهقت أمها في صوت خافت :

— يادى الفضيحة !

ولم يلتفت أحد إلى اعتراضها ، كان شفيق يرمقها في إعجاب ، وقد
فغز فاه ، وراح جلال يرقب الرقصة في شغف أما أحلام فقد راحت تهز
رأسها في نشوة .

وتحركت الأم في مقعدها في ضيق ، وقالت :

— ليه نبيله تعمل كده ؟

فقال شفيق في نبرات حاملة :

— مدهشه .

وتألق ضوء خاطف ، وقالت الأم في فزع :

— صورها ! تبقى نايه لو نشر صورتها في مجله وهى بالشكل ده .

مش ح تتجوز أبدا ، قوم يا جلال هات الصورة منه .. دى فضيحه ..
ح يضيع مستقبل البنت ، مش ح تتجوز أبدا .

فقال شفيق ، وهو يحملق في نبيلة ويتبعها بعينه :

— اطمنى ما تخافيش ، أنا هنا .

وحسبت الأم أن شفيقا يعدها بأنه سيستولى على الصورة ويمنع

نشرها ، فقالت له :

— ربنا يسترک .

وانتهت الرقصة ، وأقفلت الستارة ، وأقبلت المدرسات على الأم

يصافحنها ويهنئنها :

— مبروك .. يا سلام على نبيلة . كانت مدهشة .

وراحت الأم تحملق فيهن وهى فى حيرة من أمرها ، وجاءت نبيلة

بملايس الرقص ، والفتيات يرمقنها فى حسد ، ويقلن :
— إيه ده كله ؟ .

وابتسمت فى زهو ، ولحتها أمها فصاحت فيها :
— وجابهه عريانه ؟ مش مكسوفه ؟ ياللا ع البيت ياللا .
وخف إليها شفيق وقال لها وهو يضافحها :
— مدهشه .. جنان .

فقالت الأم فى ضيق :
— صحيح جنان ، واللى يطاوعكوا يستاهل أكثر من كده .
والتفت شفيق إلى الأم وقال لها :
— إنت زعلانه ؟

— أمال عايزين أفرح ؟
— إيه اللى مزعلك .
— عاجبك كده ؟ عاجبك واقفتها عريانه ؟!

والتفتت إلى نبيلة وقالت فى عزم :
— نبيلة .. روحى البسى هدومك وياللا ع البيت .
وانسحبت نبيلة ، وقالت أحلام لأمها :
— مش ح نقعد لآخر الحفلة ؟!

فقالت الأم :
— ع البيت على طول .. يا نيتى لو طلعت الصورة فى الجرائين ح
يتوقف حالها . مش ح بتتجوز أبدا .. مين اللى يرضى يتجوز واحده

عريانه بالشكل ده ؟

فقال شفيق وهو يبتسم :

— ما قلت لك اطمنى أنا هنا .

وفهم جلال وأحلام ما يرمى إليه فابتسما ، أما الأم فلم تفهم قصده ،

وقالت فى ضيق :

— ما قلت لى اطمنى قبل كده ، ولا جبت الصورة ولا حاجه ، وأهو

المصوراتى دايـر يصور فى البنات ، أروح أنا اجيبها منه ؟

وتيقن شفيق أنها لم تفهم غرضه ، وأراد أن يرضيها فقال لها :

— أنا رايـج للمصوراتى أجيب الفيلم منه .

وذهب إلى الرجل واتفق معه أن يبعث إليه بصورة نبيلة فى حجم

كبير ، والصورة السلبية ، وأعطاه عنوانه ودفع له القيمة مقدما .

وأقبلت نبيلة بعد أن استبدلت ثيابها ، وما إن رأتها أمها حتى قالت

لها :

— ع البيت قدامى .

وسارت نبيلة وشفيق وأحلام وجلال وانطلقت الأم خلفهم وهى

تغمغم :

— دا مجنون اللى يسيب بناته على حل شعرهم .. قال على رأى المثل :

« كنا فى جره وطلعنا بره » .

الفصل الرابع عشر

استيقظ الأولاد مبكرين ، وراحوا يغدون ويروحون فى الردهة
مسرعين ، هذا يخلع ثيابه ليرتدى ثياب الخروج ، وذاك يمشط شعره وهو
يدور بعينه فى المكان ويقول :

— أمال الجزمه فىن ؟

وذهبت نبيلة إلى الساعة ونظرت فيها ، ثم اتجهت إلى غرفة أبويها
وطرقت الباب فى رفق وهى تقول :

— اصحوا بقى ما فىش وقت ، زمان شفيق جاي .

وقالت الأم من الداخل وهى راقدة فى فراشها :

— افتحى وخدى هاله لبسيها .

وفتحت نبيلة واتجهت إلى سرير هالة وحملتها وقالت لها مداعبة :

— تعالى يا ستى عشان تروحي العزبه ، يالى عمرك ما شفتى عزبه .

فقالت لها أمها :

— يعنى انتى الى شفتيها ؟

— طبعا شفتها .

— شفتيها فىن بقى ؟

— فى السينا .

وغادرت نبيلة الغرفة وقال الزوج :

— يا للا ما فيش وقت يا دوب تليسى .

ونفضت وهى تتمطى ، وتركت الغرفة ، فألفت أحلام قد انتهت من

عاطف ، وبدأت فى تمشيط شعر سوسن ، فقالت :

— ما فيش خروج قبل الشقة ما تتنظيف . سامعين ؟

فقال مراد :

— أنا ح اكنس الأوده المفروشه ..

وقال سامى :

— وأنا ح امسح المطبخ .

وقالت الأم :

— وانتى يا نبيلة املى القلل وحطى هدموم هاله فى شنطتها ، وما

تنسيش تاخذى هدموم لعاطف ومراد .

فقالت نبيلة وهى تبديل ثياب هالة :

— حاضر .

ودلفت الأم إلى الحمام وهى مسرورة ، لم تسمع اعتراضا ، ولم تر

تذمرا ، كانوا جميعا سامعين مطيعين .

وذهب عاطف إلى أبيه وهو يحمل كلبه ، وقال له :

— يا بابا احنا رايجين العزبه ؟

— أيوه .

— وح ناخذ سوزى معانا العزبه ؟ .

— أيوه .

— الا يا بابا العزبه يعنى إيه ؟

وحك الأب رأسه يظفره ، وشرد يفكر برهة ثم قال :

— العزبه يعنى بيت كبير حواليه غيطان .

— غيطان يعنى إيه يا بابا ؟

— يعنى جنينه واسعه تزرع كوسه وكرنب وبرتقال وموز وكل

الخصار والفاكهه اللى بتاكلها .

— آه .

فقال الأب وهو يعبث فى رأسه فى حنان :

— عايز حاجه تانى ؟!

— أيوه . عايز قرش .

ومد الأب يده فى جيب البنطلون وناولله قرشا ، فأطبق عاطف يده

عليه وقال :

— وسوزى عايز يضيع .

ودفعه أبوه فى رفق يخرجه من الغرفة وهو يقول له :

— بره يا بكاش .

وخرج عاطف من الغرفة وهو يضحك ضحكة تتم عن مكر ودهاء ،

وعادت الأم ، فقال لها حسين :

— سهلى شويه ما فيش وقت .

— دناح البس قبلك .

(أم العروسة)

ووقفت تفكر برهة ، ثم قالت له :

— قل لي ألبس إيه ؟

فقال وهو يطوح ذراعه في حنق :

— أوه . إنت لسه ما فكرتيش ح تلبسى إيه ؟ يبقى مش ح نخرج قبل

الضهر . البسى أى حاجه ، انتى رايحه فين يعنى !

وفتحت الصوان وراحت تقلب ثيابها لتختار منها ما ترتديه ، وهى

تقول :

— أنا عارفه أتومبيل إيه ده اللي ح يساعنا كلنا ! .

وأقبلت نبيلة تحمل هالة ، وجاءت أحلام وقد تأهبت للخروج

ونظرتا ثم قالتا معا :

— لسه ما لبستيش يا ماما !

— ناولوني الجزمه .

— حاضر .

— طلعي لي يا أحلام الشراب الأسود .

— حاضر .

— جهزتي شنطة هاله يا نبيله ؟

— جهزتها . فيه حاجه تانيه ؟

وأثلجت تلك الطاعة صدر الأم ، فتمنت أن يصبح ذلك حالهم على

الدوام ، وشاءت أن تنعم بتلك الطاعة الطارئة فقالت :

— روحى يا نبيله شوفى مراد مسح جزمته وخذ مناديل نضيفه واللا

عمل إيه ؟

— حاضر .

وتحركت نبيلة ، وذهبت أحلام وسوسن وعاطف إلى الشرفه ليرقبوا الطريق .

وقالت الأم :

— عيني بارده ع الأولاد النهارده ، إيه اللي جرى لهم ، متشطين من بدرى وكل ما نقول لهم حاجه ، يقولوا حاضر .

— مش فاضيين للزعيق والحناق ، عايزين يخلصوا . أنفسهم يغمضوا ويفتحوا يلاقوا أنفسهم فى العزبه .

— أنا عارفه ما كانش لك عزبه ليه .

— الحمد لله على كده .

وسمع نداء كلاكس سيارة ، وإذا بأحلام وسوسن وعاطف يقبلون مهرولين يتصايحون ، وبلغت أحلام غرفة والديها فقالت :

— جلال جاب عرييه وشفيق بعرييته .

فقالت الأم فى راحة :

— أيوه كده ، مش كنا ح نندس فى عرييه زى علبة السردين !

ووقف جميع الأولاد على باب الغرفة يحشون أمهم على الإسراع :

— ياللا يا ماما ياللا يا ماما .

— انزلوا انتو وأنا محصلاكو .

وقال الأب :

— سوسن ومراد ونبيلة وماما يركبوا مع شفيق . وأحلام وسامى وعاطف وأنا تركب مع جلال .

وانطلق الأولاد يعدون فى مرح ، وقال عاطف لسامى :

— خد سوزى .

— أنا مالى .

وتناولت أحلام يد عاطف ، وخملت الكلب وانطلقت وكل خالجة فيها تنطق بالغبطة والسرور .

وخلت الشقة إلا من الزوجين ، والتفتت زينب إلى زوجها وهى فى طريقها للهبوط وقالت :

— يا راجل ليه تفرق بينا ، كنا ركبنا سوا فى عربيه واحده .

— كل واحد منا ف عربيه عشان ناخذ بالنام العيال .

فقال فى دلال :

— قول إنك زهقت منى .

فلف ذراعه حول ظهرها ، وضغط على كتفها البعيدة بيده فى حب وقال :

— مش معقول .. تصدق . متيألى إننا متجوزين من كام شهر

بس .

— والأولاد دول كلهم .

— أنا عارف جم إمتى ؟

وهبطا إلى الطريق ، فخف إليهما جلال وشفيق وراحا يصافحانهما

ونظر الأب فألقى أحلاما قد جلست في المقعد الأمامي في العربة الأولى ،
ونبيلة قد جلست في المقعد الأمامي في عربة شفيق ، وقد أعطت هالة
لسوسن ، فقال :

— مراد يركب قدام جنب نبيله .

وقفز مراد في مثل لمح البصر من المقعد الخلفي إلى المقعد الأمامي ،
فأفسحت له نبيلة مكانا إلى جوارها ، وإن كانت ملامحها تنطق بعدم
رضاها .

وقال الأب لسامي ، قبل أن يهم بالصعود إلى السيارة :

— سامي . عد اخواتك .

فراح سامي يعدهم ثم قال :

— سته والكلب .

فقال الأب في إنكار :

— سته إزاي ! يبقوا ناقصين واحد عدهم تاني .

فراح سامي يعدهم مرة أخرى وقال :

— برضه سته والكلب .

وأخذ الأب في عدهم وهو يشير بأصبعه إلى كل منهم ، فلما أشار إلى

سامي فغرفاه ، فقد عرف خطأ نفسه ، وقال الأب :

— مش عارف تعدهم ؟! سبعة والكلب .

— آه . أصلي نسيت أعد نفسي .

وقال الأب :

— مش ناسيين حاجه قبل ما نمشى ؟

وقال الجميع :

— مش ناسيين حاجه ياللا بقى .

وركب الجميع ، وانطلقت السيارتان ، حتى إذا بلغتا محطة بنزين
عرجتا للتزود بالوقود وأطلت سوسن من نافذة السيارة وقالت :

— بابا .. بابا . أنا ما خدتش قرش . خليه معاك لما نوصل .

وقال عاطف وهو يعطى الكلب لأبيه :

— بابا . خد سوزى شويه .

— حاضر ..

والتفتت أحلام إلى أبيها وقالت :

— بابا ما قتلش . لما فت ع الصايغ قال لك إيه ؟

— قال بعد بكره ح يسلمنا كل حاجه .

وقرعت « بابا » المتناثرة من السيارتين أذن عامل المحطة فاقترب من

النافذة الجالس عندها حسين وقال له :

— اسم النبى حارسهم كلهم ولادك ؟

فقال له حسين وهو يبتسم :

— أيوه .. والباقي سبتهم فى البيت .

فقال له الرجل فى رثاء :

— الله يكون فى عونك . دنا عندى تلاته عقلى ح يشت .

فقال له حسين فى بساطة :

— تلاته يقوا صعب ، لكن لما ييزيدوا عن كده أمرهم ييهون .
واستأنفت السيارتان رحلتها ، كان شفيق في المقدمة وجلال
خلفه ، وكان السكون مسيطرا على سيارة جلال ، الأب جالس يعبث
في شعر الكلب وعاطف واقف ينظر من زجاج السيارة الخلفي يشاهد
الحقول والترع والأشجار الممتدة على جانبي الطريق وهو مأخوذ .
كانت أول مرة يشاهد فيها ذلك الفضاء العريض . ووضعت أحلام
رأسها على حافة المسند وشردت ببصرها ، وهامت في عالم من
الأحلام ، كانت السعادة تغمرها ما دامت بالقرب من جلال .

وضاق سامى بذلك الصمت ، فقال :

— تعرف العزيزه يا جلال ؟

— طبعا .

— طب ياللا نطلع من شفيق .

وزادت سرعة السيارة ، وانحرفت إلى اليسار قليلا . واستمرت في
تقدمها حتى أصبحت في محاذة سيارة شفيق فصاح سامى في نشوة :
— هيه .

وشاركته أحلام في صياحه ، ثم التفت عاطف وشاركهما في التهليل
ونظر الأب فألقى الأم ناحيته لم يكن يفصل بينهما إلا لوحا زجاج
السيارتين ، فأخرج لسانه لزوجته ، وانسابت السيارة حتى أصبحت في
المقدمة .

وضايق ذلك ركاب السيارة الأخرى ، فقال مراد :

— ياللا نسبقهم .

وقالت نبيلة :

— ياللا يا شفيق .

ولم تعترض الأم ، كانت تفكر في طريقة ترد بها على مداعبة حسين .
واندفعت السيارة في عدوها تنهب الأرض ، ومرق شفيق بمهارة من
جوار سيارة جلال ، ونبيلة ومراد وسوسن يتصايحون مسرورين أما الأم
فقد وضعت إبهامها على أنفها وراحت تحرك أصابعها في الهواء زراية
وسخرية .

وانسابت السيارتان في طريق زراعى ضيق ، الحقول الخضراء مترامية
عن يمينه ، قامت بيوت متواضعة من طين ، وامتدت التربة عن يساره ،
تندفق بالأمل والحياة . وأحسست الدواجن والطيور التي كانت تمشى في
تؤدة واطمئنان على شاطئ التربة إقبال السيارتين ، فراحت تفسح
الطريق ناشرة أجنحتها وقد ارتفعت صيحات الأوز ، حتى كادت تغطي
على صوت السيارة .

ونظرت الأم ، فلمحت فلاحا مقبلا على ظهر حماره ، يسير في
عرض الطريق ، فقالت :

— حاسب يا شفيق الحمار .

والفتت سوسن ، وراحت ترقب الحمار في انتباه ، ثم قالت :

— ماما . بابا يقول لمراد يا حمار ليه ؟ دا الحمار كبير وبيمشى على

إيديه ورجليه وله ديل وودان طويله !

ومد مراد يده وقبض على ذراعها وقال :

— وبعدين معاكى ؟

ولم تأبه به ، بل قالت :

— ماما .. نفسى أركب حمار .

فقال شفيق :

— دلوقت أركبك حمار . ادى احنا وصلنا .

ووقفت السيارة أمام باب كبير ، يتوسط سورا من اللبن ، مطلى بالجير ، وضغط شفيق فى الكلاكس ، وإذا بالباب يفتح وانطلق شفيق فى ممر بين الخضرة والأزهار والأشجار العالية ، وجلال فى أثره ، حتى بلغ سلام الدار فوقف عندها .

وهبطت نبيلة والأم تحمل هالة ، وسوسن وعاطف ومراد وصعدوا فى الدرج قليلا ، ثم وقفوا ينظرون إلى فناء الدار الواسع ، وفى وجوههم إعجاب . كانت الأشجار العالية كمردة حارسة على حوافه ، بينما غطت الخضرة المكان ، تتخلها ممرات نسقت تنسيقا بديعا ، ونبتت الورود والزهور فى أحواض تحف بها خضرة أزهى من الخضرة التى تغطى المكان جميعا .

ووقفت سيارة جلال ، وهبطت أحلام ووالدها وسامى وعاطف

يحمل كلبه ، وخف إليهم شفيق وقال :

— حمدا لله ع السلامه .

وصعدوا بضع درجات ونظر الأب وقال :

— حاحه جميله .

فقال جلال وهو ينظر إلى شفيق :

— مهندس زراعى ، إن ما كنش يهندس بيته ، ح يهندس بيت مين ا
وسار شفيق أمامهم وقال :
— اتفضلوا .

وبلغوا ردهة تؤدى إلى بعض غرف ، وفى جانبها الأيسر درج يقود
إلى الطبقة العليا وقال :

— اتفضلوا فوق استريحوا وانا وسامى وجلال وعاطف ح نستريح
ونغير هدومنا هنا . وح نتقابل فى الجنيه تحت .

وصعدوا فى الدرج ، وقد ارتفعت الضوضاء ، سوسن تطلب
ركوب الحمار وعاطف يقلدها ، ونبيلة تحت أحلام على الإسراع حتى
لا يفوتهم التمتع باليوم كاملا .

وبدلوا ثيابهم والتقوا فى الحديقة ، وقد تركت الأم هالة مع خادم
قروية ، وقال شفيق :

— تعالوا أفرجكوا الجنانين بتاعتنا .

وغادروا الدار ، وانطلقوا فى حقول الفواكه ، وراحت نبيلة تملأ
رئيتها بالهواء ، وشفيق يسترق النظر إليها ، وسار جلال إلى جوار أحلام
وقد أمسك يده فى يدها ، وراح سامى ومراد يعدوان ، وعاطف
وسوسن يجريان فى أثرهما .

وقال جلال :

— إيه رأيك نمضى شهر العسل هنا ؟

وقالت نبيلة :

— ياريت يا أحلام ، دى جنه .

وقال شفيق :

— اتفضلوا . العزبه والى فيها وصاحبها تحت أمركم .

والتقت عيناه بعينى نبيلة ، فأحست أن حديثه لها ، فتفتحت نفسها
ومست أوتار قلبها يد حنونة ، راحت تعزف أنشودة الحب الخالدة .

وبلغوا حديقة المانجو . فوقف الجميع ينظرون فاغرى الأفواه ،

حتى الأب سال لعبه ، ومد شفيق يده وقطف واحدة ، وقال :

— دوقوا مانجتنا ، مانجه حلوه .

وهجم الجميع على المانجو ، وغاصت أقدامهم فى الطين ، ولكنهم لم
يحفلوا بذلك ، وامتدت الأيدي ، وقطف الثمر المتدلى ، وتلوث
الأكف والوجنات والذقون وراح عاطف يمسح يديه فى صدره ، ونهرته
أمه ، واعتبر مراد فلم يمد يديه إلى ثيابه ، بل راح يمسحها فى ورقة من
أوراق الشجر ، فاختلط عصير المانجو بالتراب : ومرر يده على فمه
وذقنه وخديه ، فإذا بوجهه يتلوث بالطين ، ولحته نبيلة ، فراح
تضحك وهى تشير إليه بأصبعها ، وسدد الجميع إليه نظراتهم ثم انفجروا
ضاحكين :

واستمروا فى تجواهرهم ، وفى عودتهم إلى الدار مروا بالحظيرة ، فألفوا
حصانين وبعض أبقر ، وراح شفيق يمرر يده على رقبة الحصان وقال

سامى لأبيه :

— مره يا بابا حكيت لنا إنك ركبت حصان فى الهرم وسبقت بيه
أتومبيل . الحصان اهه ، ورينا يا بابا بتركبه إزاي ؟

والتف الأولاد جميعا حول أبيهم وقالوا :

— والنبي يا بابا عايزين نشوفك وانت راكب الحصان .

واتسعت عينا الأب ، وبلع ريقه ونظر إلى زوجته يتوسل إليها أن
تنقذه ، ولكنها أعرضت عنه ، فلم ير مفرا من التهرب والتماس المعاذير ،

فقال :

— مش دلوقت . تعبنا م المشى .

فقال سامى :

— والعصر يا بابا بعد ما تستريح نحضر لك الحصان .

وقالت سوسن لشفيق :

— عايزه أركب الحمار .

— حاضر .

وأمر خادمه أن يحضر حمارين .

وعادوا إلى فناء الدار وجلسوا على كراسى خيزران صفت فوق

الحشيش ، وجيء بالحمارين ، فهرع مراد وسوسن وعاطف إليهما ،

وركب مراد حمارا ، وركب عاطف وسوسن الحمار الآخر ، وقال

الأب :

— طالع فوق شويه أستريح .

وقالت الأم :

— لما اطلع أنيم هاله .

وانصرف الوالدان ، وذهب شفيق وأحضر فونوغرافا ، وجلس على
الحشيش ، فترك جلال وأحلام ونبيلة وسامى كراسيهم وجلسوا على
الأرض .

وانبعثت الموسيقى ، كانت نفس الموسيقى الراقصة التى انسابت يوم
حفلة المدرسة ورقصت عليها نبيلة .

ونظر شفيق إلى نبيلة وقد توجت فمه بسمه ، فأطرقت نبيلة حياء ،

وقال جلال :

— ياللا يا نبيله .

فأدارت وجهها ، وقالت :

— لأ .

وقالت أحلام :

— وش كسوف قوى . ياللا .

وقالت لشفيق :

— دور الاسطوانه م الأول .

ونفضت نبيلة ، وبدأت فى الرقص ، وتعلقت عينا شفيق بها ، وراح

يمرر لسانه على شفثيه .

وانتهت نبيلة من رقصتها ، وارتمت على الأرض ، وشفيق يتفرس

فيها . ونهض جلال وجذب أحلام من يدها ، وقال وهو ينظر إلى

الحمارين :

— تعالى ناخذ لنا دور .

وقامت أحلام ، ونهض سامى وقال :

— وانا جاي آخذ دور كمان .

وهبط مراد عن ظهر الحمار ، وراح جلال يعاون أحلام على امتطائه ، وهى تميل على صدره وتضحك ، حتى إذا ما استوت على ظهره وأمسكت باللجام ، لكزه فى بطنه فهرول وأحلام تصيح وتضحك وتطلب النجدة .

وركب جلال الحمار الآخر وراح يعدو فى أثرها ، ويضرب حمارها وهى تتوسل إليه أن يكف . وانطلق مراد وسوسن وعاطف يجرون خلفهم ، بينا وقف سامى يرصد أحلام وينتظر عودتها ليأخذ الحمار منها .

وبقى شفيق ونبيلة وحدهما على الأرض ، راحا يتبادلان النظرات ويتناجيان بأرق حديث وأعذبه وإن لم تنفرج لأحدهما شفة . كانا يتحدثان حديث روح لروح ، وقلب لقلب .

ومر الوقت ، وجاء العصر ، فإذا بشفيق قد أقبل يقود الحصان من لجامه ، وقد أسرجه ، ونبيلة تسير إلى جواره وأحلام وجلال والأولاد جميعا خلفه ، وقد اتسخت ثيابهم ، وكان مراد أكثرهم قذارة .

ووقف شفيق عند درج الدار ، وصعد مراد وسامى يهرولان ، حتى إذا بلغا الغرفة التى بها والدهما قال سامى لأبيه :

— بابا الحصان جاهز تحت .

ونظر الأب من النافذة ، ورأى الحصان يهز ذيله ويضرب الأرض بحافره ، ويصهل ، فعاد وهو يمرر يده على بطنه ويقول :
— بطنى ح تطق ، كلنا كثير ع الغدا . مش قادر اتحرك ، بلاش النهارده ، مره ثانيه .

وأرادت زوجته أن تداعبه ، فقالت له :
— يا راجل انزل اركب شويه .

ورمقها فى عتاب ، ثم اتجه إلى السرير وتمدد فيه وقال :

— مش قادر اتحرك النهارده . مره ثانيه .
ويش ابنه منه ، فغادراه وهبطا ، وانصرف السائس بالحصان ،
وقال سامى :

— عايزين نلعب حاجه .

فقال مراد :

— نلعب الكورة .

فقالت نبيلة :

— لأ . نلعب حاجه ثانيه .

فقال شفيق :

— نلعب استغمايه .

وقال الجميع :

— موافقون .

— أيوه ، نلعب استغمايه .

وقال جلال :

— مين الحفاء ؟ .

فقال مراد :

— أنا .

وقال سامي :

— لأ أنا .

وقال شفيق وجلال :

— خلى سامي الحفاء .

وأغمض سامي عينيه ، وأخذ الجميع يتسللون ليختفوا منه ، وجرى

مراد بعيدا ، وقالت أحلام لسوسن وعاطف همسا :

— اطلعوا فوق استخبوا عند ماما .

وأطاعاها ، وصعدا في الدرج ، وذهب جلال وأحلام ليختفيا خلف

الدار بينا خرج شفيق ونبيلة من الباب الكبير ، وصاح سامي :

— خلاص ؟ .

وجاءه صوت شفيق من بعيد :

— لسه .

ودلف شفيق ونبيلة إلى الحظيرة ، وصهل الحصان ، وأشار له شفيق

أن يصمت وهو يقول :

— هس .

ووقف شفيق وإلى جواره نبيلة ، ومس شعرها خده ، وملأ عيبرها
أنفه ، فانبثقت في أغواره مشاعر رقيقة ، واستشعر غيبوبة لذيدة تغلفه ،
وحنانا طاغيا آمرا ، يستبد به فلا يستطيع أن يعصى أمره ، فمد يده
وجذبها من يدها فاستدارت له ، وتألفت عيناه بالرغبة ، وضمها إليه
وقبلها ، فنظرت إليه بعينين تفرقت فيهما الدموع ، فقال لها في وجد :

— تروحي الجامعه ، واللا تتجوزيني وتقعدى في البيت ؟

فقالت وهي هائمة في عالم بهيج من الأحلام :

— لأ . البيت أحسن .

الفصل الخامس عشر

وضعت أحلام حقيية كبيرة على سريرها ، وراحت تصف فيها ملابسها الداخلية والمنزلية ، وأخذت نبيلة تعاونها ، فأخرجت من الصوان بعض قمصان النوم والقطع الدقيقة التى تفتق ذهن صانعى الجمال عنها ، لرفع الثديين ، وبعض القطع الصغيرة من الثياب ، التى تسدل القمصان فوقها ، ولحتها أحلام وهى ترفع رأسها عن الحقيية ، فقالت لها :

— خلى الهدوم دى عندك .

— ليه ؟ .

— مش ح اخدها دلوقت . ح البسها فى الخمس أيام اللى فاضلين لى

هنا .

— خديهم معاكى بالمرة ، وابقى البسى من هدومى .

فقالت أحلام وهى تحاول أن تغلق الحقيية :

— يمكن أسبهم هنا على طول ، أبقى ألبسهم لما آجى أزورك .

فقالت نبيلة وهى تعيد الثياب مكانها :

— خليم زى مسمار جحا !

وارتفع صوت سوسن :

— ماما .. ماما .. الحقى . عاطف غرق هدومه ميه وهو ييحمى
سوزى .

فصاحت الأم من غرفتها :

— عاطف ، اقل الحنفية دى ، واخرج من عندك .

وصاح عاطف :

— سوزى اتمرغ فى الوحل باحميه .

— اخرج من الحمام أحسن إن قمت لك ح اقصف رقبتك .

وخرج عاطف من الحمام ، وقد ابتلت ملابسه ، وهو يحمل سوزى
ويضمه إلى صدره ، والماء يتقاطر من جسمه ، ولحخته أمه فهرعت إليه
وهى تصيح :

— هو انتو قروود .. دوختونى .

وجذبتة من يده وقالت وهى تذهب به إلى غرفته :

— تعال غير هدومك اللى بتلق دى .. ح تعبى وتموت .

فقال وهو يهز كتفيه فى زراية :

— بتضحكى علّى ، مش ح اموت . الصغيرين ما يموتوش .

— مين اللى قال لك كده ؟

— مراد .

وأطلت نبيلة برأسها وضحكت ، ثم دارت على عقبها ونظرت
فألفت أحلام تديم النظر إلى سريرها وقد شردت فى تفكير ، فرمقتها فى
صمت ، أحست ما يعتمل فى صدر أختها من مشاعر ، وفطنت أحلام

إلى وقفة نبيلة ، فالتفتت إليها وقالت وهى تقبض بيدها على السرير :

— أول سرير انتصب هنا أول سرير ح يتفك .

فخطت نبيلة خطوة حتى لمست كتفها كتف أختها وقالت :

— مش ح يتفك أبدا ، ح يفضل منصوب على طول ، لما تحينا تبقى

تريحي فيه ، وبكره هاله تكبر وتنام فيه .

ولفت نبيلة يدها حول كتف أختها وقالت :

— ح توحشنا .

ونظرت أحلام إلى أختها وقد اغرورقت عينها بالدموع .

وخرج سامى من غرفته وفى يده كرفاة يقلبها فى زراية ، وقبذ لوى

شفته السفلى ، وانطلق إلى غرفة أبيه ، فوجد أباه مطرقا فى صمت ، فلم

يحترم خلوته ، وقال :

— الكرافاتة اللي جبتها لى مش حاجه .. مش ماشيه مع البدلة . عندك

كرافته تبقى على بدلتى الجديدة شيك خالص .

فقال الأب فى استسلام :

— الكرافاتات كلها عندك ، خذ اللي انت عايزه .

وعادت الأم ، ورأت سامى يقلب فى كرافاتات أبيه ، فقالت له :

— انت مش ح تبطل الطمع ده ، ياللا بره بلاش دلع .

ولم يحفل بها ، أخذ الكرافة التى يريدتها ووضعها على كتفه ، وخرج

فى تؤده ، وقد صم أذنيه عند تأنيب أمه .

ورمقت الأم زوجها ، فإذا به صامت ، فقالت له :



تعبت . ادینت و ما بقاش معایا حاجه اُیدا

— مالك سرحان النهارده ؟.

— تعبت . ادينت وما بقاش معايا حاجه أبدا .

— الحمد لله البنت اتجهزت . وكلها يومين وتتستر ، وبعدها يعدها

ربنا .

— اتزنقت قوى .

— برضه انت الى زنقت روحك . لو خليته يجيب المشمع والنجف

والنملية وأدوات المطبخ وملة السرير زى الناس كلها ما بتعمل ، ما كنتش

ازنقت كده .

— دى كلها حاجات فارغه .

— أهو برضه كان تمنها نفع دلوقتى .

ورفع بصره إليها وقال :

— اسمعى يا زينب ، عايزين نلم نفسنا ، نكتب الكتاب ع الضيق لو

اتفنجرنا ح نتفضح .

— وأنا ليه مين يا حسره ، ح اقتصر ع العيلة وبس .

— والعريس لأ ؟

— العريس إذا كان ح يعزم يعزم على بيته .. ما قلتليش اتفقت على إيه

مع ابوه ؟.

— ح ييجوا بعد صلاة العشا يكتبوا الكتاب ، وبعدها ياخذ العريس

عروسته ويمشى .

— كله بيتقضى ، كلها كام يوم ونفوق على طول .



—والنبي خروف يا بابا .

ورن الجرس ونينا متصلا ، فخفت سوسن تفتح الباب ، فقرع أذنيها
صوت خروف ، فإذا بها تعود مهرولة وهي تصيح :

— ماما .. ماما . إلحقى . خروف .

وقال الأب في تساؤل :

— خروف إيه يا بت ؟

— والنتى خروف يا بابا .

أسرع سامى وعاطف وأحلام ونبيلة إلى الباب وقامت الأم وخرج
الأب خلفها ، وقد اختفت خلفه سوسن ، وفتح الباب ، وإذا بأربعة
ديوك رومى تتدفق في كبرياء ، وفي أثرها خروف سمين يدفعه مراد .
وقفز سوزى من يد عاطف ، وراح ينبح ، وأسرع عاطف يقبض
على ديك ، بينما صرخت سوسن رعبا من الخروف . وارتفعت أصوات
سامى وأحلام ونبيلة ، فأصبحت الشقة أشبه بحمام عام قطعت عنه
المياه .

وصاح الأب في ضيق :

— بس بقى . إيه الزيطه دى ؟!

وخفتت الأصوات ، وقال الأب لمراد :

— إيه ده ؟.

فقال مراد وهو يدفع الخروف :

— شفيق بعثهم .

— إيش عرفك ؟

— الراجل الى جابهم واقف تحت ، كان معاه الاسم والعنوان ، وقال

إن سى شفيق الى باعتهم .

وقال الأب فى مرارة :

— وليه بعتم بس ؟

فقالت نبيلة فى زهو :

— بعتم هدية يا بابا .

وقالت الأم .

— طب ياللا طلعوهم ع السطح .

وأخذ الأولاد يدفعون الخروف أمامهم ، وسوزى ينبج ، وراح

سامى يهش الديوك لتشق طريقها خلف الخروف .

وقالت الأم للأب :

— مش ح ندى الراجل حاجه ؟

وتحرك الأب نحو غرفته ، وقالت الأم لسوسن .

— تعالى يا سوسن إدى الفلوس دى للراجل الى واقف تحت .

ومد الأب يده فى جيب جاكته المعلقة فى المشجب ، وأخرج ريالاً

أعطاه سوسن فانطلقت تعدو ، ورفعت الأم بصرها وقالت وهى تصيخ

السمع :

— لو فيه مكان واسع فى الشقة كنت خلتهم فيها ، يا خوفى لحرامى

يسرقهم .

فقال حسين وهو يرفع أكف الضراعة :

— يا ريت ! .

— ليه بس ؟ .

— كنت استريحتم م الفتحة اللي ح تتفتح عليه دى .

— فتحة إيه ؟

— الخروف والديوك دى مش عايزه طباخ ؟!

— مش فيه ناس م العيله ح ييجوا من أول النهار ، أهو الطباخ

بغديهم ، واللامين كان ح يغديهم ؟

— كنا ح نطبخ لهم حلتين .

— أهو الطباخ ح يطبخ لهم الحلتين دول :

— والطباخ يعوز فراش .

— مش كنا ح نجيب كرسيين للناس يقعدوا عليهم . إيه اللي ح يزيد

علينا ؟

فقال الرجل وهو يهز رأسه أسفا :

— جت رجلى وخلاض .

فدنت منه وقالت مواسية :

— ربنا يخليك لهم ، وتفرحهم ، هم لهم مين غيرك ؟

فقال الرجل فى استسلام :

— لو كان فيه معلمش ، إنما ما فيش خالص ، الفلوس كلها طارت .

— كله يدبر .

وعادت سوسن ، فقالت الأم :

— إديتي الفلوس للراجل ؟

— أيوه .

— وقال لك إيه ؟

— قال لى : قولى لام العروسة : مبروك .

وأشرق وجه الأم ، ورمقها زوجها من طرف عينه ، فانبسطت
تجعدات جبهته ، ولم تنفرج شفتاه .

وعادت الضوضاء إلى الشقة ، ارتفع صوت نبيلة وسامى ، قالت

نبيلة :

— إنت مالك ما تسييه .

— أسييه ازاي لما يتغور ؟

وقالت الأم :

— فيه إيه ؟

فقال سامى :

— عاطف مش عايز ينزل . قاعد جنب الخروف فوق .

— سيبه .

وساء سامى أن يهزم ، فقال :

— ح يموت الديوك .

فقال الأم :

— ما لكش دعوه بيه ، وريح نفسك انت .

وانسابت نبيلة على أطراف أصابع قدميها وهى ترنو إلى سامى من فوق

كتفها ، ولحمت الأم الشرر في عيني سامى ، فقالت له :
— عايز تغيظها ، ما تسألش عنها .

ونفض الأب ليرتدى ثيابه ، فقالت له الأم :
— على فين ؟

— أروح اشوف الطباخ والفراش .

— وأنا ح اخرج مع أحلام نعزم العيلة .

وبلغ ذلك مسامع أحلام فقالت :

— مش ح اقدر أخرج معاكى يا ماما عشان فايزه أخت جلال جايه

تشوف الجزمه الى ح البسها ليلة الفرح تشتري زيها .

— فايزه جايه ؟ والله احنا ما فينا خير ، الى ما سألنا عنها ، ويوم ما

رحنا العزبه الى ما قلنا لها تيجى .

فقالت نبيلة :

— إحنا كنا معزومين ح نعزم غيرنا ! إذا كان جلال عايز يجيبها كان

جابهها معاه .

فقال سامى وهو ينظر إلى أحلام :

— هو جلال فاضى لها ؟

ورمقته أحلام فى شزر ، فاضطر إلى كبج جماح لسانه . ودار على

عقبه وانصرف . وقالت الأم :

— آخذ نبيله معاه ، ياللا يا نبيله البسى ما تعطلنيش .

فضحكت نبيلة ضحكة طويلة ممدودة ، حتى إن عدواها قد سرت

إلى أحلام وسوسن . وقالت وهى تقلد أمها :
— أنا اللي ح اعطلك ! قال على رأى المثل : لو الجمل حس بصنمه ..
فقالت الأم فى عصبية :
— ما باحبش اخرج معاكى يا بت انتى من لسانك الطويل .

وانطلق حسين إلى طباخ ورثه عن أبيه ، كان يقيم موائد أفراحهم
وأطعم مآتمهم ، وانتقل موقده إلى أسطح بيوت الأسرة جميعها ، واحتل
أفنية مدافنها ، وما كان فى إعداد طعامه يفرق كثيرا بين ما يقدمه فى
الأفراح وفى الأتراح .

وحياه حسين وجلس ، وقال له :
— عندى كتب كتاب أحلام يوم الخميس ، وعازينك تيجى تطبخ
لنا حلتين ع الضيق .

فاعتدل الطباخ وقال :

— إنت مش عازم حد أبدا ؟ .

— يا دوب العيله ح تيجى وبس .

— ييقى الكلام اللي بتقوله مش ح ينفع ، اسألنى أنا ع العيله .

— أنا عندى خروف وأربع ديوك رومى ، عشره .. خمستاشر ح

يتغدوا والباقي للعشا .

فضحك الطباخ وقال :

— عشرة خمستاشر ؟! دول يدوب أهل البيت . الكلام ده ما

ينفعش .

وأحضر ورقة وقلما وناولهما لحسين وقال :

— أول ما نبدي نبدي بالمورد ، اللهم اجعله ورد ، اكتب يا سيدى
عندك قزاة ماورد و ٢٠٠ بيضة وعشرين وقة دقيق أمريكانى .

فقال حسين معترضا :

— عشرين وقة دقيق أمريكانى ليه ؟ مش ناوى تشتري عيش ولا

إيه ؟ .

— والنبي يا حسين بيه تكتب ، إياك يكفو الفطائر الى ح نعملها .

واستأنف إملاء ما يريد كأنما يقرأ فى صفحة مكتوبة :

— وقة شعرية ، سبع أقداح أرز ، ميت رطل لحمة عجالى .

فقال حسين معترضا :

— واللحمة العجالى ليه ؟ ما عندنا الخروف !

فقال الطباخ فى بساطة :

— ح نعمل م الخروف كفتة والا لحمه عصاج ؟ والنبي تكتب قبله

وبعدين شوف الى عايز تقوله إيه .. أربع مراوح ضانى وخمستاشر جوز

حمام .. خد الخضار : عشرة ارطال كوسه صغيره للحشو . خمسة

ارطال ورق عنب . خمسة ارطال فاصوليا خضره ، غلبتين بسلة نشفه .

خد عندك الحاجات دى عشان الحلويات : اتنين كيلو شيكولاتا

كتل ، واتنين كيلو شيكولاتة مجروشة ، وتلت وقات كرز وخمسر

علب أناناس وخمسر وقات موز ، وخمسه كيلو كريمه وعشر وقيات

فسدق ، وعشرين لمونه .

ورفع حسين القلم عن الورقه وقال :

— ح تعمل إيه بالحاجات دى كلها ؟

— طرطات وهريسه وخشاف والمظيه ومهليه .

— ما كفايه صنفين .

— لو الحاجات دى كفت يبقى ستر من عند ربنا .

— أنا مش عامل حاجه ومش عازم حد ، و... و...

— والنبي تكتب قبل ما انسى .

— لسه فيه كتابه ؟

— عشرين رطل سمن ، والبصل والفلفل والملح .

— الحاجات دى فى البيت .

— وحملين خشب رواجع ونص قنطار فحم وسلامتك .

ورفع حسين رأسه وقال :

— خلاص خلصت ، اسمع يا سيدى . أنا مش ح اجيب إلا نص

الحاجات دى .

— ياريت !

ودنا من حسين وقال له كصديق يهमे مصلحته :

— بقى نصرف المصاريف دى كلها ونيجى ع الآخر ونفضح

نفسنا ؟

فقال حسين وهو ينظر إلى الأرض :

— بس الواحد ح يجيب منين ؟

— كله برزقه .

أراد أن ينهى بهذا الحديث ، ويتحدث في موضوع آخر فقال :

— واتفقت ع الفراشة مع مين ؟

فقال حسين في استسلام :

— والله لسه ما اتفقتش مع حد ، لكن ما فيش إلا عماره ، على قدنا

وابن حلال .

فقال الطباخ :

— واهو الراجل بتاعنا برضه .. ح تروح له إمتى ؟

— بكره .

— وليه بكره ما تياللا نفوت عليه دلوقت .

وسارا يتحدثان حتى بلغا مخزن فراشة الحاج عمارة ، وكان الحاج جالسا خلف مكتب وإلى جواره بعض المقاعد الخشبية ، بينا وضعت الكراسى المذهبة في صدر المخزن في عناية .

وقال حسين :

— السلام عليكم يا معلم عماره .

— وعليكم السلام حسين بيه . اتفضل .

وجلس حسين وجلس الطباخ ، ولم يشأ حسين أن يضيع وقتا ،

فقال :

— يوم الخميس كتب كتاب بنتى ، عايزين كام كرسى .

فقال الطباخ .

— الكلام ده ما ينفعش ، نقوم نشوف المكان الى ح يتفرش أحسن .

وقال المعلم عمارة :

— أحسن .

ثم نهض وقام الطباخ وحسين وانطلقوا إلى الشقة . وراحوا يجوسون خلالها ويدخلون غرفها غرفة غرفة ، والفرش يقلب عينيه في الأثاث ويلوى شفته السفلى ، ولما انتهوا من طوافهم ، قال الفرش :

— العفش اللي في الشقة لازم يتكوم في أوده واحده ويسك عليها .

فقال حسين في فرع :

— يتكوم في أوده واحده ؟ وليه كده ؟ !

فقال الفرش :

— لو فضل العفش ده ، الناس ح تقعد فين ؟ ح نفرش الأرض

سجاجيد ونرص الكراسي في الأرض . نجيب كام كرسي مذهب ؟

فقال حسين :

— كفايه دسته .

فقال الطباخ :

— دسته تعمل إيه ؟ ع الأقل دستتين .

وقال حسين :

— ولما ح تملا الأوض كلها كراسي ، الناس ح تاكل فين ؟

فقال الطباخ في بساطة :

(أم العروسة)

— ح نشد تركين قماش وننصب البوفيه في السطح .
وانتهت المناقشات ، وشد الطباخ والفراش على يد حسين ، وهما
يقولان :

— ربنا يتمم بخير .
وانصرفا وارتمى حسين على الأريكة في الردهة ، وقد شرد ببصره ثم
راح يدلك جبهته بيطن كفه .
ورن الجرس ، وأسرت أحلام تفتح الباب ، ودخلت الأم ونييلة ،
يلوح التعب في وجهيهما ولكن ما أن وقعت عينا الأم على أحلام ، حتى
قالت :

— فايذه عندك ؟
— لا والله . نزلت قبل ما ييجى بابا .
— هو بابا جه ؟
ودخلت الأم . وجلست على الأريكة بجوار زوجها وقالت وهى
تخلع حذاءها رحمة بقدمها :
— خير . هه عملت إيه ؟
فقال فى صوت خافت :
— خير .

وأحس أن نبرات صوته توحى بالضيق ، وخشى أن يتسبب فى
انقباض صدر أهل بيته فى أيام فرحهم ، فتظاهر بالنشوة ، وقال لزوجته :
— هيه . عملتوا إيه ؟

فقالَت الأم :

— عزمنا الناس الى حوالينا .

— عزموا كثير ؟

— لا مش كثير .

فقالَت نبيلة في استنكار :

— مش كثير ؟ مش كثير ازاي ؟! دا ما فيش بيت ما دخلنا هـش .

فالتفتت الأم إليها وقالَت :

— يا بت بلاش تهويل .

فقالَت نبيلة وهي تتململ في وقفتها :

— لو رجلينا تعرف تتكلم . كانت حكّت الى جرى لها .

والتفتت إلى أبيها وقالَت :

— تعرف يا بابا لو الى عزمناهم كلهم جم ، ح يقي الناس على

بعضهم .

فقالَت الأم :

— هو معقول كل الى عزمناهم ح ييجوا .

فقالَت نبيلة :

— هو معقول حد يتعزم ولا يجيش . والله الى ح ييجوا أكثرم الى

عزمتهم . يا ما ناس بتيجي من غير عزومه .

وقامت الأم وهي تقول :

— يا بت انتى هواله ، ما تبقيش تخرجى معايا أبدا .

وانصرفت الأم إلى غرفتها ونبيلة تقول :

— بكره ح تشوف .

الفصل السادس عشر

وأشرقت شمس يوم الأربعاء ، اليوم السابق لليلة الخطيرة المرتقبة ليلة الزفاف ، فدبت الحياة في الشقة مبكرا ، استيقظت الأم وأحلام ونبيلة ، ورحن يرقبن عمال الفراش ، وهم يكدسون الأثاث في الردهة التي كانت معدة لاستقبال الضيوف ، وأخذ سامي ومراد وسوسن يحملون الكراسي الخيزران على رؤوسهم ، ويقومون بصفها في الغرف التي فرشت بسجاجيد الفراش الكبيرة الحمراء ، التي نمت بزخارف عربية زرقاء وصفراء وبيضاء ، استوحيت من غصون الشجر والأوراق والأزهار .

وراح عاطف يقفز فوق الكراسي ، والكلب في أثره ، يصعد إذا صعد ، ويهبط إذا هبط ، وجاء الأب يحمل هالة على ذراعه . ولم يكن منسبط الوجه ، كان يلوح عليه آى التفكير .

ورأى هبوط عاطف وصعوده وحركته الدائبة بين الكراسي ، فقال

له :

— إنت هنا بتعمل إيه ، اطلع السطح اتفرج . الطباخ ح يدبح

الخروف .

والتفتت سوسن وأصاحت سمعها ، ووضع مراد الكرسي الذى يحمله

والتفت ، بينما جلس سامى على أحد الكراسى المصفوفة ، ورابع يديه فوق صدره العارى . كان يرتدى بنطلونه القصير الأبيض وحذاء أبيض من المطاط ، واشرب بعنقه ينظر .

وذهب عاطف إلى أبيه وقال ، وعيناه تمان عن خبث :
— عايزنى أطلع السطح واتفرج على الخروف لما يدبح ؟
— آه .

— هات قرش قبله .

وأخرج الأب قرشا من جيب بنطلونه ، فالتقطه عاطف فى خفة الحداة التى تلتقط حشايا طير مذبوح ملقاة فى خربة ، واقتربت سوسن من أبيها وقالت :

— بتجيب الفلوس منين يا بابا ؟ .

وقفزت إلى ذهنه إجابات كثيرة ، ولكنها ما كانت تصلح إجابة عن سؤال طفلة لا تدرى ما الحياة وقسوتها ، أيقول لها من عرق الجبين המתرج بتحمل سخافات رؤساء تافهين ؟ أيقول لها من الملق والرياء ؟ أيقول لها من كتم أنفاس صوت الضمير والسير فى مواكب النفاق ؟

وشرد قليلا وقد ازدحمت فى رأسه صور معتمة بغیضة ، نكأت جرح نفسه ، وحركت أساه ، حتى إنه أحس مرارة فى فمه ، ولكنه كبت مشاعره وقال :

— من الحكومه .

وقالت سوسن :

— والحكومة بتجيب الفلوس منين ؟

— من الناس . الى عنده دكان تاخذ الحكومة من مكسبه ، والى عنده بيت تاخذ الحكومة من الأجره الى ييلمها م السكان .
فقال مراد :

— الحمد لله لا عندنا بيت ولا دكان . مش ح تاخذ مننا الحكومة حاجه .

وقال سامى :

— يا ريت كان عندنا وكانت خدت .

وقالت سوسن :

— مش الحكومة بتديك فلوس كثير قوى يا بابا ؟

وتجمعدت جبهته ، ولاحت فى وجهه مسحة من الحزن ، ورأى أن يشد ذلك الحديث الذى يخز روحه ويضنيه ، فقال :

— مش ح تطلعوا تتفرجوا ع الخروف لما يدبح ؟

ورن صوته غريبا فى أذنيه ، خيل إليه أن فيه نبرة أسى ساخرة تومى إلى العلاقة بين ذبحه وذبح الخروف ، فوقف مشدوها برهة ، وقال سامى وهو ينهض :

— يللا ع السطح .

واندفع الأولاد يصيحون ، والكلب يجرى خلفهم ، والتفت عاطف وقال :

— وهاله مش ح تتفرج ع الخروف لما يدبح ؟

فقالت الأب ساخرا :

— هاله لسه صغيره ، لما تكبر ح تدبجه .

واختفى الأولاد عن عينيه ، ولكن أصواتهم كانت ترن في أذنيه عالية مدوية ، وضم هالة إلى صدره في حنان وقال يناجيها :

— لما تكبرى ح تدبجى بابا ؟! ح تفلسيه كده ؟! لكن انت ذنبك إيه ، حد خد رأيك قبل ما تيجى ؟ إحنا اللي جنبناكى غصب عنك .
وراح يمرر شفتيه على صفحة خدها ويغمغم :
— إكبرى وفلسى بابا .

ولح نبيلة قادمة ترتدى بيجاما ضيقة ، تفضح مفاتن جسمها ،
فاربذ وجهه ، ورفع شفتيه عن خد هالة ، وقال :
— واقفه يا نبيلة قدام الرجاله الغرب بالشكل ده ؟
ونظرت إلى نفسها فى دهش وقالت :

— فيه إيه يا بابا ؟ درعاقى متغطيه ورجليه متغطيه .
فقال وهو ينظر إلى صدرها البارز ، الذى يكاد يقفز من البيجاما :
— لكن .. لكن .

— لكن إيه بس يا بابا ! إذا لبسنا فستان بكم جابونيز قلمت دراعاتكو
عريانه ، وإن لبسنا فستان قصير قلتو : عيب رجلكو عريانه ، وإن
غطينا دراعتنا ورجلينا ما نعجش .أمال نعمل إيه بس .
ورن جرس الباب الخارجى ، فدارت نبيلة على عقبيها ، وقال لها

أبوها :

— ما تفتحيش انتى . خشى جوه . أنا الى ح افتح .
وانطلق إلى الباب وفتحته ، وإذا بثلاث سيدات من الأسرة
وأولادهن ، وخادم تحمل بقجة كبيرة ، فيها ثياب منزلية كثيرة ،
وحملت في يدها مشعجا به فستان للسهرة ، كانت هيئتهم تدل على أنهم
جاءوا ليستقروا ، وما أن لمحهم حتى قال مرحبا :
— أهلا وسهلا . اتفضلوا .

وارتفعت الأصوات من هنا وهناك :
— ألف مبروك . والله فرحنا قوى . أحلام دى بنتنا .
واندفعوا داخلين ، وما أن اجتازت الخادم الباب حتى أطلقت
زغردة مدوية ، جعلت الأم وأحلام تهرعان إلى الزدهة .
ودارت القبلات ، وترددت التمنيات ، وقالت النسوة وهن يضربن
ظهر أحلام فى حنان :
— أهلا بعروستنا .

وانطلقوا إلى الغرف الداخلية ، وقال الأولاد :
— أمال فين سامى ومراد وعاطف ؟
وتلفتت الأم ، فلما لم تجد أولادها قالت بصوت عال :
— أمال الأولاد فين ؟
فقال الأب من بعيد :
— طلعوا السطح يتفرجوا ع الخروف لما يدبح .

ولم ينتظر الأولاد حتى تدعوهم الأم إلى اللحاق بأولادها ، بل انطلقوا مهرولين وهم يتصايحون .

ورن الجرس الخارجى ، فقالت الأم :

— افتحوا الباب على طول ، هو الباب يتقفل النهارده !

وخف الأب إلى الباب وفتح ، فإذا بسيدة وبناتها وأولادها وقد حمل الأولاد تحت إبطهم لفائف فيها ثيابهم المنزلية ، بينما حملت إحدى الفتيات في يدها بقجة .

وابتسم ورحب بهم ، وأفسح لهم الطريق ، وأسرعت الأم لاستقبالهم وقادتهم إلى الغرف الداخلية ، ليلدلو ثيابهم ، وليرتدوا ما حملوه في اللفائف والبقجة .

وأخذت أم العروسة تغدو وتروح في الشقة ، دون أن يكون لها هدف ، والتقت بزوجها بالقرب من الباب ، فقال لها :

— ما لهم مبدرين كده ؟

فقالت الأم وهى تأخذ منه هالة :

— العاده كده . يياتوا معاها ليلة الحنه .. آخر ليله لها في بيت أبوها .

— يياتوا معاها مش ييجوا من النجمه .

واتجه الأب إلى بئر السلم ونادى :

— سامى .. سامى .. انزل .

— حاضر .

وهبط سامى في الدرج قفزا ، حتى بلغ أباه ، فقال :

— نعم ؟

فقال الأب في صوت خافت :

— قول للطباخ يعمل حسابه إن ثلاثين ع الأفل ح يتغدوا ويتعشوا
النهارده .

فقال سامى وهو يتسم :

— هو عامل حسابه . قال لى إنه عارف العيله كويس .

ولاح في عينى سامى كلام ، فقال له الأب يستدرجه للروح له بما
يحاول أن يكتمه :

— وقال لك إيه كان ؟

فقال سامى وهو يخفض عينيه :

— وقال لى إنه يعرف العيله أكثر منك . كنت عايز تعمل حاجه ع
الضيق ، وهو ما وافقكش . ما حبش يكشفك .

— طب اجرى حصله فوق وبلاش لت معاه .

وعاد الأب إلى الشقه ، وجلس في غرفة المكتب على كرسى من
كراسى الفراش ، بحيث يرى ما يجرى في الردهة ، ولمح زوجته في غلده
ورواح دون أن تفعل شيئا ، وسعت إليها الخادم الكبيرة ، التى جاءت مع
الفوج الأول من الأسرة ، وقالت :

— قال يا ستى مش ح تعجنوا الليله دى حنه ؟

فقالت الأم فى استنكار :

— حنه ! الحاجات دى ما قدمت بقى .

فقال الخادم في استنكار :

— هو يبقى فرح من غير حنه ! إذا كنتو مش ح تتحنوا نتحننا احنا .

— والله ما عرف الحنه بتتباع فين !

— عند العطارين .

ورنت إليها رنة معبرة ، لم يفت الأم مدلولها ، فأخرجت ورقة مالية

صغيرة دفعت بها إليها وهي تقول :

— اشترى الحنه الى عايزاها .

وارتفع صوت نسوى ينادى :

— يا ست يا أم العروسه .

فقال الأم :

— حاضر . جايه .

وظل الأب يرقب ما يجرى في الشقة ، وهو جالس في مكانه .

وراحت ساعات النهار تمر وثيدة ، حتى إن حسينا ضاق بنفسه ،

واستشعر مللا ممضا ، ومالت الشمس للغروب ، فاجتمعت الخادومات

في الردهة ، ورحن يغنين ، ويرقصن على نغمات طبله ورق ، وخف

الأولاد إليهم ينظرون .

ونظرت سوسن إلى الفتاة التي كانت ترقص شزرا ، وقالت في

ازدراء :

— هو دارقص ؟

وسمعت الفتاة سخرية سوسن فتوقفت وقالت :

— مش عاجبك رقصى ؟! تعالى فرجينا .

وقبلت سوسن التحدى ، وتوسطت الحلقة وراحت ترقص ،
وجعلت تهز كل عضلة في جسمها ، حتى إن الفتاة راحت ترمقها في
غيظ ، وارتفع تصفيق الأولاد ، فخفضت النسوة ينظرن مشدوهات ،
ونظر الأب من بعيد ، ولأول مرة منذ الصباح رفت على شفثيه بسمة .
والتفتت سيدة إلى أحلام وقالت لها :

— لو كانت كبيره شويه كانت لهفت العريس منك .

فقال أحلام وهى تبتسم :

— ما انا لحقت اتجوزت قبل ما تكبر .

ومر الوقت في ضحك ورقص وغناء وأكل ، وجاء الليل ومشت الأم
إلى حيث كان زوجها ، وراحا يتناجيان ، قال :

— فيه حد ما اتعشاش ؟

— كلهم كلوا .

— وح يناموا فين دول كلهم ؟

— ما تحملش همهم . دلوقت يناموا مطرح ما هم قاعدين . ليله

وتنفض .

— عايزه الحق ؟ أنا تعبت خالص .

— كلها الليله دى وبكره . ونستريح بعدها على طول . استحمل

شويه .

فقال مواسيا نفسه :

— خالص الكثير ما بقى إلا القليل .

وارتفع صوت الخادم تنادى :

— يا ست يا أم العروسة .

— حاضر . جايه .

وانطلقت إليها ، فقالت الخادم :

— ح نعجن الخنخنة في إيه ؟

— عندك قروانه صغيره في الحمام اعجنها فيها .

وجيء بالقروانه ، ووضعت في الردهة ، وتحلق الخدم حولها ،
ووقف الأولاد ينظرون وراحت كل فتاة تلف حول كف زميلتها أشرطة
في تقاطع هندسى ساذج ، حتى إذا وضعت الحناء في قبضة اليد ، بقى
مكان الأشرطة دون خضاب ، فتبدو الكف منقوشة .

وتم لف الأشرطة ، وأغلقت الأكف على الحناء ، ثم ربطت القبضات
بقطع من القماش الأبيض فبدت كعروس الثوم الكبيرة !

— ومشى الوسن إلى جفون الصغار ، فتمددوا في أماكنهم حيث
كانوا جالسين ، ولحتمهم أم العروسة في دورانها الدائب في الشقة ،
فقالت :

— يا عيني ! النوم غلبهم .

ونادت على الخدم وقالت لهم :

— تعالوا افرشوا المراتب ونيموا الأولاد .

وزهدت الفتيات خلفها حيث صفت الحشايا ، بعضها فوق بعض ،

وقبضاتهن ملفوفة بالقماش ، والتفتت إليهن وقالت :

— شيلوا .

وتقدمت إحداهن ، وحاولت أن تحمل حشية بين ذراعيها ، ولكنها أخفقت ، فقالت لها الأم :

— أنا عارفه كنتوا مستعجلين على الحنه ليه ! استنى لما أساعدك .

وتقدمت الأم ورفعت الحشية ووضعتها على عاتق الخادم ، وفعلت مثل ذلك مع الأخريات .

وأحس الأب التعب يمشى في أوصاله ، فأخذ وسادة في يده وانطلق إلى الغرفة التي كدس فيها الأثاث ، ووضع الوسادة على مسند كرسي طويل ، ثم تمدد لينام .

وتلملم في رقده ، وأحس ألما في رقبته ، فراح يتحسسها بيده ، ولم يحتمل ما يقاسيه من تعب في نومه ، فانتصب واقفا وأخذ الوسادة ووضعها على الأرض ، ثم رقد على البساط . وحن جسمه إلى الراحة فراح في سبات .

وانقضى الليل .. وجاء النهار ، وخيل إليه أنه يسمع رنين جرس الباب الخارجى ، كان ما يسمعه أشبه بما يستشعره المستغرق في حلمه ، ولكنه فتح عينيه ، فإذا برنين الجرس يصك أذنيه .

ونفض لينطلق كعادته إلى المطبخ يأخذ وعاء اللبن ، فإذا به يحس ألما شديدا في ظهره فتأوه ، وكاد يضطجع على المقعد الطويل ، ولكن رنين الجرس دفعه إلى السير .

وأشرف على الردهة ونظر ، فإذا بأرضها قد غطيت بأجساد بشرية ، فاضطر أن يسير على أطراف أصابع قدميه ، وأن يقدر لرجله قبل الخطو موضعها ، حتى لا يعلو جسم سيدة ، أو يدوس في بطن غلام ! وبلغ المطبخ سلام ، وتناول الوعاء ، وعاد يشق طريقه في مهارة وحرص بين الأجساد المتناثرة على الأرض ، المتشابكة من الأقدام ، حتى إذا بلغ الباب فتحه ، ومد يده بالوعاء ، فقال له الرجل :

— ربنا يتمم بخير يا بيه .

— متشكر .

وعاد يتلمس طريقه ، وإذا بالثياب قد انحسرت عن السيقان الممتلئة ، فنظر ، وانشغل بالنظر عن اكتشاف الطريق ، فكادت قدمه تتعثر ، وارتعج اللبن في الوعاء ، فانتبه ، وراح يتقدم في حرص شديد . ووقف يغلى اللبن ، وأخرج من التلمية الزجاجاة وراح يغسلها ، حتى إذا ما فار اللبن صبه فيها وأغلقها بالحلمة المطاط ، ثم اتجه إلى الصنبور وفتحها ، ووضع الزجاجاة تحت الماء المتدفق .

وكان يمص الحلمة مصة بين لحظة وأخرى ليطمئن إلى مناسبة حرارة اللبن ، وخرج إلى الردهة ، وراح يجوس خلال النائمين وهو ينقب عن هالة ، ويده ممدودة بالزجاجاة .

ولمح مراد نائما على الأرض وقد رفع رجله وأسندهما إلى الحائط ، ورأى سوسن عارية البطن كعادتها ، فمد يده وأسدل ثيابها على بطنها ، وأخيرا عثر بزوجه وقد نامت على ذراعها وإلى جوارها هالة ، فوضع

الحلمة في فم ابنته ، فإذا بها ترفع يديها وتقبض على الزجاجاة ، فنظر مليا ثم انسل هاربا من المكان .

ودبت الحياة في الشقة وارتفعت الأصوات وتداخلت وامتزجت فانقلبت إلى ضوضاء تحطم الأعصاب ، وأقبل سامي على أبيه وقال :

— ح اعمل لهم شاي في إيه ؟

فقال له أبوه في ضيق :

— ضروري يشربوا شاي ! إياك نفطرهم احنا .

— فيه ناس طلبت شاي ؟

فغمغم الأب مندهشا :

— طلبت ؟! هي قهوه ؟!

ثم رفع صوته وقال :

— روح اعمل لهم شاي في حلة .. في طشت الغليه .

— وح اجيب لهم شاي وسكر منين ؟!

— خد من ماما .

وتحرك سامي لينصرف ، وإذا بأبيه يقول له :

— اسمع . قبل ما تعمل الشاي اطلع للطباخ قول له يحضر لهم

الفطور .

— حاضر .

وانصرف سامي وبقي الأب وحده في الغرفة ، فراح يعد على أصابعه

وهو يحدث نفسه بصوت مسموع :

(أم العروسة)

— غدا وعشا وفطور وغدا وعشا .
ولوى شفته السفلى فى ضيق ، وهز كتفيه فى استسلام . وقال وهو
يدور على عقبه .
— واحد مصارينه خرجت ، كل واحد قال حته لقطتى .

الفصل السابع عشر

راح الأب يدور في الغرفات ، ويلقى نظرة أخيرة على المكان ، فعما قليل تغيب الشمس ويتقاطر المدعوون من كل حذب وصوب ، وأقبل سامى يرتدى بذلة أنيقة ، وكرفاة غالية ، يتبه في مشيته ، وأطل من الشباك ينظر ، فبدا عليه أنه ينتظر أمرا .

وجاء مراد غريبا لأول مرة ، فوجهه نظيف ، لا أثر للحبر في أصابعه ، يرتدى بنطلونا ، وقميصا من الحرير الهفهاف ، وحذاء أسود يتألق ، وكأنما استشعر التغير الذى طرأ عليه ، فقال بصوت خافت :
— الطباخ يقول عايز حمل خشب كان .

فقال الأب فى تبرم :

— أنا تعبت خلاص . قل له يجيب الى هو عايزه .

وأقبل عاطف يرتدى بنطلونا من القطيفة ، وقميصا تدلى فى أناقة فوق محيط البنطلون فأخفى جزءا منه ، وراح سوزى يتقدمه وهو يصبص بذيله ، ثم يتوقف حتى يلحق به ويتركه ، فيعود ليتقدمه ثم ينتظره .

وجاءت سوسن وقد قصت شعرها ، ووضعت الأحمر فى شفيتها وفى وجنتيها ، تحب فى ثوب منفوخ عند طرفه ، ضيق غاية الضيق عند خصرها .

وأسرع عاطف إلى أبيه وقال له :

— مش أنا حلو ؟

فقال الأب دون أن ينظر إليه :

— حلو خالص .

فدنا من أبيه حتى التصق به وقال :

— طب هات قرش بقى .

فقال له الأب .

— ح تعمل به إيه ؟ عندنا كل حاجة . اللي عندهم فرح ما ياخدوش

فلوس .

وغمغم فى صوت خافت :

— يدفعوا بس .

والتف أولاده حوله ، فقال لهم فى ذعر :

— انتو ح تنكوموا فى حتة واحده ؟! ما تتفرقوا .

وانتهز عاطف هذه الفرصة فقال :

— مش ح امشى إلا لما آخذ القرش .

فقال الأب لمراد :

— خد أخوك للطباخ يديه حتة هريسه .

ومد مراد يده وتناول يد عاطف ، فقالت سوسن :

— وانا يا بابا ؟

— وانتى روى معاهم .

والتفت سامى وقال :

— يبقى المعازيم مش ح يلاقوا حاجه ياكلوها .

وخرج مراد وعاطف وسوسن والكلب فى أثرهم وأقبل الفراش

وقال :

— عايزين نأجر كان كام لمبه حمره .

فقال الأب فى ضيق :

— كفايه اللى أجرناه .

فقال الفراش ليقنعه :

— الزينه اللى عملناها على واجهة البيت نورها فسخان . بقى نصرف

المصاريف دى كلها ، ونيجى ع الآخر نبوظ الطبخه على بقرش ملح !

— خلاص مش ح اعمل حاجه زياده عن اللى اتعمل . كفايه بقى .

وسار الفراش إلى جواره وقال :

— والميكرفون ؟

— مالوش لزمه .

وهز الفراش كتفيه وانصرف ، وأطل سامى من الشباك وهتف فى

فرح :

— صحابى جم .

وخف الأب إلى الشباك ونظر ، فإذا بجمع كبير من تلاميذ المدارس

مقبلين ، فقطب جبينه وقال :

— مظاهره دى !

والتفت إلى سامى وقال فى استنكار :

— إنت عزمت المدرسه كلها . ؟

ولم يرد سامى على استنكاره ، بل أسرع لاستقبال أصحابه .

وغادر الأب الشباك وهو مذهول ، وسار حتى غادر الغرفة ،

فلمحته زوجته ، فأسرعت إليه وقالت له :

— إنت لسه ما غيرتش هدومك ! الناس جت .

— أنا تعبت خالص . ما بقاش فى روح .

— خلص الكثير ما بقى الا القليل . كلها كام ساعه وننفض ،

ونستريح على طول .

— وهدومى فين ؟

— فى الأوده اللي كومنا فيها العفش .

وارتفع صوت ينادى :

— يا أم العروسه .. يا ست أم العروسه .

— جايه . جايه حالا .

وذهب الأب يستبدل ثيابه ، وانطلقت أم العروسه تلبى رغبات

المدعوات .

وتوافد الناس ، وازدحم المكان بالرجال والنساء والأطفال وجاءت

فتيات صغيرات ، وإذا بنبيلة تسرع إليهن وترحب بهن وتبالغ فى

الترحيب ، فقد كن زميلاتها فى المدرسة .

ونظرت الفتيات إلى ثوبها الأبيض فى إعجاب ، وقالت إحداهن :

— مش ناقصك إلا الطرحه البيضه وتبقى عروسه .

وقالت أخرى مستنكرة :

— بس ! لو كانت الحكايه كده كان كل شىء بقى سهل .. الرك مش

ع الطرحه .

فقال الأولى :

— أمال الرك على إيه ؟ .

فقال الثانية وهى تضحك :

— الرك ع العريس .

وماج المكان بالناس حتى لم يعد هناك موضع لقدم : وخرج الأب
بعد أن ارتدى ثيابه الأنيقة ، وراح يجوس خلال الجموع وهو مأخوذ ،
وأخذت صديقات نبيلة يرقصن ويغنين ، فسرى المرح وساد الفرح بهجة
وحبور .

وقال قائل :

— العريس .

فسرت هممة ، واشترأبت الأعناق ، وصوبت العيون إلى الباب
وتقدم جلال وأمه وأبوه وبعض فتيان وفتيات ، وكان شفيق بين
القادمين .

وطفق شفيق يتلفت ، حتى وقعت عيناه على نبيلة ، فشق طريقه
إليها ، وصافحها فى شوق ولم يكتف بالسر الذى أخذت عيناه تبوحان
به ، بل زم شفثيه وفطنت نبيلة إلى أنه يبعث إليها بقبلة ، فغضت من

بصرها ، وإن كانت ينابيع الغبطة تفجرت في أعماقها .
وانطلق جلال وأبوه وأمه ومن كان في رفقتهم إلى الكراسي المذهبة ،
واحتلوها . والتقى حسين بزوجه ، فقال لها همسا :

— علب الملبس مش ح تكفى . مافيش إلا إننا نقدم الملبس على
صوانى . يا دوب كل معزوم ياخذ ملبسه .. أنا تعبت خالص .. إمتى
المولد ده ينفض !

— بعد الكتاب ، يطلعوا البوفيه ، وكل واحد يروح لحاله ، وينفض
المولد ده .

وسحب رجل الأب من ذراعه ، وهو يقول له : المأذون جه ،
اتفضل .

وجلس الأب وجلال يتصافحان ، وأسدل على يديهما منديل من
الحرير ، وجلس المأذون بينهما يلقيهما صيغة الرباط المقدس ، ووقف
شفيق ينظر ونبيلة إلى جواره .

والتقت عينا شفيق بعيني نبيلة ، فإذا بالحب يتحدث ، وإذا بكل
خلجة من خواجهما تنم عن العاطفة الجياشة ، ومد شفيق يده وقبض
على يد نبيلة ، وراح يضغطها في رفق وحنان .

وأطلقت الرغاريد ، إيذانا بانتهاء العقد ، ودخل الفراشون يحملون
أكواب الشراب الوردى على صوانى من الفضة ، وامتدت الأيدي
واختفى الشراب في الأجواف .

وقام جلال يصافح المدعويين ، وإذا بشفيق يجذبه من ذراعه ويقوده

إلى حيث كانت أحلام .

كانت أحلام فى ثياب العرس ، وقد أسدات نقابا شفافا على وجهها ،
فمد جلال يده ورفع النقاب ، ومال إليها وقبلها قبلة طويلة حارة ، وإذا
بشفيق يلتفت إلى نبيلة ويهمس : عقبالنا .

والتقى حسين بزوجه ، فقالت له والدموع تترقرق فى عينيها :
— مبروك .

فقال لها :

— — تعبان ، متها إلى انى ح اقع .

— خلاص . طالعين ع البوفيه ، وبعدها ح ينزلوا على طول .
ووضع جلال يده فى يد أحلام وسارا والزغاريد تدوى فى المكان .
وتدفق المدعوون إلى السطح ، حيث الطعام ، ولم يبق فى الشقة إلا
الآثار ، وحسين منهار على مقعد من المقاعد الذهبية وزوجه إلى جواره
تقول له :

— ياللا نطلع . الناس تقول إيه !

— مش قادر . تعبت خالص . عايز أنام .

— قوم .. قوم . كلها ساعة . وتنام بعدها زى ما انت عايز .

— اسبقينى . ح استريح دقيقتين وح حصلك .

وقامت أم العروسة ، وانطلقت إلى السطح ، وبقي الأب
مضطجعا ، وحن جسمه إلى الراحة ، فأغمض عينيهِ ، ومس أذنيه
حفيف ثوب ، ووقع أقدام ، ففتح عينيهِ ونظر ، فإذا بشفيق مقبل وفى

يده نبيلة .

ورفع رأسه وراح ينقل بصره بينهما وهو مكدود ، وتقدم شفيق خطوة ، وراح يجمع أطراف شجاعته ، ثم قال :
— أنا جاى يا عمى أطلب منك نبيله .

فقال الأب دون تفكير :

— روح الله يبارك لك فيها .

والتفت شفيق إلى نبيلة ، ومد يده وقبض على يدها ، ثم انصرفا مهرولين ، وقد اتسمت حر كاتهما بالخفة والسرور .

وتمدد الأب فى المقعد الوثير ، وغفا قليلا ، ولكن سرعان ما استيقظ على دوى الزغاريد فهب من نومه ، وبدأ فكره يعمل ، فتذكر ما قاله شفيق : فصباح :

— شفيق .. نبيله . الله .. دا خطبها منى وأنا وافقت . ليه العمل دلوقت . ح اجهز تانى ؟! إزاي ؟ ومنين ؟!

وراح يهرول صوب باب الشقة وهو ينادى :

— يا زينب .. يا أم العروسه .. تعالى شوفى اللى جرى .. مش ح نستريح .. المولد ده مش ح ينفض .. مش ح ينفض أبدا .

وكان قد بلغ باب الشقة الخارجى ، فوقع بصره على أحلام وجلال وهما هابطان ، وشفيق ونبيلة خلفهما ، والرجال والنساء والأطفال يتدفقون خلفهما فى الدرج ، والزغاريد تجلجل والأصوات تتداخل فوقف ينظر وقد فغرفاه فى دهش ، ثم سقط مغشيا عليه .